


The Ohio State University




3 2435 01460 5141
KA615S581913 001
MEDHALI FIKH.

OHIO STATE UNIVERSITY BOOK DEPOSITORY



8 03 02 21 8 06 013

LIBRARY
OHIO STATE UNIVERSITY



مدخل فقه

مندرجاتی

فقهك واضعى . کیفیت وضع و تأسیسی . مأخذی . حکم
شرعیسی . فضائل و نسبت فائدهسی . موضوعی . غایهسی . حقیقتی .
امه اربعه نك مسلكی و مناقب جلیله لری طبقات فقہا و درجات مسائل
فقہیہ و بونلرك احكام لارمه لری . رسم مفتی . علامت افتا . مباحث
اجتهاد . حکم تلفیق افعال مكلفك و احكام شرعیہ نك و محكوم به
اولان افعال مكلفك و صرف حقوق باری تعلق ایدن افعال مكلفك
اقسامی . احكام اصل و خلف . احكام طهارت و صلات و زكات
و صوم و حج امثالی مسائل ضروریة مهمه بی حاویدر .



مؤلفی

ایچ ایللی سلیمان سرتی

هرحق محفوظدر



قسنطنطینیہ


۱۳۲۹

مطبعة ابوالضیا

KA 615

558

1913



بِسْمِ اللَّهِ الرَّحْمَنِ الرَّحِيمِ وَ بِهِ نَسْتَعِينُ

الحمد لولايه والصلوة والسلام على نبيه . بعدذا معلوم ارباب نهی و مجزوم
اصحاب دهادر که جوهر جلیل علم و کمال . حلیه زیبای حسن و جمال اولوب
تحصیل علم و کمال باینده فکر و نظر قربت خالصه اولان صیامه . تعلیم و تعلیمی
معراج وصلت اولان قیامه معادل اولدینی شهادت کرده ارباب کمالدر لکن

عندالاله علوم لیس يعرفها الالیب له فی الوزن رجحان
لله فی ذاک سرلیس يعرفه الافرید و ذاک الفرد انسان

مقتضاسنجه روضه نزهت افزای علمک شعب و اغصانی کثیر وفروع و افغانی
وفیر اولمقله هر نقدر اصول و موضوعاتی و اثمار و غایاتی اعتباریله اقسام و انواعی
مختلف و متفاوت اوله رق جمله سنی احاطه حد احصادن افزون و طوق احاطه دن
برون ایسه ده باعث فوز و نجات و داعی فیض و کمالات اولمقله حائر رجحان
و جائز حدسیان اوله رق متعارف و شایع الاثمار اولنلری علوم شرعیه و عقلیه
و ادبیه و ریاضیه اوله رق چار عنصر فضائل اولوب . علوم شرعیه دخی تفسیر . توحید .
حدیث . فقهه و علوم عقایه ده منطق . جدل . اصول دین . اصول فقه . علم الهی .
علم طبیعی . علم میقات . فلسفه . کیمیا امثالی بر طاقم فنونه و علوم ادبیه ده لغت .
صرف . اشتقاق . نحو . معانی . بیان . بدیع . عروض . قافیه . قرض شعر .
انشاء نثر . کتابت . قرائت . محاضرات . تاریخه و علوم ریاضیه ده حساب .
جبر . هندسه . موسیقی . تصوف . سیاست مدنیه . تدبیر منزل کی اقسامه تقسیم
اوله رق بر درجهیه قدر تحت حد و انضباطه الهرق وصلت اقتطافی تسهیل
اولمشدر .

ایشته صدد تعلیم و تعلمنده بولندیغمنز علمده علوم شرعیه اقسامندن علم فقه

اولوب فنون سائرہ یہ نسبتہ فضل و شرفی و فوائد و ثمراتی و مقام و مراتبی موضوع و غایتیہ ایضاح حقیقتدن منکشف و مستفاد اولہ جقدر .

❁ مبادی لازمہ ❁

مسئلہ ۱ — ہر علمک طالبہ بینمسی موجب بصیرت و ازدیاد سہولت اولان مبادی لازمہ تحصیل اولنہ جق فنک اسمی و واضعی و کیفیت وضع و تأسیسیہ تدوینی و مأخذی و حکم شرعیسی و فضائل و نسبت فائدہ سی و موضوعی و غایہ سی ایلہ حقیقتی اولق اوزرہ اون قدر شی اولوب صدق افادہ و استفادہ سندہ بولنہ یغمر علمک اسمی فقہ اولوب تشریع اعتباریلہ واضعی جناب اللہ و تبلیغ اعتباریلہ واضعی خواجہ کائنات علیہا کمل الصلوات و افضل لتحیات افندمن حضرتلری اولوب ادلہ شرعیہ دن استفاد اولان قواعد اصولیہ نک وضع و تأسیسیہ احکام فرعیہ سنی بالاستتباط جمع و تدوینلہ اسلوب معروف اوزرہ ابواب و فصولہ تقسیم ایدرک ترتیب و تدوینی اعتباریلہ واضعیدہ امام اعظم و ہمام افخم نعمان ابن ثابت حضرت تلیدرکہ کندیلری حضرت حماددن و انلردہ ابراہیم نخعی حضرت تلرندن و بونلردہ حضرت علقمہ دن و انلردہ عبداللہ ابن مسعود حضرت تلرندن و انلردہ مشکاکہ صدر نبوت و فص خاتم رسالت علیہ افضل الصلوات افندمن حضرت تلرندن و انلردہ حضرت جبرائل واسطہ سیلہ جناب رب العالمین حضرت تلرندن اخذ و تلقی بیورمشلردرکہ

الفقہ زرع ابن مسعود و علقمہ حصادہ ثم ابراہیم دواس
نعمان طاحنہ یعقوب عاجنہ محمد خابر والا کل الناس

نظمیلہ اشارت بیورلمشدر .

❁ فقہک کیفیت تأسیس و تدوینی و مسلاک حنفی ❁

مسئلہ ۲ — کتب موثوقہ نک بیانلرنہ کورہ صدر اسلامہ بالجملہ اصحاب کرام حضراتی اہل فقہ و ارباب فتوی اولیوب بلکہ علی ابن ابی طالب و عبداللہ ابن مسعود و عبداللہ ابن عباس حضراتی کی بالذات مشکاکہ صدر نبوتدن اقتباس و ارقدسیہ ایدرک وجوہ قرآنیہ و اصول احکام دینیہ بی حافظ و ناسخ و منسوخ و محکم و تشابہی و مجمل و مفسری کی ادلہ شرعیہ نک احکام شرعیہ بی افادہ سیلہ احکام شرعیہ نک استنباطندہ مدخلی اولان وجوہ سائرہ یہ واقف اولہ رق آیات جلیلہ

واحادث نبویه نك عبارہ و اشارہ و اقتضا و دلالہ سندن استنباط احكامہ قادر اولان خواص اصحابہ مخصوص اولہ رق بالجملہ اصول دینیہ و احكام شرعیہ انلر واسطہ سیلہ نشر و تعمیم بیوراشدر . چونکہ صدر اسلامہ بالجملہ طائفہ عرب او قویوب یازمقدن محروم بر طاقم امم امیہ اولوب نادرا ایچلرندن مشار الیہم حضراتی کی منبع فیض رسالتدن کسب فیوضات ایدوب قارئ قرآن اولہ رق (قرا) عنوانیلہ کسب اشتہار ایدوب فتوحات اسلامیه کسب اتساع وانتشار ایدرك شمس رسالت قدسیتلہ انوار اسلامیه آفاق واقطاری تنویر و افراد سعادت معاد اسلامیه بی تکثیر ایدرك تحصیل معارف دینیہ ایلہ ظلام امیت مبدل انوار فیوضات اولمقلہ كرك بالذات مشكاة صدر نبوتدن و كرك اندن استفادہ واستفاضہ بیوران ا کابر صحابہ دن سمعا وحسب السلیقہ آیات جلیلہ وسنن سنیه دن بالاستنباط هر نقدر رونق بخش صحیفہ سطور قلہار ایسہدہ محفوظ محفظہ صدور قلنہ رق کابرا عن کابر بالمشافہہ افادہ واستفادہ ایلہ بالجملہ احكام فقیہیہ خلفای راشدین و ائمہ دین مبین بینندہ کسب رسوخ ایدرك قرین حد کمال اولمغین امر اجتهاد بر درجه یہ قدر کسب تمکن و تقرر ایدوب فن مستقل صرہ سنہ کیرمش و اول وقتلر بویلہ احكام شرعیہ نك ادلہ شرعیہ دن استنباطنہ قادر اولان اکابر امتہ قرا یرینہ علما و فقہا عنوان مفاخر البرہانی نشانہ امتیاز اتخاذا اولمشدر . بناءً علیہ عصر کمالات حصر اصحاب دنصکرہ علم فقه بری جانب عراقده اهل رأى و دیکری دیار حجازده اهل حدیث مسلکی اولمق اوزره ایکی قسمہ منقسم اولوب اهل عراق عندندہ تصحیح اسانید شروط کثیرہ ایلہ مشروط اولہ رق آنلرده رواة حدیث قلیل اولمغلہ اکثریتلہ احكام شرعیہ بی کتاب وسنت واجماع امتلہ منصوص اولان احكام جلیلہ یہ قیاسلہ بالاجتهاد استنباط ایدرك اصول اجتهادده کسب رسوخ و ملکہ ایدملکہ انلرہ اهل رأى تعبیر اولنوب مقتدا بہلری سیف الله المسلول علی الملحدین ابوحنیفہ نعمان ابن ثابت حضرتلری درکہ امر اجتهاد و اصابتده اخلاف و اسلافدن هیچ بر مجتہد کعبہ واصل اولہ میہ رق امام الائمہ عنوانیلہ بنام اولدقلری امام مالک و امام شافعی حضراتی کی اجلہ مجتہدینک شہادتلریلہ مثبت و مبرہندر ،

❁ اهل حدیثک مسلکی و امامی ❁

مسئلہ ۳ — اهل حدیثک متبوع مفضملری امام دارالہجرہ امام مالک ابن

انس الاصبیحی حضرتلری اولوب قطر حجازده بسط بساط اجتهاده اخیای معالم دینه بیوروب مسلك اجتهادلری سنن سنیهیه حصرتمسکله استنباط احکام اولوب حتی مشار الیه حضرتلری اهل مدینهنک بر خصوصده اتفاقلرینی اخلافک اسلافدن اقتباس ایدرک سلسله اتباعلری سنن سنیهیه مستندن اوله رق امر مسنون اولمق اوزره استنباط احکامده دلیل شرعی کی تلقی و اعتبار ایلمسی اوزرینه مشار الیهک بووجهله اعتبارینی اجماع امت اولمق اوزره اخذ و تلقیسنه حمل ایدرک اجماع امت هر عصرده بولنان مجتهدین عظام حضرتنک علی وجه الاجتهاد بر حکم شرعی اوزرینه اجماع و اتفاقلرندن عبارت اولغله اوله اهل مدینهنک اتفاقیله حاصل اولماز دیهرک اعتراضده بولنمشلردر حالبوکه مشار الیه حضرتلرینک اهل مدینهنک اتفاقلرینی اعتباری اجماع اولمق اوزره اولمیوب بلکه مقتضای مسلکی اوله رق بر وجه بیان اخلافک اسلافه اتباعلریله بالذات حضرت پیغمبردن اخذ و تلقی اولنمش بر امر مسنون اولمق اوزره اعتبار و التزامندن عبارت اولوب مطلقا اتفاقد اجماعه مناسبتنه بناءً اصول مالکیهده اجماع بابنده بیان اولنسی داعی اشتباه اوله وق باعث اعتراض اولمشدر . بناءً علیه مقتضای مسلکینه بناءً سنت بابنده و یا اختلاف اعتباریله (شریعت من قبلنا) و یا مذهب صحابی و یا استصحاب کی بین الائمّه اختلافی اولان ادله بابنده ذکر و بیان اولنسه ایدی جای اشتباه اولیه رق باعث اعتراض اولمیه جنی درکاردر .

✽ مذهب ظاهریه ✽

مسئله ۴ — بعده (و نزلنا علیک الکتاب تبیاناً لکل شیء) و (ولا رطب ولا یابس الا فی کتاب مبین) مقتضالرنجه کتاب الهی بالجمله احکام شرعییه یی عباره و اشاره و اقتضا و دلالت سیله افادهیه کافی اولمسنه قائل اوله رق ادله شرعییه یی نصوصله اجماعه حصر ایدوب بر حکمک علتنی تصریح جمیع محله اول حکمی تصریحدر دیهرک علت منصوصه ایله قیاس جلیبی نصه ارجاع ایله خوارج مطلقا بعض شیعه و نظام و داود اصفهانی شریعایته قیاسله عملی نفی و انکار ایله داود ابن علی ایله اوغلی ظاهریه عنوانیله اوچنچی بر مذهب تأسیس ایدرک اهل رأی و اهل حدیث و ظاهریه مذهبی اولمق اوزره بر آرائق باب عمده مذهب

جمهور بو اوچه منحصر اولمش ايسهده آز زمان ايچنده مذهب ظاهره نك اصولی قرین زوال اوله رق انوار مذهبی منطقی و اتباعی منقرض و مندرس اولمقله جانب عراقده اهل رأی و سمت حجازده اهل حدیث مذهبی طریق رشد و هدایت قلمشدر .

❁ مذهب شافعی ❁

مسئله ۵ — بعده امام شافعی حضرت تبری ابتدا امام مالک حضرت تدرندن مسلك حدیثی بعد التحصیل دیار عراقه رحلتله ائمه حنفیه دن اصول رأی و اجتهادی دخی تحصیل ایدرك هر ایکی مسلكی بر برینه مزجله بالتألیف مستقلاً اوچنجی برمسلك اتخاذیله تأسیس مذهب ایلشدرکه مشارالیه حضرت تبری بلغای عربدن اولمقله هر دلیلدن اول آیت جلیله و احادیث نبویه نك صورت افاده لرینه نظرایله نه طرفده قوت و قناعت بولورسه انکله عملی ترجیح ایدوب بر طرفده قوت بوله ماز ايسه اول وقت طریق رأی و قیاسله عمل ایدوب بر چوق اصول و فروعده اهل رأی و اهل حدیثه مخالفته بولنه رق کسب استقلال و اشتهار ایلشدر .

❁ مذهب حنبلی ❁

مسئله ۶ — بعده امام احمد بن حنبل حضرت تبری دخی ائمه حنفیه و امام شافعی دن بالتدریس ائمه ثلثه مسلكنی بعد التحصیل پك چوق احادیث نبویه حفظ ایدوب ابتدا آنلرك بر برینی تأیید ایلرینه نظر ایدوب احادیث مذکورده نك بر برلرینی تقویه لرینی اساس اتخاذ ایدرك ادله سائریه ترجیح ایتمكله پك چوق مسائله رأی دیگر لرینه مخالف کلدیکندن مستقلاً بر مذهب اجتهاد و اتخاذ ایتسیله باب عملده مذهب اهل سنت بودرتده کسب قرار ایلش ايسهده مأخذ لرینك اتحاد لرینه بناء فی الحقیقه جمله سی عین شریعتدن مقتبس اولوب حسب الاجتهاد بعض مسائله بینلرنده واقع اولان اختلاف اختلاف ازمان و اشخاصك مقتضاسی اوله رق تخفیف و یا تشدیده راجع اولمقله (اختلاف امتی رحمة واسعه) مقتضای نه امت محمد حقنده بر لطف الهی اولدیغی کبی بر حکم شرعی حقنده اتفاق لریده (اجماع امتی حجة قاطعة) مفاد نه حجة قاطعه اولمقله اتفاق اولان اجتهاد لرنده جمله سنك اصابت و حقیق لرینه قائل اولمق لازم اولدیغی کبی

اختلافی اولانده دخی هر مکلفک تابع اولدینی امامک مقتضای اجتهادیه عمل ایتسی لازمدر زیرا بوجه بیان اهل سنتک فروع اعمالده اختلافلرینه سبب بر حادثه نك حکم شرعیسنی بیانده ابتدا کتابه . نص کتاب بولنماز ایسه سنت سنیهیه مراجعت اولوب آکا دائر سنت سنیهیه بولنماز ایسه اجماع امته و اجماعده بولنماز ایسه بالاجتهاد نص کتاب ویا سنت سنیه ویا اجماع امتله ثابت اولان حکم شرعییه قیاسله عمل لازم اولوب آرای بشر ایسه فطره مختلف اولوب بالطبع آنک اختلافیه اجتهادی اولان مسائله اختلاف ضروری اولمقله بیان اولدینی وجهله اتفاقی اولان مسائله اجتهادلرینک اصابت و حقیقته قائل اولوب اختلافی اولان مسائله هر مکلف تابع اولدینی امامک اجتهادنده خطا احتمالیله برابر صواب اولمسنه قائل اوله رق مقتضاسیله عمل ایتسی لازمدر .

❁ حکم اجتهاد و تقلید ❁

مسئله ۷ — حکم اجتهاد مورد نصک غیریده جاری اولمقله شرائط اجتهادی حائر اولان هیچ بر مجتهدک اجتهادنده کرک اصابت و کرک خطاسی حقنده نص بولنیه جنی کبی مجتهدک اجتهادی ادله ظنیهیه مستند اولمقله هر مجتهدک بالاجتهاد استنباط ایتدیکی حکمک اصابت و یا خطایه احتمالی ضروری اولوب حسب الاجتهاد حکم حادثه حقنده حاصل اولان ظن غالیله کرک کندیسکی و کرکسه کندیسنه تقلید و اتباع ایدن مکلفه عمل لازم اولوب (ان اصبت فلك عشر حسنات وان اخطأت فلك حسنة واحدة) مقتضاسنجه هیچ بر مجتهد اجتهادنده خطا اوزره مواخذه اولنیوب بلکه اصابت ایدرسه بری اجتهاد طقوزی اصابت ثوابی اولمق اوزره اون اجره مستحق اولوب خطا ایدرسه یالکیز اجتهاد ثوابی اولمق اوزره بر ثوابه مستحق اوله جغندن انفا اشارت اولدینی اوزره اتفاقی اولان مسائله اصابتلرینه قائل اولوب اختلافی اولان مسائله هر مقلده تابع اولدینی امامک خطاسنه احتمالیله برابر اصابتنه قائل اوله رق مقتضاسیله عمل لازمدر والا تقلید و اتباعی صحیح اولماق لازمکلور .

اما ایمان تصدیق یقینیدن عبارت اوله رق نقیضنه احتمالی اولیه جغندن اعتقادک

اساسی یقین اوزرینه مبتنی و مؤسس اولمقله باب اعتقادده وجوبا ذات باری و صفات مقدسه الهیه و احوال ملائکه و کتب سماویه و رسل کرام و قضا و قدر و خیر و شر و بعثت و سائر فرائض دینیه کبی ضرورات دینیه دن اولان عقائد دینیه ده بز اهل سنتک مذهبی قطعیاً حق اولوب مخالف بولنان فرق ضالنهک مذهبیرینک بطلانیاه قائل اولمق لازمدر . بونکله برابر قدم عالمه قائل اولمق و جزئیاته علم باری انکار کبی ضرورات دینیهیه معاند و معارض اولمدقه اهل قبله اکفار اولنماز .

• مناقب جلیله •

مسئله ۸ — ائمه اربعهک مناقب جلیله لری حقنده پک چوق کتب مدونه تألیف اولنوب (اجماع امتی حجة قاطعة) و (اختلاف امتی رحمة واسعة) و (علماء امتی کانیا بنی اسرائیل) کبی آثا جلیله جمله سنه شامل اولوب بالخاصه امام اعظم حضرتلری حسب القدم اصحاب کرام حضرتانه اریشه رک (خیر القرون قرنی ثم الذین یلونهم) مقتضاسنجه خیر القرون رجالتدن بولنان تابعین عظام حضرتاندن اولوب درالمختار و رد المختارک بیانلرینه کوره ابن نفیل . واثله . عبدالله ابن عامر . ابن ابی اوفی . ابن جزء . عتبه . مقداد . ابن یسر . ابن ثعلبه . سهل ابن سعد . انس . عبدالرحمن ابن یزید . محمود ابن لید . محمود ابن ربیع . ابو امامه . ابو الطفیل حضراتی کبی بعض اصحاب کرام حضرتاندن احادیث شریفه دخی روایت بیورمشلردر .

امام مشارالیه حضرتلری کوفه دن نشأت ایدوب دارالخلافه العباسیه اولان بغداد بهشت آبادده نشر انوار دینیه بیورمغله مذهب مذهبیری دیار عراقده انتشار ایدرک بالعموم اهل عراق و هند و چین و ماوراء نهر و اکثر ممالک عثمانیه و بلاد عجم حنفی اولدقلری کبی الی الآن بالجمله خلفای اسلامییه مذهب حنفی اوزره اجرای احکام و انفاذ قضا ایده کلشلردر .

کتب موثوقهک بیانلرینه کوره معجزه باهره اوله رق امام مشارالیه حقلرنده (ان آدم افتخر بی و انا افتخر برجل من امتی اسمه نعمان و کنیته ابوحنیفه هو سراج امتی) و (ان سائر الانبیاء یفتخرون بی و انا افتخر بابی حنیفة من

احبه فقد احبني و من ابغضه فقد ابغضني) كبي اخبار جليله ايله مقدم الخبر
و موأخر المبتدالردر .

مسئله ٩ — مسعر ابن كدام حضرت امامك مناقب جليله سنى بيانده
حسبى من الخيرات ما اعدته يوم القيامة فى رضى الرحمن
دين النبي محمد خير الورى ثم اعتقاده مذهب النعمان

بيوروب بر كيمسه جناب حقه وصلت خصوصنده حضرت امامه توسل ايدرسه
امينمكه نائل مرام اولور بيورمشر .

اكابر عرفادن ابن مبارك حضرتلرى دخى

لقد زان البلاد ومن عليها	امام المسلمين ابو حنيفة
باحكام و انا وفقه	كليات الزبور على الصحيحه
فما فى المشرقين له نظير	ولا فى المغربين ولا بكوفة
يبيت مشمرا سهر الليالى	وصام نهاره لله خيفة
و صان لسانه عن كل افك	وما زالت حوارحه عفيفة
يعف عن المحارم و الملاهى	و مرضاة الاله له وظيفة
فمن كابى حنيفة فى علاوه	امام للخليفة والخليفة
رأيت العائين له سفاها	خلاف الحق مع حجج ضعيفة
وكيف يحل ان يؤذى فقيه	له فى الارض آثار شريفة
وقد قال ابن ادريس مقالا	صحيح النقل فى حكم لطيفة
بان الناس فى فقه عيال	على فقه الامام ابى حنيفة
فلعنة ربنا اعداد رمل	على من رد قول ابى حنيفة

قصيده بليغله تنوير عيون و تسرير اذهان و آذان بيورمشردر .

❁ مناقب عمومية ❁

مسئله ١٠ -- ائمة اربعة حضراتى قرين توفيقات الهيه اوله رق حسن ظن
انامه مظهر اولمقله حقلرنده اتفاق عامه واجماع امه واقع اوله رق مجتهدين
سائرهنك اتباعى منقرض اوله رق انوار اجتهادلرى منطفى و مندرس اولدينى

حاله الى الآن بالجملة اهل سنت وسائر فروع اعماله آنلره حصر اتباع ايدرك ارواح قدسيه لري احيا بيورلمقدده در .

ائمة مشار اليهم حضراتك تاريخ ولادت و ارتحال لري ايله
مدت حيات ومدفن مبارك لري

القاب جليله لري . تاريخ ولادت لري . وفات لري . مدت حيات لري . مدفن مبارك لري				
امام اعظم ابو خنيفة	۸۰	۱۵۰	۷۰	بغداد بهشت آباد
امام مالك	۹۰	۱۷۹	۸۹	مدينة ده جنة اليقية
امام شافعي	۱۵۰	۲۰۴	۵۴	مصر قاهره
امام احمد ابن اخيل	۱۶۴	۲۴۱	۷۷	بغداد

طبقات فقهای حنفیه

مسئله ۱۱ — افتا ويا قضا ايله اشتغال ايدم جك مفتي ويا قاضي ايجون يالكز قوليله فتوى ويره جكي ويا حكم ايدم جكي كيمسه لري مجزد اسم ويا نسب ايله بيلم لري صحت فتوى و قضاده كافي اوليوب بلكه بر مسئله ده اقوال متخالفه دن بريني آخر اوزرينه ترجيحه قائلك قدرت كافيه و بصيرت كامله اربابن دن اولن لري ديكر لرندن تميز ايجون امر روايتجه درجه لريني و طبقات فقهاجه مرتبه لريني بيلمك الزمدر .

طبقات مذكوره يدي درجه اوزره در

مسئله ۱۲ — ۲۱ مسئله ده ايضاح اولنه جنج اوزره هر نقدر نفسنده ممكن ايسه ده الان ائمة اربعة كي مجتهد مطلق مفقود اولوب مشهور اولان كرك مجتهد و كرك مقلد على الاطلاق فقها يدي طبقه اوزره اولوب (۱) مجتهد في الشرع طبقه سيدر كه ادله شرعيه دن قواعد اصوليه يي بالاستتباط تأسيس ايدرك احكام شرعيه لريني استخراجله تفريع ايدن ائمة اربعة و آنلرك مسلكنه سلوك ايدن سائر مجتهدين عظام حضراتي اولوب تأسيس قواعد اصوليه ايله بشقه لرندن ممتاز لردر .

(۲) مجتهد في المذهب لردر كه ائمة مذكوره نك تأسيس بيورد قلري قواعد

اصولیه واسطه سیله ادله شرعیه دن احکام شرعیه نك استنباطنه قادر اولان فقهادر اصول ختفیه به نسبتله ابو یوسف و امام محمد و سائر اصحاب ابو حنیفه کی که بونلر هر تقدیر بعض فروعده حضرت امامه مخالفته بولنورلر ایسه ده اصولده آکا تابع اوله رق مقلد اولدقلرندن مجتهد مطلق عد اولنمازلر ایشته بویله اصولده تقلید ایله امام شافعی و امام مالک و امام احمد ابن حنبل حضراتی کی بعضا اصل مذهبده حضرت امامه معارض و احکامده مخالف و قواعد و اصولده غیر مقلد اولان مجتهد فی الشرع لردن آریلورلر .

(۳) مجتهد فی المسائلدر حصاف و ابو جعفر طحاوی و ابوالحسن الکرخی و شمس الاثمه السرخسی و الحلوانی و فخر الاسلام یزدوی و فخرالدین قاضیخان کی که بونلر نه اصولده ونه فروعده صاحب مذهبه اصلا مخالفته قادر اولیوب حضرت امامک وضع و تأسیس بیوردینی اصول و قواعد توفیقاً انلر طرفندن منصوص اولیان بعض مسائلده اجتهاد ایدرک احکامنی استنباط ایدرلر .

(۴) اصحاب تخریجدر که اصلا اجتهاده قادر اولیوب بلکه اصول مقرره بی احاطه و مأخذلرینی ضبط و محافظه ایدرک امام اعظم و اصحابندن مروی اولوب برقاج وجهه محتمل اولان اقوال محتمله و احکام مبهمه بی اصلارینه نظر و فروعدن امثاله قیاسله تفسیر و تعیننه مقتدر اولان مقلدیندر ابو بکر رازی و امثالی فحول فقها کی .

(۵) مقلدین فقهادن ابوالحسن القدوری و صاحب هدایه امثالی اصحاب ترجیحدر که برقولک دیکرندن اصح و یاناسه ارفق و عصره اوفق و ارجح اولسی کی اقوالک بعضیئرینی بعضیئرلی اوزرینه ترجیح ایدرلر .

(۶) مقلدین متأخریندن و اصحاب متون معتبره دن صاحب کنز و صاحب مختار و صاحب وقایه و مجمع کی انجق اقوال مرویه نك قوی و اقوی و ضعیف و ظاهر روایت و ظاهر مذهب و روایت نادره بینلرینی تفریق و تمیزه قادر اولوب کتابلرنده اقوال مردوده و روایت ضعیفه بی اصلا نقل ایلیان اصحاب تمیزدر .

(۷) اصول مشروحه دن هیچ برینه قادر اوله میوب بعض مسائل فرعیه حفظ ایدن ضعفای مقلدیندر که حفظ ایتدکاری مسائله نظراً فقهایه کوره فقیه عد اولنورلر ایسه ده علمای اصوله کوره صرف مقلدیندن اوله رق علملرینه فقه

و کندیلرینه فقهه اطلاق اولتماز بونلره لازم اولان وظیفه طبقات سائر اربابنک حیاتلارنده افتا و قضالرینه تابع اولدقلری کبی افتاء و قضالارنده آنلرک تصحیح و ترجیح ایتدکاری اقواله اتباعله مقتضالریله عملدر .

مسئله ۱۳ — انلر بعضاً بلاترجیح بعض اقوال عدیده نقل و بیان ایدرلر و بعضاًده قول صحیحده اختلاف ایدرلر بوصورتده انلره نسل اتباع ایدلم دینورسه عاده محکم اولقله امر افتا و قضاده تغیر عرف و تغیر احوال ناس و ناسه ارفق و عصره اوفق اولانی و تعامل ناسی و وجهی قوی اولانی اعتبارکبی حالاتده طبقات مذکورده رجالنک عمللری کبی عمل ایجاب ایدر دیوجواب ویریلور مع هذا (لاتزال طائفة من امتی ظاهرین علی الحق حتی یأتی امر الله) مقتضاسنجه یوم قیامتهدر طبقات مذکورده رجالنک عملی کبی عمله مقتدر رجال امت اکسک اولیه جنی جهتله امر افتا و قضاده تمیز و تفریقدن عاجز اولان مفتی و قاضیلره لازم اولان اقوال ضعیفه و روایت مرجوحه ایله افتا و قضادن توقی و احتراز ایدوب اهل و اربابنه بالمراجعه بر وجه شرع ایفای وظیفه اعتنا و اهتمام ایلکدرکه قواخانه اشبو وظیفه ایچون دائماً کشاده بولندیغی کبی طبقات محاکمده درجات ثلاث اوزره مرتب اولملری بو مصلحته مبنید .

درجات مسائل

مسئله ۱۳ — بیان اولندیغی اوزره فقها یدی طبقه اوزره اولدیغی کبی مسائل فقهیهده ظاهر روایت. نوادر. واقعات اوله رق اوچ درجه اولوب ظاهر روایت مسائل اصول اوله رق امام اعظمدن ابویوسف و امام محمد حضراتی کبی حضرت امامک شاگردانندن مروی اوله رق امام محمدک مبسوط و زیادات و جامع الصغیر و جامع الکبیر و سیر صغیر. سیر کبیر نام کتابلارنده مذکور اولوب متواتر و یا مشهور اوله رق رواة ثقاتله امام محمد حضرتلرندن مروی اولان مسائلدر .

مسائل نوادر امام محمد حضرتلرینک کیسانیات. هارونیات. جرجانیات. رقیات کبی کتب سته مذکورده نک غیریسنده مذکور اولان مسائلدر .
واقعات ایسه ائمه مشارالیه حضرتانندن مروی اولیه رق حادثه و وقوعنده

ابو یوسف و امام محمد حضراتنک شاکردلری و سائر اصحاب طبقات طرفندن بالاجتهاد استنباط اولان مسائل اولوب عمل خصوصنده قوتلریده درجات مذکوره اوزره مرتب اوله رق ظاهر روایت دیکرلری اوزرینه نوادر. واقعات اوزرینه تقدیم اولنوب بالاتفاق ظاهر روایتدن متفق علیها اولنلر ایله افتا و قضا جائز اولوب اختلافی اولنلرده رسم مفتی موجبجه عمل اولنور .

❁ رسم مفتی ❁

مسئله ۱۴ — رسم مفتی بر مفتینک اقوال صحیحه ایله افتاسنه علامت و دلیل معناسنه اوله رق روایت ظاهرده ائمه حنفیهنک اتفاق ابتدکاری قول ایله فتوی ویرلمکدر. متفق علیه اولان اقوال فقها ایله افتا و قضا بالاتفاق صحیح اولوب مختلف فیها اولان مسأله اختلاف اوله رق سراجیه و بشقه لرینک بیانلرینه کوره اصح اولان مفتی مجتهد و مقلد اولق اوزره ایکی قسم اولوب مفتی اقوال مختلف فیها دن برینی اخر اوزرینه ترجیحیه و دلیللرینک قویسنی ضعیفندن تفریق و تمیزه قادر اوله رق مجتهد ایسه دلیلی قوی اولانله فتوی ویرمسی لازمدر. اما بونه قادر اوله ییه رق مقلد ایسه انک وظیفه سی اولامام اعظم حضرتلری کرک یالکز و کرکسه بشقه سیله متفق بولونسون انک قولیه وامام اعظمندن صکره ابویوسفک قولیه و بوندن صکره امام محمدک قولیه فتوی ویرمکدر بر مسئله ده امامین حضراتی متفقاً امام اعظم حضرتلرینه مخالف بولاندقه هانکی طرفک قولیه فتوی ویرسه جائز اولوب امام زفر ایله حسن ابن زیادک قوللری درجه واحده ده اعتبار اولنمشدر .

بحرک وقف بحثده و سائر کتب فقهیه ده بیان اولندیغنه کوره بر مسئله ده ایکی قول مصحح بولنوبده برینک تصحیحی دیکرندن اکد اولیه رق مساوات حالده بولنور ایسه هر هانکی سیله فتوی ویریلسه ویا مقتضالریله حکم اولنسه جائزلردر .

❁ علامت افتا ❁

مسئله ۱۵ — مضممراتک اولنده بیان اولندیغنه کوره اصح اقوال ایله افتانک علامتی فقهانک وعلیه الفتوی و به یفتی و به نأخذ وعلیه الاعتماد و علیه

عمل الیوم وعلیه عمل الامة وهو الصحيح او الاصح او الاظهر او الاشبه
او الاوجه او المختار کبی حاشیہ نزدویدہ ذکر اولنان تعبیرات امثالندن بریلہ مذیل
اولسیدر .

مسئلہ ۱۶ — فتاوی رملیہ نک بیانہ کورہ علامت افتا الفاظک بعضری
بعضرندن اقوی واکد اولدیغندن افتا وقضاده علامت اقوی ایلہ مذیل اولان
قول دیکری اوزرینہ ترجیح اولنور .

مسئلہ ۱۷ — فتوی لفظی صحیح . اصح . شبه کبی تعبیرات سائرہ دن
وبہ یفتی قولی وعلیه الفتوی قولندن والاحوط قولی والاحتیاط قولندن اکدر .

مسئلہ ۱۸ — اصح قولی صحیح قولندن اکدر دنیلمش ایسده منیه
شرحنده ولایحوز مس المصحف الا بغلافه دیدیکی یرده صحیح ایلہ مذیل اولان
قولک تختی متفق علیہ اولوب اصح ایلہ مذیل اولان اختلافی اولغله متفق علیہ
اولان قول صحیح ایلہ عمل دہا موافقدر بیورلمش بناء علیہ الوجیه کبی صفت
مطابقه ایلہ تزییل اولنان قول الاوجه کبی صفت تفضیلیه ایلہ تزییل اولنان قولدن
اقوادر .

مسئلہ ۱۹ — رسم مفتی خصوصنده بیان اولنان احکامده مفتی ایلہ قاضی
بیننده فرق مفتی حکم شرعی پی مخبر اولوب قاضی ملزم اولقله اقوال راجحه
وارایکن انک خلافیلہ کړك افتا وکړك قضا والزام خلاف اجماع اولغله باطلدر .

❁ حکم قضاء ❁

مسئلہ ۲۰ — تولیت قضا زمان ومکان واشخاص وقوم وبعض خصوص -
صاتک استثناسیلہ تخصص ایدر بناء علیہ برسنه مدتلہ حکمه تعیین اولنان
حاکم انجق اوسنه ایچنده حکم ایدہ بیلوب اندن اقدم ویا صکره حکمی
نافذ اولماز وکذا معین بر قضاده حکمه تعیین اولنورسه انجق اول قضاده
حکم ایدوب بشقه قضاده حکم ایدہ مز و بر محکمه ده حکمه تعیین اولنان
حاکم انجق اول محکمه ده حکم ایدہ بیلور وکذا مصاحبت عامه ملاحظه
عادلہ سنه بناء امر سلطانیه استماعندن منع اولنان دعوی استماع اولماز وبعض
خصوصک استمانه مأذون اولوب دیکرندن ممنوع اولور ایسه انجق مأذون

اولدیغنده حکم ایدمیلور وکذلک بر مجتهدک برخصوصده رأی مصلحت عامهیه موافق ویا ارفق اولدیغنه بناءً انک رأیله عمل اولتمق اوزره امر سلطانی وارد اولورسه انک خلافه دیگر مجتهدک اجتهاد ورأیله حکم نافذ اولماز .

مسئله ۲۱ — امر اجتهاد هر نه قدر ذاتنده ممکن ايسه ده لکن ایضاح الاشباہ هک ۱۳۵۳ مسئله سنده بیان اولندیغی اوزره اساس و مبناسی اعتباریله برچوق علوم و فنونه متوقف اولوب فنون مذکورده السنه بلغادن اقتباس اولنان پک چوق مقالات و اصطلاحات تشعب و تکثر ایدرک خصوصیه تغیر ازمانله تغیر تطبیق احوال و احکام حسیله مقام اجتهاد متعذر الوصول برحاله کلدیکنندن علمای عظام امر اجتهادده اظهار عجزه مجبور اوله رق طحطاوی و در مختار ورد مختار و فرائد بهیه حتی صاحب اشباهک فن نایده بیانلرینه کوره برطاقم ناهلک اجتهاد فکریله خلاف شرع بدعتلر احداث ایدرک امر دیانتده ایقاع فساد یلملرندن توقی و احتراز ایچون بالاجماع درئیوز تاریخندن صکره رأی و قیاسله اجتهاددن منع اوله رق کرک مفتی و کرک قاضی بر مسئله شرعیه حقنده ائمه دن نص بولمقدجه بشقه بر مسئله قیاس ایدرک انکله افتا و قضادن منع ایله ناسی مذاهب اربعه دن برینه ذهابله تقلید و اتباعه سوق ایدرک باب اجتهاد مسدود حکمنده قلم مشدر حتی تحریردن نقلاً ایضاح الاشباهک ۱۳۸۳ مسئله سنده بیان اولندیغی اوزره ائمه اربعه نک مذهب لرینک انضباط و انتشارلری و کثرة اتباع لرینه بناءً انلرک مذهب لرینک خلافه اجتهادله افتا و قضا بالاجماع نافذ اولمدیغندن بعدما وقرع بوله جق اجتهادک حکمی انلرک اجتهاد لرینه یا موافق یا مخالف اولوب موافق اولدیغی صورتده حکم مذکور انلرک ثمره اجتهادی اولوب مخالف اولدیغی حالده خلاف اجماع اولمقله غیر نافذ اوله جغندن بقای اجتهادله حکمک خلاف اجماع اوله رق عدم صحتی مستفاد اولور مکرکه قرین اجتهاد اولمیان حادثه حقنده اجتهاد اولنسون .

⑧ حکم تلقیق ⑧

مسئله ۲۳ — تلقیق مثلاً بدنندن قان چیقمش ایکن مذهب شافعییه بناءً ابدستک عدم انتقاضنه و نسیاه مس ایلش ایکن مذهب حنفییه بناءً ابدستک بقاسنه قائل اوله رق اول ابدستله ادای صلات ایلک کی بر عمل و عبادتده ایکی

مذہبی جمع وتلفیقدن عبارت اولوب بو ایسه امور دینیه ده تلاعب اوله جغدن بالاجماع باطل اولدینی کبی مثلاً مذهب حنفی یه تقلیداً باشک درتده برینی مسح ایلمش اولدینی ابدستله نمازی بعد الادا مذهب مالکده تکمیلنی مسح وجوبنه قائل اوله رق مذهب حنفیدن رجوعله قیلمش اولدینی نمازک بطلاننه قائل اولمق کبی بعدالعمل تقلیددن رجوعده مذهب مختارده بالاتفاق باطل اوله رق مذهب اربعه یی بربرنه خلط ایدوب قاریشدرمقدنده خلقی منع ایلمشاردر.

❦ فقهک مأخذی ❦

مسئله ۴۳ — فقهک مأخذی کتاب ، سنت ، اجماع امتله قیاس فقها اولوب کتاب ولو بر حرف اولسون ایت جلیله در بناء علیه (یا ایها الذین آمنوا اذقتم الی الصلوة فاغسلوا وجوهکم وایدیکم الی المرافق وامسحوا برؤسکم وارجلکم الی الکعبین) آیت جلیله سننده اعضای مغسوله و ممسوحه مطلق جمع افاده ایدن و او ایله عطف اولمقله هر نقدر (ابدؤا بمبدأ الله) مقتضاسنه مخالف اوله رق مکروه ایسه ده خلاف ترتیب النان ابدست صحیح اوله رق نماز و امثالی بلا طهارت ادالری جائز اولیان افعال مکلفک ادالری جائز اولور .

وکذا (واحل لکم ما وراء ذلکم ان تبغوا باموالکم) آیت جلیله سننده (با) طلب نکاح معاسنه متعلق بولنان ابتغانک مهر معاسنه مدخولی بولنان ماله الصاق واتصالنی افاده ایدوب نظمک خاص قسمندن اوله رق مدلولنده قطع افاده ایتیکله عقد نکاحک مهردن عدم انفکاکنی افاده ایدرک حین عقدده مهر تسمیه اولندقدده قبل الدخول مفارقتله نصف مسما وبعد الدخول مفارقتله تکمیل مسما لازم کلدیکی کبی حین عقدده مهر تسمیه اولنماز ایسه بعد الدخول مفارقتله مهر مثلاً تمامی وقبل الدخول مفارقتله بر چارشاف و بر کومدکله بر باش اورتوسندن عبارت اولان مهر متعه لازمکلور .

❦ سنت ❦

مسئله ۴۴ — سنت . قولاً و یا فعلاً و یا تقریراً حضرت پیغمبردن صادر اولان شی اولوب علی الاطلاق جمله سننه سنت تعبیر اولدینی کبی بالخاصه قولاً صادر اولانه حدیث و خبر تمیز اوله رق متواتر ، مشهور . آحاد اولمق اوزره

اوج قسم اولوب اصول فقہدہ بیان اولندیغی اوزره خبر متواتر قرون ثلثہدہ کذب اوزره اجماع و اتفاقلری عقلاً تجویز اولمیان روات کثیرہ ایلہ نقل و روایت بیوریلان اخبار رسول اللہ اولوب علم ضروری افادہ ایتکله نقل قرآن و اوقات خمسہدہ نماز و عدد رکعتلری و رکوع و سجدهلری و مقدار زکات کبی شرعیاتده انکاری اکفار ایجاب ایدر .

✽ خبر مشهور ✽

مسئله ۲۵ — قرن صحابہدہ خبر واحد اولوب قرن تابعینله تبع تابعینده حد تواترہ بالغ اوله رق علمای اسلامیہ طرفندن تلقی و قبول اولمقله طمانیت ظن افادہ ایدرک ایضاح الاشباہک ۱۰۰۱ مسئلہ سندہ بیان اولندیغی اوزره مؤلفه قلوبک استحقاق صدقه دن اسقاطنی افادہ ایدن (خذها من اغنیائهم و ردهافی فقرائهم) قول شریفنده اولدیغی کبی کتاب اوزرینه زیاده سی تجویز اولنوب انکاری اکفار ایجاب یلنر ایسهده موجب ضلالتدر .

✽ خبر واحد و یا آحاد ✽

قرون ثلثہدہ راویلری حد تواتر و مشهوره بالغ اولمیان خبرلر اولوب اسلام . عقل ضبط ، عدالت کبی راویلر حقنده کتاب و سنته عدم مخالفت کبی مروار حقنده لازم اولان شرطلری جامع اولورسه مجتهدین عظام ایچون مضمونیله افتا و حکم ایدرک عمل و غلبه ظنی موجب ایسهده انکاری اکفار ایجاب یلنر .

✽ اجماع امت ✽

مسئله ۲۶ — هر عصرده مجتهدین عظام حضراتنک قولاً و فعلاً و اعتقاداً بر حکم شرعی اوزرینه اتفاقلرندن عبارت اولوب عقلاً و نقلاً حجة قطعیه در . بناءً علیه مقتضاسیله عمل و اعتقاد لازم اولوب حیثیتی انکار موجب اکفارددر .

✽ قیاس فقهاء ✽

مسئله ۲۷ — قیاس لغتده مطلقاً بر شیئی دیکریله تقدیر و تطبیق معناسنه اولوب شرعده حقنده نص کتاب و یا سنت و یا اجماع وارد اولمیان بر حادثه یی

علتده اشتراک‌رینه بناءً بالاجتهاد منصوص علیه اولان حادثیه تطبیقه مقیس
علیه ثابت اولان حکم نصی مقیسده اظهاردن عبارت اوله رق حجت مظهره
ظنیله اولقله کندیسيله شبهه ایله ساقط اولان حدود شرعیه اثبات اولنه‌ماز .

❁ فقهک حکم شرعیسی ❁

مسئله ۲۸ — فرضک توقف ایتدیکی فرض واجبک توقف ایتدیکی
واجب نفلک توقف ایتدیکی نفل اوله رق مثلاً نمازه نظراً طهارت کی مکلفک
اداسيله ذمتدن واجبک اسقاطنده محتاج اولدینی بالجمله مسائل دینه‌سنی
اوکرنمک فرض عین و نصابه مالک اولمایان فقرايه مسائل زکات و حج و رجاله
مسائل حیض و نفاس کی غیر لازم اولانلری محتاج اولنلره اوکرنمک ایچون
فرض کفایه اولوب بونلردن فضل‌سنی اوکرنمسی نافله اولسیدر بناءً علیه بالجمله
مکلفلره فرض اولان نماز و اوروج و زکات و حج کی عبادت‌لرک فرض اوله رق
مختلرنده توقف ایتدکلری شروط و ارکان کی احکام لازملرینی بیلوب اوکرنلری
فرض عین اولقله نمازله مکلف اولانلره ابدست و غسل و تیمم کی لااقل برایتک
حفظی فرض عین و کاملاً فاتحه شریفه ایله برسوره و یا اوچ آیت مقدارینی حفظ
واجب اولوب زیاده‌سنی حفظ نافله اولور .

❁ فقهک نسبت فائده‌سی ❁

مسئله ۲۹ — علم فقهک اعمال ظاهریه نسبتی علم عقائدک اعتقاده و علم
ادابک اخلاقه نسبتی کی اولوب علم عقائدک تصحیح اعتقاده و علم اداب تنویر
قلوبله تهذیب اخلاقه خادم اولدکلری کی علم فقهده بالجمله افعال مکلفی احکام
شرعیلرینه توفیقله واجبک ذمت مکلفدن اسقاطنه خادم اوله رق سعادت دینه
و دنیویه‌سنی تأمینه خادمدر .

❁ فقهک فضائلی ❁

مسئله ۳۰ — هل یتوی الذین یعلمون والذین لا یعلمون (مقتضاسنجه
بالجمله علوم و فنون کندیلری ایچون قیمت تقدیری قابل اولمایان برر جوهر کران
بها اولقله هیچ برحاله بیلنلر ایله بیلیمیانلر بر اولیه‌جنی بیاندن مستغیدر زیرا

الناس من جهة التمثيل اكفاء * ابوهم ادم و امهم حواء

مفاد نجه بالجملة افراد بشریه فطرة برعائله نك افرادى و بر آغاجك میوه سی کی
یکدیگر لرینك نظیری اوله رق حسب الفطره بینلرنده هیچ بر وجهله فرق
ورجحان بولنیه رق جمله سی حقیقت واحده نك ماصدق اولوب

ما الفضل الا لاهل العلم انهم * على الهدا لمن استهدى ادلاء

مفاد نجه افراد بشر بیننده فضل و رجحان انجق کمالات ذاتیه و فضائل علمیه
و عملیه ایله تزین ذات و سنویر صفات ایدن اهل علم و عرفانه منحصر در زیر
کندیلمی کسب کمال معارف ایدرك داخل دائره رشد و هدایت و واصل زروه
سعادت اولوب کرداب جهالته گرفتار اوله رق ساحل عز و عرفانه ارشاد
طلبنده بولنلره دست گیر و رهبردر لر حالبوکه (و وزن کل امری ما کان
یحسنه . و الجاهلون لاهل العلم اعداء) مضمونجه نزد عقلا ده هر شخصك قدر
و قیمت و عزت و شرفی آنجق حائز اولدینی جوهر جلیل علم و عرفان کی
فضل و کمالیه متوازن و متناسب اولوب اشرف علوم اولان علوم دینی و کمالات
شرعیه اربابنك قدر و قیمت لریده حائز اولدقلمی سرمایه فضائلک قیمت و شرفیه
متناسب و متوازن اولسی ضروری اولمقله (المرأ عدو لما جهله) مفاد نجه کسوه
علم و عرفاندن عاری و سرمایه فضل و ایقاندن بری بولنلر جهلای بی اذعان
حلیه زیبای فضل و کمال ایله متحلی و ممتاز بولنلر اهل کماله عدو بی امانلردر
بناءً علیه هر درلو تکامل و تهاوندن اجتنابله

(ففز بعلم ولا تجهل به ابداء الناس موتا و اهل العلم احياء)

مفاد نجه مایه حیات و سرمایه سعادت اولان فضائل علمیه و کمالات عملیه و اخلاقیه
ایله تزین ذات و تهذیب اخلاق و صفات ایدوب زنهار عوام کالهوام کی حیات
علم و ادراکدن خائب و خاسر اولمقدن خلاصه چالیش زیرا

اخو العلم حی خالد بعد موته * و اوصاله تحت التراب رمیم

و ذوالجهل میت و هو ماش علی الثری * یظن من الاحیاء . و هو عديم

مفاد نجه هر نقدر ارباب علم و عرفان حیات مستعاردن تجرد و انتزاع ایدرك محفظة

جسمیه لری تحت ترابده متواری و مستور اوله رق رهین تراب و قرین خراب
اولسه بیه اثار علمیه و اعمال صالحه لری ثمره سیله الی الابد مرغ روح لری ریاض
جنانده دانه چین صفا اولوب کسوه معارفدن عاری و حلیه کلاتدن بری اولان
جهلای بی اذعان هر نقدر عالم حس و خیالده مشی و حرکتله گروه احیادن ظن
اولنسه لرده نشئه حیاتدن بریلر در .

بالخاصه فضائل فقه *

مسئله ۳۱ — هر علمك فضل و شرفی انجق موضوع و غایه سنك فضل و شرفیه
متناسب و متوازن اولوب بالجمله علوم و فنون ایچندن علوم شرعیه و علوم شرعیه
ایچندن علم توحیدله علم تفسیرك موضوع لری ذات باری و صفات مقدسه الهیه
اولدینی کی علم حدیث و سنتك موضوع لریده اشرف مخلوقات علیه اکل التحیات افندمن
حضر تیرینك اقوال و احوالی بولمنسی شرفیه مفتخر و مباهی اولمغله بالجمله علوم
و فنوندن افضل و اعلا اولوب هر نقدر علم فقهك موضوعی احكام شرعیه جهتندن
افعال ، مكلفین اولمنسی اعتباریه فنون ثلثه نك دوننده ایسه ده اساس عذیم الاندراسی
اولان ادله شرعیه استنادی و انلرك ثمره فوادی و ارسال رسل و انزال کتبك
غایه و باعث اولمنسی اعتباریه فنون سائرهدن افضل اولوب جمله سنك غایه لری حائر
سعادت عظما اولمنسی اعتباریه انلرایله متحد المال اولدینی بیاندن مستغنی اولوب
(من یردالله به خیراً یفقه فی الدین) و (یوت الحکمة من یشاء و من یوتی الحکمة فقد
اوتی خیراً کثیراً) نصوص جمیله لری و (ما عبد الله بشیئ افضل من فقه فی الدین
و لفقیه واحد اشد علی الشیطان من الف عابد و لکل شیئ عماد و عماد الدین
الفقه) آثار جمیله لری علم فقهك فضل و شرفه برهان باهر اولمغله .

تفقه فان لفقه افضل قائد * الی البر و التقوی اعدل قاصد
و کن مستفیدا کل یوم زیاده * من الفقه و اسبح فی بحور الفوائد
فان فقیها واحداً متورعا * اشد علی الشیطان من الف عابد

نشیده سیله امر تحصیلنه تشویق و ترغیب بیورلمشدر . زیرا ارسال رسل
و انزال کتبندن مقصد علم شرایع و احکامی تعلیم اولوب علم شرایع و احکام

ایسه علم فقهدن عبارتدر . بلکه (من عمل بما علم علمه الله علم ما لم يعلم)
مقتضاسنجه علم فقه بالجمله علوم و فنونك مادر حصوللریدر .

❦ فقهك موضوعيله تصویر مسائل ❦

مسئله ۳۲ — هر علمك موضوعی کنديسنده اعراض ذاتیه و احکام
اصلیهسندن بحث اولنان شیدن عبارت اولغله علم فقهك موضوعی محکوم به اولان
عبادات و معاملات و عقوبات و کفارات امثالی بالجمله افعال مکلفین اولوب
محمولیده وجوب . ندب . اباحه . حرمت . کراهت . صحت . فساد جواز
امثالی احکام شرعیهدن بریدر بناءً علیه نماز . اوروج . زکات . حج . جهاد
واجب لدر . زنا . سرقت . غصب حرام لدر . اکل . شرب مباح . بیع
واجاره جائز . بیع معدوم فاسد کی قضیهلر مسائل فقهیه دندر .

❦ مکلف ❦

مسئله ۳۳ — عاقل وبالغدر زیرا تکلیفه اهلیت ایکی قسم اولوب بری اصل
وجوبه اهلیتدر که مداری آنجق عقلدر دیکری ادای واجبه اهلیتدر که مداری
عقل ایله بلوغدر بونلردن محروم اولنلر هیچ بر شئیك ادا و اتیانیه مکلف
دکلردر . بناءً علیه علم فقهده صبی و مجنون و بهایمك افعالنندن بحث انجق ولی
وصاحبلرینه عائد اولوب شرطلرینی جامع اولان عبادتلرینك صحتی و فقعدانی
حالنده عدم صحتیه حکم ایدیلرک بحث احکامی اسبابه ربط قیلندن عقلیدر .

❦ محکوم به اوله رق کنديلرینه خطاب شارع تعلق ایدن افعال مکلف ❦

مسئله ۳۴ — اعتقادیات . اداب . عبادات . معاملات . عقوبات . کفارات
امثالی بر طاقم اقسام کلیه یه منقسم اولوب اعتقادیاتك اصول اجمالیه سی جناب الله
ملک لرنه . کتابلرنه . پیغمبرلرنه . یوم آخرته . قضا و قدره . خیر و شر جمله سی
جناب حقك مقتضای اراده سی اولوب طاعت اوزرینه تفضلا مکافات و معصیت
اوزرینه مقتضای عدلی اوله رق مجازاتله احقاق حق ایچون بعدالموت بعثتله حشر
جسمانی یه متعلق بالجمله احکام اصلیه یی قلباً تصدیق ایله لساناً آمنت بالله و ملائکتله

وكتبه ورسله واليوم الآخر وبالقدر خيره وشره من الله تعالى والبعث بعد الموت.
حق ديهرك اقراردن عبارتدر كه (لا اله الا الله) ديمك جمله سنی جامعدر.

❁ آداب ❁

مسئله ۳۵ — ادبك جمعی اوله رق متصف اولنلری موجب عیب و شین
اولان رزائلدن محافظه ایدن ملكة فضائل و مكارم اخلاقدن عبارت اوله رق
اصول اجمالیه سی حکمت . شجاعت . عفت . عدالتدن عبارت اولوب حکمت
قوة عقلیه نك . شجاعت قوة غضبیة نك عفت قوة شهوانیه نك افراطله تفريط
بیننده اوساط و فضائلندن عبارت اولوب عدالتده قوای مذکورہ نك ترتیب متوسط
اوزره وقوعلرندن عبارت اولدینی کبی ملك و ملتک محور بقا و مدار قواملری
اوله رق (بعثت لاتمم مکارم الاخلاق) مقتضاسنجه اتمامی باعث رسالتدر شو
حصال مذکورہ نك نقیضلری ایسه قوای مذکورہ نك افراطیله تفريطندن عبارت
اولان رزائلدر . بناءً علیه قوة عقلیه نك افراطی حیلہ کارلق معاسنه جریره
تفريطی بله و غباوتدر و قوة غضبیة نك افراطی تهور تفريطی جبن و قوة شهوانیه نك
افراطی شره تفريطی خمود اولوب ترتیب متوسطك افراطی بشقه لرینی الدائمق
تفريطی هر حالده کنیدیسی الدائمقندن عبارت اوله رق جمله سی خصال مذمومه
و اخلاق مردوده در . حسن اخلاق مفتاح سعادت . سوء اخلاق ایسه باعث نکبت
وداعی ندامتدر . حسن اخلاقك خلاصه سی عدل و احسان اولدینی کبی باعث
خسران و داعی ندامت و خزلان اولان سوء اخلاقك نتیجه سی ظلم و عدواندر
حالبه که (الملك یبقی بالکفر ولا یبقی بالعلم) مقتضاسنجه ظلم و عداون ملك
و ملتک مانع بقا و باعث زواللریدر .

❁ عبادات ❁

مسئله ۳۵ — عبادتک جمعی اوله رق طایمق و اطاعت و قوللق مغالرینه اولوب
اصول اجمالیه سی عبادات خالصه اصلیه ایله عبادات التزامیه اوله رق ایکی قسم
اولوب عبادات اصلیه (وما خلقت الجن والانس الا ليعبدون) مقتضاسنجه انس
و جنك سبب خلقتلری اولوب جناب حقك قوللرینه تفضلا احسان بیوردینی

نعم ظاهره و باطنه سینه قارشو شکرانه از دیاد اولمق اوزره مجرد تعبد ایچون مشروع بیوریلوب نعمت بدنیه نك شکرینی ادا ایچون نماز و اوروج کبی صرف عبادت بدنیه و نعمت مالیه نك شکرینی ادا ایچون زکات . صدقه فطر . انصیه . انفاق محارم کبی صرف عبادت مالیه و نعم بدنیه و مالیه نك اجتماع و اتفاق لرینك شکرینی انبا ایچون حج و جهاد کبی مالیه ایله بدنیه دن مرکبه اوله رق اوچ قسم اولوب عبادت التزامیه دخی شکرانه اقتدار اولمق اوزره جهت بره وصیت و وقف و اعتاق و مناکحات امثالی مجرد طاعت قصدیه ادا اولنان افعال مکلفدرکه بونلر فی الاصل تعبد ایچون مشروع بیورلمدقلرندن افعال عادیه دن اولمقله عبادته اهل اولیان غیر مسلملردن دخی وقوعلری صحیحدر .

عبادت خالصه ایسه بونلرک خلافه اوله رق کرک وجوب ادا و کرک صحت

ادالرنده اسلامیتله مشروطه در . [۱]

[۱] عبادت بدنیه دن مقصد اتعاب بدنله نفسی قهر ایدرک اوامر الهی یی قبول و نواهیدن احتراز و اجتنابه مستعد قلمقدن عبارت اولوب بدنأ بشقه لرینك اداری و یا فدییه ایله حاصل اولمیه جغندن قیاس اولان حال حیاته کرک بدنأ و کرک فدییه ایله بدلیتک عدم جوازی ایسه ده بالنفس اداسندن موته قدر عجزک بقا و استمراری شرطیه خلاف قیاس اوله رق یا لکزه هرم عزریله شیخ فانی حقنده (و علی الذین یطیقونه فدییه طعام مسکین) آیت جلیله سیله هرکون ایچون صدقه فطر مقداری بر فدییه ایله صوم رمضانک ترکی تجویز بیورلمش ایسه ده خلاف قیاس ثابت اولان حکم بشقه سینه مقیس علیه اولمیه جغندن هر مه قیاسله اعدا ساثره ایله صومده و صومه قیاسله ولو هرم ایله نماز کبی سائر عبادت بدنیه ده هیچ بر وجهله نیابت جائز دکلدر .

زکات کبی عبادت مالیه دن مقصد محتاج اولنلره معاونت اولوب بشقه لرینك ادالریله دخی حصولنه بناء تأدیه لرنده مطلقاً نیابت جائزدر .

حج کبی مالیه ایله بدنیه دن مرکبه اولنلرده مالیه اولملرینه نظراً استطاعت بدنیه دن عجز حالنده بشقه سنی بدل کوندره رک نیابتله اداری جائز ایسه ده بدنیه اولمسینه نظراً حال اقتدارنده بدلیتله حجک اداسی جائز دکلدر بناء علیه حجک فرضیتی عمری اولوب حال اقتدارده بدلیتک عدم جوازه بناء بدل ایله بعدالادا کسب حافیت ایدرک بدنأ اداسینه قادر اولدقده تکرار بالنفس اداسی لازمکاور اما بعدالموت جمله سنده فدییه ایله اسقاط واجب جائزدر .

نماز حقنده (فان لم یستطع قاعداً فعلى القفاء یومئاً ایماء فان لم یستطع فالله احق یقبول العذر منه) مقتضایه طاعت بقدر الطاقه مشروعه اولمقله ولو ایما ایله واجبک اداسندن عاجز اوله رق فوت ایدوب قضالرینه قادر اولمیه رق وفات ایدرسه اسقاط واجبله

﴿ معاملات ﴾

مسئله ۳۱ — معاملاتك اصول اجماليه سی امر معیشت و حسن معاشرتك تأمینیه هیئت اجتماعی و مقتضای مدنی بی محافظه ایدرك سعادت دینی و دینیوی بی استحصال ایچون مشروع بیوریلان معاوضات مالیه و بقای نسل ایله ابقای نوع ایچون مناکحات و محافظه حقوق ایچون مخاصمات و محاکمات امثالی برچوق افعال مکلفیندرکه ایضاح الاشباهك ۲۳۴ مسئله سنده بیان اولنان مقدارلری مجله ده مندرجدر .

﴿ عقوبات ﴾

مسئله ۳۷ — عقوباتك اصول اجماليه سی محافظه حیات ایچون قصاص و دیت و محافظه انسال و انساب ایچون حدزنا و محافظه اموال ایچون حدسرقت و محافظه عرض و ناموس ایچون حد قذف و محافظه عقول ایچون حد شرب خمر و محافظه دین ایچون حدرده و حدود و تعازیر سائره کی زجر و منع ایچون مشروع بیوریلان افعال مکلفیندرکه سیاست شرعی و مدنی جمله ننددر .

﴿ کفارات ﴾

مسئله ۳۸ — کفاراتك اصول اجماليه سی خطأ قتل و یا جرح و نقص یمین و قبل الامسال نیت ایله یکی صوم رمضان یا عذر اختیار یله نهارا بوزمق و زوجہ سنی و یا اعضای مخصوصه سنی کندیسنه مؤبد احرام اولان محارمنه بعدالتشبییه

وصیت لازم دکل ایسه ده حقوق بارینك اداسیله ذمتدن اسقاط واجیده اختیار لازم اولمقله ولو ایما ایله نمازك ادا و یا قضا سنه قادر ایکن فوت ایدوب قبل القضا وفات حالنده فدییه ایله اسقاط یرینی وصیت لازمدر .

انفاذ وصایا تجهیز و تکفین و قضای دیوندن صکره اولمقله بیان اولندیغی وجهله وصیت ایتدکده ثلث مالی کفایت ایدرسه هر واجب ایچون صدقه فطر کی برر فدییه و یریلور ثلث مالی کفایت ایلز و یا مالی یوق ایسه یر مقدار پاره استقراض اولنه رق دور طریقله اسقاطلری و بعدالاجرا صاحبنه اعاده جائزدر ثلث مالندن زیاده وصیت ایدرسه تنفیذ وارثلرك اجازه لرینه مترق قدر زیرا زیاده سی آنلرك حقیدر ثلث مالی دینله مستغرق ایسه هر قدر غرما اجازه و یرسه لر دخی قضای دین تنفیذ وصایا اوزرینه تقدیم اولنه رق حقوق عباد محافظه اولنور .

قصد مقارنت و حال احرامده ترك واجب ويا ارتكاب حرمته واقع اولان جنایت حج کي معصیتلرک محوی ویا ستری ایچون بدایة عقوبت واداء عبادت اوله رق عتق رقبه ویا متوالیا آلتش کون 'وروج و بونلردن عجز حالده آلتش فقیره اطعام طعام کي فدیة ایله مشروع بیوریلان کفارت قتل و کفارت یمین و کفارت افطار و کفارت ظهار و کفارت جنایت حج کي افعال مکلفیندرکه کفارت یمیندن بشقه لری مرتب اوله رق کفارت قتله قادر اولانه ابتدا اعتاق رقبه مؤمنه دیکر- لرنده علی الاطلاق عتق رقبه بوندن عجز حالده متوالیا آلتش کون صوم بوندن عجز حالده کفارت ظهار و افطارده اقشاملی صباحلی آلتش مسکینه اطعام طعامله فدیة کي افعال مکلفین اولوب (فکفارتہ اطعام عشرة مسا کین من اوسط ماتطمون اهلکم او کسوتهم او تحریر رقبه فن لم یجد فصیام ثلثة ايام) مقتضاسنجه کفارت یمینده اطعام طعام ویا اکسای مسا کین ویا تحریر رقبه ده مخیر اولوب بونلردن عجز حالده اوچ کون اوروجدر .

❁ امور دينيه نك مقداری ❁

مسئله ۳۹ — امدی ایضاحات واقعه دن مستفاد اولدیغی وجهله احکام شرعیه لری ادله شرعیه ایله ثابت اولان افعال مکلفین اعتقادیات. اداب . عبادات. معاملات. عقوبات. کفارات و بونلرک لوازم و فروعلری کي برطاقم اقسام عمومیه یه منقسم اولوب امام اعظم حضرتلری فقهی (معرفة النفس مالها و ما علیها) دیو تعریف بیورهرق اقسام مذکورہ نك جمله سنه تعلق ایدن علمه تشمیل ایله فقه اکبر تسمیه بیورمش ایسه ده موأخراً تعریف مذکورہ عملاً قیدینک علاوسیلہ اعتقادیاتله اداب اخراج اولنهرق آنلر ایچون مستقلاً بررفن تأسیسیله فن فقهده باشایجه موضوع بحث عبادات. معاملات. کفارات امثالی سائر افعال مکلفینه تخصیص اولنمشدر چونکه افعال مکلفینه تعلق ایدن بالجمله خطابات الهیه نك اثرلری بولنان احکام شرعیه یا تصحیح اعتقادله کسب نجات ایچون کیفیت اعتقاده ویا تصفیة قلوب و تهذیب اخلاق ایله کسب قربت ایچون کیفیت آدابه ویا اصلاح اعمال ایله ذمت مکلفدن اسقاط واجب ایچون کیفیت اعماله تعلق ایدرک جمله سی اصلاح معاش و تأمین معاده خادم اوله رق لسان حکماده حکمة عملیه تسمیه اولونوب کیفیت اعتقاده تعلق ایدن

احكامه احكام اصليه و عقايديه و كيفيت ادايه تعلق ايدنه احكام وجدانيه و اخلاقيه و كيفيت اعماله تعلق ايدنه احكام عمليه و فرعيه تسميه اوله رق احكام اصليه دن بحث ايدن علمه علم عقائد و علم توحيد و صفات و احكام وجدانيه دن بحث ايدن علمه علم اخلاق و علم آداب و تصوف و احكام عمليه دن بحث ايدن علمه ده علم فقه و علم شرايع و احكام تسميه لريله يكد يكر لرندن كسب امتياز ايدوب بالجمله ارسال رسل و انزل كتبدن مقصد الهى احقاق حقه محافظه حقوق ايچون علم شرايع و احكامى تعليم اولمغله علوم سائرهنك جمله سى علم فقهك مبادى و مقدمه سى مثابه سنده اولدينى بياندن مستغيدر .

❁ مسائل فقهيه و احكام شرعيه نك مرجعلى اعتباريله اقسامى ❁

مسئله ۴۰ — ايضاحات سابقه دن مستفاد اولدينى اوزره بالجمله مسائل فقهيه يا طاعات اوزرينه تفضلا ائابه و يا مقتضاي عادات اوله رق معصيت اوزرينه مترتب استحقاق عقاب كى صرف امر اخريه تعلق ايدرك مصالح اخرويه نك اصلاحه مؤدى اولان ايمان و اسلام و سائر اقسام عبادات كى مأمور بهلر ايله زنا و قذف و سرقت ، امثالى حقوق بارى و حقوق عبادته عدى و تجاوز كى منهى عنلره منقسمه اولوب تعلق ايدن احكام شرعيه ده وجوب . ندب . حل . حرمت كى خطابات الهيه نك اثرلى بولنان احكام تكليفه در . ويا صرف امر دنيايه تعلق ايدوب بوده يا اشخاصك تهذيب اخلاق و تصفيه قلوب و تنوير افكاريله بقالرينى تأمين كى مصالح دنويه لرينى اصلاحه مؤدى اولدينى جهتن بو قسملر حكمت عمليه نك تهذيب اخلاق قسمنه عائد اوله رق اصطلاح حكمايه تهذيب اخلاق و تصفيه قلوب تسميه اولنور ويا خود اصول ايله فروع و مالك ايله مملوك و زوجه كى برجماعتك منزل اعتباريله مصالح مشتركه لرينى اصلاحه مؤدى اولان معاملات تعلق ايدرك نوعك بقاسنى تأمين ايله عباداتله معاملات بيننده مشتركه در مناحات كى زيرا مكلفه كوره امر نكاحله اشتغالك نوافل عباداتدن اولى اولمى و (النكاح سنتى فمن رغب عن سنتى فليس من) مقتضاسنجه تركى اوزرينه اظهار تبرى ايله تهديد و اخافه بيورلمى و ايجابنه كوره فرض . واجب . سنت . مستحب . مباح . حرام . مكروه .

اولسی عبادتدن اولسنی و زوجه نك منافع بضعی بدلنده (ان تبتغوا باموالكم)
مقتضاسنجه مهر اوله رق عوض مالی اقتضاسی و ایجاب و قبول ایله منعقد
اولسی و صحتمده شهادت شهودله مشروط اولوب ایجابی حالنده تحت قضاده
داخل اولسی معاملاتدن اولسنی اقتضایدر و یاخود ۳۸ مسئلهده بیان اولنان
کفارات کی ذمت مکلفدن اسقاط واجبله ستر عیوب و محو ذنوبه تعلق ایدوب
عبادتله عقوبات بیننده مشترکه اوله رق حکمت عملیه نك تهذیب اخلاقله سیاست
مدنییه قسمنه راجعه اولور زیرا عبادت اولسی تهذیب اخلاق و عقوبت اولسی
سیاست مدنییه نك مقتضایدر و یاخود ۳۷ مسئلهده بیان اولدینی اوزره نفوس
بشریه نك حیات و انساب و اموال و اعراض و عقول و ادیاننی محافظه ایچون
حد شرعی اوله رق قصاص . دیت . حدزنا . حد سرقت . حد قذف حد
شرب خمر . حد رده دن عبارت اولان عقوبات کی تمدن اعتباریله مصالح
مشترکه لرینی اصلاحه مؤدی اوله رق حکمت عملیه نك سیاست مدنییه قسمنه
راجعه در بناءً علیه بوجه بیان ایضاحاتدن مستبان اولدینی اوزره کړ
وسائل و کړ مسائل بالجمله افعال مکلف احکام شرعییه جهتندن فقهه عائد
اوله رق علم فقهک موضوعی احکام مذکوره جهتندن افعال مکلف اولوب
محولیده احکام مذکوره دن بری اولمغله مسائل فقهیهیه تعلق ایدن علم بالجمله
مکلفینک مصالح دنیویه لريله منافع اخرویه لرینی اصلاحه مؤدی اوله رق سعادت
دینییه و دنیویه لرینی تأمین ایتدیکی جهتندن اصطلاح حکماده جمله سنه حکمت
عملیه تسمیه اولنور چونکه هدایه نك بیاننه کورد حکمت . بقدر الطاقة البشریه
نفس الامرده علی ما هی علیه اعیان وجوده نك احواله علمدن عبارت اوله رق
حکمت عملیه ونظریه اولمق اوزره ایکی قسمه منقسم اولوب مسائل مذکوره کی
مصالح دنیویه و منافع اخرویه نك اصلاحنه تعلق ایدرک سعادت دراینک تأمیننه
مؤدی اولان قسمنه حکمت عملیه تسمیه اولنه رق تهذیب اخلاق و تدبیر منزل و سیاست
مدنییه اولمق اوزره اوچ قسمه منقسم اولوب بیان اولدینی وجهله بالجمله مسائل شرعییه
مقاصد حکمییه بی محتویه اوله رق اقسام مذکورهیه راجعه اولدیغندن (یؤتی الحکمة
من یشاء و من یؤتی الحکمة فقد اوتی خیراً کثیراً) آیت جلیله سیله احکام
شرعییه بی مفید اولان علم فقهییه حکمت و خیر کثیر ایله تعبیر بیورلمشدر بناءً علیه بالجمله

مسائل شرعية مقاصد حكميه دن عبارت اولنجه فقهای اسلاميه نك حكماي اسلاميه اولدقلى بياندن مستغنى اولوب (الحكمة تزايد الشريف شرفا و ترفع المملوك مجالس الملوك) مقتضاسنجه علم فقه اهلنه دارينده باعث عزه و داعى رفعت و سعادت اولوب بالجمله ملل متمدنه نك قوانين اساسيه لرى ايسه مناحات و معاملات و عقوباته عائد اوله رق معاملات تعلق ايدن قسمنه قانون مدنى تسميه اولنور . آنك ايچون بالجمله احكام شرعيه يي محافظه ايله وظائف عبوديتنى ايفا ايدن مكلف (ان الذين قالوا ربنا الله ثم استقاموا تتنزل عليهم الملائكة الا تخافوا ولا تحزنوا و ابشروا بالجنة التى كنتم توعدون نحن اولياؤكم فى الحياة الدنيا وفى الآخرة ولكم فيها ما تشتهى انفسكم تزلنا من غفور رحيم) تبشيراتيله مبشر اولان صنوف ناجيه دندر زيرا (ربنا الله) جمله سى بالجمله اصول اعتقادياتى جامع اولوب (ثم استقاموا) جمله سى ده تعميم بعدالتخصيص اوله رق اقسام مذكور نك جمله سنه شامله در زيرا استقامت ظاهراً و باطناً بالجمله وظائف عبوديتى حقيه ادايه متواقف اولديغندن حضرت پيغمبر (شيبتي سورة هود) قوليله (فاستقم كما امرت) خطاب الهيسنه اشارت بيور مشلردر .

❁ فقهك غايه سى ❁

مسئله ۴۱ — مكلفك بالجمله افعال و اعمالنى احكام شرعيه لرينه توفيق و تطبيق ايدرك اصلاحيله ذمتدن مطلوب اولان واجبك اسقاطيله مقتضاي فضل الهى اوله رق سعادت دارينه مائل اولمسيذر . زيرا (انا عرضنا الامانة على السموات والارض) مقتضاسنجه بالجمله تكاليف الهيه ذمت مكلفده ادا لرى مطلوب اولان امانت الهيه اولوب (ان الله ياءمركم ان تؤدوا الامانات الى اهلها) مقتضاسنجه بوجه مطلوب الهى امانتى اهلنه ادا ايسه عقلا و نقلا واجب اولمقله ۳۱ مسئله ده اشارت اولنديغى اوزره ارسال رسل و انزال كتبدن حكمت الهيه بين العباد احقاق حقه اسقاط واجب ايچون اسباب سعادتدن بولنان احكام فقهيه يي تعليمدر .

❁ حقيقت فقه ❁

مسئله ۴۲ — فقه لغته علم بابندن مطلقاً فهم ايدوب بيلمك معناسنه

و حسن بایندن فقاہت فقیہ اولق معناسنه احکام شرعیہ عملیہ بیلمکدر و فتح بایندن فهم وادرا کده بشقہ لرینی سبقت معناسنده استعمالیده مرویدر. اصطلاح شرعده فقہایه کوره کرک دلائلی و کرک بلا ادله لا اقل اوچ مسئله عملیہ بی حفظدن و صوفیہ کوره علم ایله عمل بیتی جمع یعنی مقتضای علمیه عملدن و علمای اصوله کوره ادله تفصیایه سندن مکتسب اولان احکام شرعیہ عملیہ بیلمکدن عبارتدر بناءً علیه فقہایه کوره فقیه لا اقل اوچ مسئله فقیه بی حفظایدن صوفیہ کوره مقتضای علمیه عامل اولان و اصولیونه کوره ادله شرعیه سندن احکام شرعیه بی استنباطه قادر اولان مجتهدین عظامدر .

❁ ثمره خلاف ❁

فقہایه برشی وقف ویا وصیت صورتلرنده ظاهر اولوب فقہایه کوره لا اقل اوچ مسئله بی حفظ ایدن صوفیہ کوره مقتضای علمیه عامل اولان اصولیونه کوره مجتهدین عظام حضراتی مستحق اولورلر .

❁ تلمیه ❁

مسئله ۴۳ — قانون ادب مقتضاسنجه معرفی بیلمک تعریفی بیلمک و تعریفی بیلمکده مرکب اولدینی قیود تعریفدن مقصدی بیلمک متوقف اولغله اصولیونه کوره حقیقت فقهی بیلمک اجزای تعریفدن بولنان ادله. تفصیلیه. اکتساب. احکام. شرعیه. عملیه قیدلرندن مقصدی بیلمک ایجاب ایدر .

❁ ادله ❁

مسئله ۴۴ — ادله دلیلیک جمعی اوله رق لغتده ارشاد ویول کوسترن معناسنه اولوب اصطلاحده (مایمکن لنوصل بصحیح'النظرفیه' [۱] اونی احواله الی مطلوب [۱] نظر. ترتیب امور معالومه للتأدی الی المجهول) دیو تعریف اولنوب امور معلومه ایله مقصد اثباتی مطلوب اولان مسئله نك موضوعیه محموانی مشتمل اولان قضیه لر اولوب صحیله مقصده. مثلاً شکل اولدن ترتیب اولنان دلیلیک صغراسی موجبیه و کبراسی کلیه وحدانوسطک مکرر اولسی کبی شرائط انتاجی جامع اولمسیدر . مثلاً نماز ویا زکات ویا صوم ویا حج واجبدر مسئله سنی اثباته توصل قصد اولندقدہ زیرا نماز ویا زکات ویا صوم ویا حج مأمور شارعدر وهر مأمور شارع واجبدر کبی که (تکرر ایدن مأمور شارعلر حد اوسط اولوب انلر ترک اولندقدہ) اوله ایسه نماز ویا زکات واجبدر دیمک لازمکدر که اثباتی مطلوب اولان مسئله نك عینی اولوب مطلوب خبری دینور .

(۱) خبری (دیو تعریف اولنور که کندوسنه ویا اثبات مطلوبده مدخلی بولنان احوالنه نظر صحیح ایله مطلوب خبرییه توصل ممکن اولان شی دیمک اوله رق دلیل مفرد و مرکبه شامل اولوب بومقامده ولو برحرف اولسون کتاب و سنت و اجماع متله قیاس فقها دن عبارت اوله رق توصل بولنان مطلوب خبری ده اثباتی مطلوب اولان مسائل شرعیه در که انلرده مثلاً نماز ، زکات ، صوم ، حج ، جهاد و اجبلردر سرقت ، زنا حراملردر ، اکل ، شرب مباحدر ، بیع و شری و ایجار و استیجار کی معاملات مشروعه صحیح و یا غیر صحیح و نافذ و یا غیر نافذدر گی موضوعلری افعال مکلف و محموللری احکام شرعیه دن بری بولنان قضیه لردر .

تذییه

مسئله ۴۵ — دلیل منطقی لا اقل ایکی مقدمه دن مرکب اولوب دلیل شرعی ایسه بیان اولندیغی وجهله مرکب اولدیغی کی ولو برحرف اولسون باعتبارالوضع خاص و عام و باعتبار الوقوف ظاهر و خفی و نص و مأول و مفسر و محمل و باعتبار الافاده بالعباده و بالاشاره و بالاقتضاء و بالدلاله و باعتبار الاستعمال حقیقه و مجاز و کنایه اولسی کی ادله شرعیه نك احکام شرعیه یی اثبات و افاده سنده مدخلی بولنان احوالنه نظر ایله مطلوب خبرییه توصل ممکن اولور مثلاً نکاح صحیحك

(۱) مطلوب خبری ایجاب ویا سلبله برحکمی مشتمل اولان جمله لر اولوب صدق و کذبیه احتمالی اعتباریله خبر و بر حکم افاده سی اعتباریله اخبار . دلیل ایله اثباتی مطلوب اولسی اعتباریله مطلوب دلیلدن جزؤ اولسی اعتباریله مقدمه مطلوبك موضعی بولنان حد اصفری اشمالی حسبیه صفری و محولی بولنان حد اکبری اشمالی حسبیه کبری و دلیل اوزرینه ترتیب اولسی اعتباریله نتیجه . علمد سوال اولنوب افاده برهاله اثبات اولنسی اعتباریله مسئله . صحت و ثبوتی ادعا اولنسی اعتباریله مدعا تسمیه اولنور رق جمله سی ذاتاً متحد و لوب اعتباراً مختلفه اولمغه الفاظ مترادفه قیبلنددر .

دلیل ایله اثباتی مطلوب اولان مطالب اوج قسم اولوب (۱) یالکیز دلیل نقلی ایله اثبات اولنوب سمعیات دینور لمحوال آخرت و حشر جسمانی کی (۲) یالکیز دلیل عقلی ایله اثبات اولنور ثبوت شرعك توقف ایلدیکی شیلردن وجود باری وقادر مختار اولسی و اثبات شریعت کی زیرا بونلری دلیل نقلی ایله اثبات دور و تسلسلی مستلزم اولمقله انجق ادله عقلیه ایله اثبات اولنور . (۳) حدوث عالم و توحید باری کی ثبوت شرعك توقف ایلدیکی شیلر اولوب هم ادله عقلیه و همده نقلیه ایله اثبات اولنور تفصیلاتی کنز العقائد و مفتاح العقائد نام آر عاجزیده در .

مهری استلزامی (واحد لکم ماوراء ذلکم ان تبغوا باموالکم) ایت جایله سندہ
 با ایله اثبات توصل کی زیرا (با) متعلقنک مدخولنه الصاق واصلانی افاده به موضوع
 اولوب بومقامده متعلق بولنان ابتغا یعنی عقد صحیحک مدخولی بولنان امواله یعنی
 مهره الصاق واصلانی افاده ایدوب نظمک خاص قسمندن اوله رق مدلولینک قطعاً
 وقوعی افاده ایتکله عقد صحیحک قطعاً مهری ایجاب و اقتضا ایدرک حین عقدده
 مهر تسمیه اولنورسه قبل الدخول مفارقتله مسمانک نصفی وبعد الدخول
 مفارقتله تمامی و اگر تسمیه اولنماش ایسه قبل الدخول مفارقتله بر چارشاف
 و بر باش اورتوسیله بر کوملاکدن عبارت اولان مهر متعه وبعد الدخول مفارقتله
 تماماً مهر مثلی ایجاب ایدرک عقد صحیحک مهردن انفکاکنک امتناعی افاده
 ایدر. و کذا اثبات واجبه نظراً (عالم) دلیل مفرد اولوب حدوث و امکان کی
 حالنه نظر ایله اثبات واجبه توصل اولنور. زیرا عالم حادث و ممکن اولوب
 هر حادث ایچون بر محدث خالق و هر ممکن ایچون بر موجد مرجح لازمدر.
 مسئله ۲۶ — تفصیلیه قیدیله مقصد مثلاً وجوب صلاته نظراً (اقیموا الصلاة)
 و وجوب زکاته نظراً (اتوا الزکوه) و صومه نظراً (فمن شهد منکم الشهر فليصمه)
 کی معین اوله رق وارد اولان خطابات الهیه در بناءً علیه تفصیلیه قیدیله فقهک
 تعریفندن مقلدک احکام مذکوریه علمی خارج اوله رق علمنه فقه و کندینه فقیه
 اطلاق اولنماز زیرا مقلدک علمی اقوال مجتهددن مکتسب اولوب اقوال مجتهد
 ایسه ادله شرعیهدن دکلدر.

ا کتساب اجتهاد معناسنه اولمقله احکام مذکوریه علم باری و علم ملائکه
 و علم رسولده خارجلدر زیرا انلرک علملری ا کتساب و اجتهاد طریقله اولیوب
 بلکه مقتضای ذات باری اوله رق ضروریدر.

رسول اکرم افندمزک اجتهادی اولان علمنه فقه اطلاقده اختلاف اولنش
 ایسه ده ظاهر اولان احکام مذکوریه دلیل اولمسنه نظراً خارج اولوب دلیل
 شرعیدن ا کتسابنه نظراً داخل اولسیدر.

احکامه علم قیدیله ذوات و صفات و افعاله علم و احکامی شرعیه قیدیله العالم
 حادث کی احکام عقلیه و الشمس مشرقه و النار محرقه کی احکام حسیه و الفاعل
 مرفوع و المفعول منصوب کی احکام صنعیه عامر و عملیه قیدیله الاجماع

حجة قطعية والقياس حجة ظنية کي احکام نظريه لره علملرده خارج قاله رق هيچ برينه فقه وعالملرينه فقيه اطلاق اولتماز .

احکام

مسئله ۴۷ — احکام برشی اوزرينه ترتب ایدن اثر معناسنه حکمک جمعی اولوب بومقامده حکم ایچون برحاکم وبر محکوم به وبرده محکوم علیه لازم اولوب حاکم جناب الله و محکوم به بروجه بیان فقهک موضوعی بولن ان بالجمله افعال مکلف اولوب محکوم علیهده افعاله خطاب الهی تعلق ایدن بالجمله مکلفیندر .

مسئله ۴۸ — حکم عنده الشافعی خطاب الله تعالی المتعلق بافعال المكلفين یعنی افعال مکلفه تعلق ایدن خطاب الهی دن عبارت اوله رق اثری ایجاب و تحريم و اباحه اولوب عند الحنفی) اثر خطاب الله تعالی المتعلق بافعال المكلفين بالاقتضاء اوالتخیر اوالوضع (دیو تعریف اولنورکه واجباتده بالاقتضاء و مندوباده بالتخیر و احکام وضعیهده بالوضع افعال مکلفه تعلق ایدن خطاب الهی اثری اوله رف تکلیفی و وضعی اولق اوزره ایکی قسمدر . احکام تکلیفه یا فعل مکلفک وصفی اولور وجوب . ندب . اباحه . حرمت کراهت کبی زیرا بونلر نماز و اوروج و زکات و سرقت و زنا امثالی افعال مکلفک و صفیری اولوب اقیموا الصلاة و فليصمه واتوا الزكوة والسارق والسارقة فاقطعوا ايديهما ولا تقربوا الزنا کبی تعلق ایدن خطابات الهیهنک اثرلیدر .

و یا فعل مکلفک اثری اولوب فعل مکلف اولان بیع و شرانک اثری بوانان ملک رقبه و نکاحک اثری اولان ملک متعه و اجارهنک اثری اولان ملک منفعت و طلاقک اثری اولان قیدنکاهک و عتقک اثری اولان قید رقیته زواللری کبی که اختصاصات شرعیه دینوب سبیلریده بیع و نکاح و طلاق و عتاق و ایجار امثالی افعال مکلفدن عقود و فسخ امثالی تصرفات شرعیهدر .

مسئله ۴۹ — فعل مکلفک وصفی اولان احکام شرعیهده یا اولاً وبالذات صحت عبادتک مفهومنده معتبر اولان واجبک سقوطیه ذمت مکلفک خلاص و تفریغی کبی دنیاده حاصل اولان مقاصد دنیویه قصد اولنوب قصد مذکور اعتباریه

فعل مکلف صحیح و یا باطل و جائز و یا فاسد و منعقد و یا غیر منعقد و نافذ و یا موقوف و لازم و یا غیر لازم اولمسی کی اقسامه منقسم اولور زیرا عبادتدن مقصد دنیوی شرطلرینک استجماعیه صحیح اوله رق اداسیله ذمه مکلفدن واجب اولان مطلوبک سقوطیه ذمت مکلفک فراغ و سلامتی اولدینی کی معاملاتدن مقصد دنیویده انفابیان اولدینی اوزره صحیح و نافذ و لازم اوله رق فعل مکلف اولان بیع اوزرینه ملک متعه و طلاق اوزرینه قید نکاهک ازاله سی و عتاق اوزرینه قید رقیتهک ازاله سنبت ترتبی امثالی عقود و فسخ کی تصرفات شرعیهنک اثرلری بولان اختصاصات شرعیهردر و یا خود 'ولا وبالذات' مفهوم وجوبده معتبر اولان فعل مکلف اوزرینه مقتضای نیت اوله رق بفضل ترتب ایدن ثواب و مقتضای عدلی اوله رق ترکی اوزرینه ترتب ایدن استحقاق عذاب کی مقاصد اخرویه قصد اولوب قصد مذکور اعتباریله ده فعل مکلف ایکی قسم اولوب بری اعدار عباد اوزرینه مبتنی اولیه رق ابتداء مشروع بیو یلان احکام شریعه اولوب عزیمت دینور حال اقامه ده صلات ظهر و عصر و عشانک دردر رکعت اوله رق فرض بیورلمسی و حال صحت و اقامه ده ادای صوم رمضانک وجوبی و ابدستده بلا عذر چه لاق ایاقلری غسلک فرض اولمسی کی .

دیگری خرج عذرینه بناء تخفیف و تسهیل ایچون حال سفرده عند الشافعی قصر صلات (عند الحنفی عزیمت معنانه رخصت اسقاط اوله رق اکمال ایدلمز) و وقت صحت و اقامته قضا ایلمک اوزره حال مرض و حال سفرده ترك ادای صوم رمضان و شرائط صحتی جامع مستلر اوزرینه مسح و صوی استعمالدن عجز حالنده ابدست و غسل بدلنده تیمم کی اعدار عباد اوزرینه مبتنی اوله رق ثانیاً مشروع بیوریلان احکام رخصت شرعیهردر .

❦ اقسام عزیمت

مسئله ۵۰ — میزاندن نقلاً تلویحک بیاننه کوره اعدار عباد اوزرینه مبتنی اولیه رق ابتداء مشروع بیوریلان افعال مکلف مأموربه و منهی عنه و مباح اوله رق اوچ قسم اولوب مأموربه فرض . واجب . نافله اوله رق اوچ قسم اولدینی کی منهی عنه ده . حرام و یا تحریم و یا تنزیها مکروه اوله رق اوچر قسملردر زیرا فعل مکلفک اتیان و اداسی مطلوب و ترکی منهی و ممنوع اولوبده طلب و منع دلالة و ثبوت

دلیل قطعی (۱) ایله ثابت ایسه اتیان واداسی فرض ترکی حرام اولوب فرضک بری فرض عین دیکری فرض کفایه اوله رق ایکی قسم اولوب فرض عین ایمان و بش وقت نماز و ادای صوم رمضان و زکات و حج کبی مکلفلردن بعضیلرک ادالریله دیکرلرندن ساقط اولماز دیکری جنازه نمازی و جهاد کبی فرض کفایه اولوب مکلف اولنلردن بعضیلرینک ادالریله مقصد حاصل اوله رق دیکرلرندن ساقط اولور مثلاً جنازه نمازندن مقصد مغفرتله جنازه دعا و جهاددن مقصد اعدانک شرعی دفع ایله اعزاز دین اولوب مکلف اولنلردن بعضیلرک ادالریله مقصد حاصل اولدقدی دیکرلرندن ساقط اولور .

فعل مذکورک اداسنی طلب و ترکندن منع یالکیز دلالة ویا ثبوتاً دلیل ظنی ایله ثابت اولورسه اتیان واداسی واجب ترکی تحریماً مکروهدر واجب دخی واجب لعینه واجب لغیره اوله رق ایکی قسم اولوب واجب لعینه صدقه فطر و عندالامام اضحیه و صلات عیدین کبی ایجاب باریه واجب اولان افعال مکلف اولوب واجب لغیره مندوراتله مشروع فیهلر کبی ایجاب عبد ایله واجب اولانلردر. فعل مذکورک ترکی ممنوع اوله رق اتیان واداسی مطلوب اولورسه سنت و مندوبه شامل اوله رق نافلهدر .

سنت ۲۴ مسئلهده بیان اولندیغی اوزره قولاً ویا فعلاً ویا تقریراً حضرت پیغمبردن صادر اولان شیر اولوب سنت هدی. سنت زائده اوله رق ایکی قسمدر. سنت هدی فرضلردن اول و صکره جابر نقصان اوله رق مشروع بیوریلان، نمازلر و جماعت و ازار و اقامه کبی عباداتدن اولوب بلاعذر ترکی اسائت اقتضا ایدر. سنت زائده قیام و قعود و لباس امثالی عادات و سیر حضرت پیغمبریدن عبارت اولوب ترکی اسائت اقتضا ایلز ایسه ده امثالاً اداسی اثابه اقتضا ایدر. سنت هدا دخی مؤکده و غیر مؤکده و راتبه و غیر راتبه کبی قسملره منقسمدر .

فرض واجب بعضاً مترادف اوله رق استعمال اولندقلری کبی نفلهده بعضاً واجب مقابلی اوله رق استعمال اولنوب قبل الفجر و قبل الظهر و بعدالظهر

(۱) دلیلک ثبوتاً قطعی متواتر اولسی وظنی غیر متواتر اولسیلهدر. دلالة قطعی دخی ظاهر. نص. مفسر. محکوم اولسیله ظنی ایسه بونلرک خلافت اولسیلهدر (بناء علیه) (و امسحوا برؤوسکم) مطابق مسنده دلالة و ثبوتاً قطعی اوله رق فرض ایسه ده تعیین مقدار ایله محله. ماول اوله رق ظنی اولقله تعینلری واجبدر)

و بعد المغرب و بعد العشاء و بعد الجمعة قلنان صلات مسنونہ ایلہ تراویح کی سنن مؤکدہ لرایلہ و قبل العصر و قبل العشاء قلنان دردر رکعت سنت مستحبہ لروہ شامل اولوب بو سنت مستحبہ نك هر ايكي ركعتی بر نماز اولمغله هر قعدہ لری قعدہ اخیره اوله رق بعد التشهد صلات شریفه و برنجی قعدہ دن قیامده سبحانك و اعوذ بسمله و ضم سورہ ایدیلوب سنن مذکورہ نك جمله سنه سنن رواتب دینور .

❁ منہی عنہ ❁

مسئله ۵۱ — منہی عنہ ترکی مطلوب اتیانی ممنوع اولان افعال مکلف اولوب طلب و منعی دلالة و ثبوتاً دلیل قطعی ایلہ ثابت ایسه ترکی فرض و اتیانی حرام اولوب دلالة و یا ثبوتاً ظنی ایسه ترکی واجب و اتیانی تحریماً و دلالة و ثبوتاً ظنی ایسه ترکی مندوب و اتیانی تنزیهاً مکروه اولوب حرام دخی حرام لعینه و حرام لغیره اوله رق ایکی قسم اولوب اکل خنزیر و میتہ و شرب خمر کی منشأ حرمت عین حرام ایسه حرام لعینه و بشقه نك مالنی تناول و اتلاف و سرقت و غصب کی منشأ حرمت غیری ایسه حرام لغیره در . زیرا اولکیلرده منشأ حرمت بین خنزیر و میتہ و خمر اولوب ایکنجیلرده ایسه غیرك حق تعلق ایلمسیدر . آنك ایچون صاحبك اباحه سیله مباح و احلالیلہ حلال اولور . اثنای تقسیمده اشارت اولندیغی اوزره فرضك اتیانی و حرامك ترکی فرض و بالعکس حرام . واجبك اتیانی و تحریماً مکروهك ترکی واجب و بالعکس تحریماً مکروه اولوب مستحبك اتیانی و تنزیهاً مکروهك ترکی مستحب و بالعکس تنزیهاً مکروه در .

کندی ملکنده تصرف کی فعل مکلفك اتیان و ترکنه طلب و منع تعلق ایلز ایسه مباح اولمقله فعل و ترکی مساویدر . بناءً علیه ۳۳ م. مثله ده بیان اولندیغی اوزره بهایم و مجانین کی غیر مخاطبلك افعالی اقسام مذکورہ دن خارجلر در . فرضلر ایلہ حراملر دلیل قطعی ایلہ ثابت اولدقلرندن انکارلری اکفار ایجاب ایدوب فرضك اتیانی و حرامك ترکی علماً و عملاً فرض اولمقله باعث اثابه و عکسلری فسق اوله رق داعی عذابدر .

بناءً علیه بالجملة افعال مکلف فرض و یا واجب و یا نافله و یا مباح و یا حرام

ويا تحريماً ويا تنزيهاً مكروه اوله رق يدي قسمه منقسم اولديغي كې تعلق ايدن خطاب الهينك اثرى اوله رق صفتلى بولنان احكام تكليفه ده فرضيت . وجوب .. نفل . اباحه . حرمت تحريماً . تنزيهاً كراهت اوله رق يدي قسمدر . عندالحنفى نذر كې عبادته شروعه اسباب ايجابدن اولمله نافله اوله رق شروع اولنان عبادتك اتمامى واجب اولوب افسادى حالنده اعاده و قضاسى لازمدر . زيرا (ولا تبطلوا اعمالكم) مقتضاسنجه ابطال عمل منهى عنه اوله رق حرام اولوب حرامى ترك ايسه واجب اولمله ادا اولنان مقدارى ابطالدن محافظه واجب اولوب بو ايسه باقى قالانى اتمامله حاصل اوله جغندن شروع اولنان نوافلك اتمام اداسى واجب اولديغي بياندن مستغنىدر . امام شافعى حضرتلى بلا لزوم شروع اولنديغندن حال ابتداسى اوزره ابقا اولنور ديه رك نافله اوله رق اتمامه قائل اولمله بعدالشروع تركى حلال اولوب افسادى حالنده اعاده سى لازم دكلدر .

❁ احكام وضعيه ❁

مسئله ۵۲ — احكام وضعيه بر شى ديكر بر شيئك ركنى ويا علتى ويا سببى ويا شرطى ويا علامتى اولمسيه حكم كې بر شيئك حكم تكليفى به تعلقيه وارد اولان خطاب الهينك اثرى اولوب تعلق ايدن شى مثلاً تحت ايمانه نظراً تصديق واقرار و نمازه نظراً قيام و قرائت كې حكم تكليفيه داخل ايسه ركن و خارج اولوبده لزوم قصاصه نظراً عمداً قتل و ملك رقبه به نظراً بيع كې حكم مذكوره مؤثر ايسه علت و مؤثر اوليوبده ملك متعه به نظراً شرى و وجوب ايمانه نظراً حدوث عالم و نمازه نظراً وقت و زكاته نظراً ملك نصاب و صومه نظراً شهود شهر كې فى الجملة موصل ايسه سبب و موصله اوليوب بلكه تحت صلاته نظراً حدثن و نجاستدن طهارت كې موقوف عليه ايسه شرط و موقوف عايده اوليوب بلكه تكثيرات انتقاليه كې وجودنه دلالت ايدرسه علامتدر چونكه احكام شرعيه وجوب جهتندن عالمه و افضا جهتندن اسبابه و وجود جهتندن شروطه و موقوف جهتندن علامته تعلق ايدركه احكام مذكوره دن هر بريسنه مخصوص اولان اباحت لازمه اصول فقهد مذكوره در .

محکوم به

مسئله ۵۳ — کندیسنه خطاب الهی تعلق ایدرک محکوم به اولان افعال مکلف درت قسم اولوب (۱) منافع عامه یی اخلال و افساددن محافظه ایچون اتیانندن منع بیوریلوب صرف حق باریدر حرمت زنا کی زیرا محافظه انساب و انسال ایچون زنادن منع ایله حرمتک نفی عمومه عائد اوله رق حقوق باریدن اولدیغدن هیچ برکیمسه نک اباحه سیله مباح و احلالیله حلال اوله ماز (ولله مافی السماوات والارض) مقتضاسنجه جناب حق مالک الملك اوله رق جمله کائنات خلق و ایجاد جهتندن کندی ملکی اولوب انتفاع و تضرردن منزه اولدیغی حالده حرمت مذکورہ یی حق باریدر دیهرک تخصیصک سببی حرمت زنانک عندالله عظمت و خطرنی انبا و اظهاردر انک ایچون رجم و جلده کی حد زنا حدود سائرہ دن اشددر زیرا فعل ایله جزا بیننده مناسبت مقتضای عقل و حکمتدر .

مسئله ۵۴ — (۲) منفعت خاصه یه تعلق ایدرک صرف حق عبدر غیرک مالی تناول و اتلافک حرمتی گبی که صرف منفعت مالک تعلق ایتدیکنندن صاحبک اباحه سیله مباح و احلالیله حلال اولور .

مسئله ۵۵ — (۳) حق باریله حق عبد اجتماع ایدوب حق باری غالبدر خفیلره گوره حرمت قذف کی که جزاسی بولنان حد قذف مقدوفه دن عار زنایی ازاله ایچون مشروع بیورلمسی حق عبد اولدیغی و مناهیدن زجر ایله عالمی افساددن محافظه ایچون عقوبت اوله رق مشروع بیورلمسی حق باری اولدیغی افاده ایدر زیرا بالعموم حدود و زواجر عالمی افساددن محافظه ایچون مشروع بیورلمقله حق باریدر لکن عندالحنفی حق باری غالب اولدیغدن بعداثبوت مقدوفه نک ابرا و عفوی و تقادم زمانله حد شرعی ساقط اولماز و مال اوزره صلح جریان ایلز و مقدوفه طرفندن استیفا اولماز زیرا حقوق بارینک استیفاسی خلیفه و نائبی بولنان حکومتیه مەصوردر ائمه ثلاثه عندنده حق عبد غالبدر (۴) حق باریله حق عبد اجتماع ایدوب حق عبد غالب اولاندر بالاتفاق حرمت قتل و حق قصاص کی انک ایچون ایضاح الاشباهک ۳۵۸۳ مسئله سنده بیان اولدیغی اوزره (ادرؤا الحدود بالشبهات ما استطعتم) مقتضاسنجه جزاسی بولنان قصاص

حدود خالصه کبی شبهه ایله ساقط اولوب وقایه حیاته عالمی افساددن محافظه ایچون زجر و عقوبت اوله رق مشروع بیورلمسی حق باری اولدیغنه و جنايتك نفس عبد اوزرینه وارد اولمسی حق عبد بولندیغنه دلالت ایدوب لکن (ولکم فی القصاص حیوة) مقتضاسیجه حق عبد غالب اولدیغدن و لیسنک استیفاسی جائز اولوب ارث جریان ایدر و بالاجماع عبدك عفویله ساقط اولوب دیت کبی عوض مالیده صحیح اولور زیرا نفس عبده جناب حق ایچون حق استبعاد بولندیغی کبی عبد ایچونده حق استمتاع بولمغله قصاصك مشروعیتیله هرایکی حق استیفا اوله رق عالم افساددن محافظه اولنور.

❦ صرف حق باری تعلق ایدن افعال مکلف ❦

مسئله ۵۶ — حقوق مذکوردهن صرف حق باری تعلق ایدن افعال مکلف سکیز قسم اولوب خلاصه سی (۱) عبادت خالصه در ایمان و فروع ایمان کبی (۲) عقوبات خالصه در حدود مذکوره کبی (۳) عقوبت قاصره در حرمان ارث کبی (۴) عقوبتله عبات بیتنده دائره در کفارات کبی (۵) مؤنت معناسی بولنان عبادتدر صدقه فطر کبی (۶) عبادت معناسی بولنان مؤنتدر عشر کبی (۷) شبهه عقوبت معناسی بولنان مؤنتدر خراج کبی (۸) بنفسها قائم اولان حق باریدر خمس غنائم و معادن ارض گبی که ایضاحی بوجه اتیدر .

❦ افعال مذکوردهن عبادت خالصه ❦

مسئله ۵۷ — عبادات خالصه در ایمان اصل اولوب عبادات عملیه انک فرعلریدر زیرا بلا ایمان هیچ بر عبادت صحیحه اولیوب بالعکس صحیحدر اصل اولان ایمان ایله فرع بولنان عباداتده اصل ولواحق و زوائد اوله رق اوچر درجه واردر ایمانك اصلی تصدیق قلبی اولوب بروجهله سقوطی قابل دکلدر اقرار احکام شرعیه دنیویه نك اجراسنه علامت اولمق اوزره دلیلی اوله رق لاحق اولوب دلسزده اولدیغی کبی تعذر و اکراه واجبارده اولدیغی کبی تعسر عذرلریله سقوطی قابل اولوب مرة بعد اخری تکراری و فروع اعمال مکملات اوله رق زوائدندر .

مسئله ۵۸ — فروع ایمان اولان اعمال عبادتده اصل اولان نماز اولوب دیکرلری انک لواحقیدر زیرا نماز معراج مؤمنین و بارگاه الوهیتده مناجات جناب رب العالمین اولمقله بعدالایمان افضل فرائض اولوب (الصلوة عمادالدين فمن اقامها فقد اقام الدين ومن ترکها فقد هدم الدين) مقتضاسنجه دینک دیره کیدر . نماز اعمال جوارح و افعال قلوبی مشتمل اوله رق نعم ظاهره و باطنه نك شکرنی ایفالیچون مشروع قلوب لیکن نظرگاه الهی اولان بیت معظمی استقبال واسطه سیله قربت اولوب ایمان ایسه بلا واسطه قربت اصلیه اولمقله ایمان اصل نماز انک فرعیدر .

❁ زکات ❁

مسئله ۵۹ — دنیا نعمتی نعمت بدن و نعمت مال اولوب نماز نعمت بدنک و زکات نعمت مالک شکرینی ادا ایچون مشروع بیوریلوب مال ایسه نعمت بدنی محافظه ایچون یرادلقله انک خادمی اوله جغندن نماز اصل زکات انک تالی و فرعیدر . (اقيموا الصلوة و اتوا الزکوة) کبی ۳۲ قدر آیت جلیله و (بنی اسلام علی خمس شهادت الا اله الا الله و اقام الصلوة و ایتا الزکوة) مثللو احادیث شریفهده زکاتک صلاتی تعقیب و توالیسیده حکم مذکور مؤیددر .

❁ صوم ❁

مسئله ۶۰ — هر نقدر صومده نماز کبی صرف عبادت بدنیهدن ایسهده لیکن قربت و عبادت اولمسی قهر نفس واسطه سیله ریاضت اوله رق مشروع بیوریلوب نفسک مقتضاسی بولنان شهوات ایسه صفت قبح اولغله سببک قبحنه بنأصوم ذکاتک دوننده اوله رق زکات اصل صوم انک فرعی مثابه سندهدر انک ایچون حدیث شریف مذکورده ارکان عملیه نك اوچنجیسی اوله رق زکاتدن صکره مذکوردر عبادت مالیه عبدک عبودیتنده صداقتی انبا و اشعار ایتدیکی ایچون (انما الصدقات للفقراء) ایت جلیله سنده عبادت مالیهدن صدقه ایله تعبیر اولنمشدر .

❁ حج ❁

مسئله ۶۱ — حج زمان مخصوصده مکان مخصوصی فعل مخصوصه زیارت

مخصوصه دن عبارت اوله رق عبادت بدنيه ايله عبادت ماليه دن مركب اوله رق قربت و عبادت ايسه ده ليكن عبادت اولمسی وطنندن دور وعائله واحباسندن مهجور اوله رق قوت نفسی كسر واسطه سييله عبادت اولمقله صومه وسيله قبيانندن اوله رق صوم اصل اولوب حج انك فرعى مشابه سنده در.

مسئله ۶۲ — حجه زمان مخصوص . طوافه كوره عيد اضحانك طلوع فجرندن اخر عمره قدر اولوب وقوفه كوره يوم عرفه نك زوالندن يوم نحر ك طلوع فجر نه قدر اولان زماندر .

مكان مخصوص طوافه كوره بيت معظم اولوب وقوفه كوره جبل عرفاتدر . فعل مخصوص طوافه وقوف اوزرينه مقدم اوله ق حج نيتيله ميقاتلرك برندن احرامدر .

زيارت مخصوصه دخي بيت معظمي طوافه عرفاتده وقفدر .

مسئله ۶۳ — صلات . زكات . صوم . حج فرض عين اولوب جهاد فرض كفايه اوله رق جهاد سنك دوننده اولمقله انلرك فرعى مشابه سنده در بناء عليه حج صومك وصوم زكاتك وزكاتده نمازك وجهاد جهاد سنك لواحق اوله رق صلات اصل بونلر لواحق اولوب سنن رواتبده نمازك زوائنددر زيرا (ان النوافل جواهر الفرائض) مقتضاسنجه نوافل مذ كوره فرضلري مكمل اوله رق مشروع بيورلمقله فرضلرك اوزرينه زائده لدر .

مسئله ۶۴ — حقوق باريدن ايكنجيسى صدقه فطر كي كندوسنده مؤنت بولنان عبادتدر زيرا صدقه اوله رق صوم ايچون طهره اولمسی واجبابنده غنانك ومحتمند نيتك شرط اولمسی عبادت اولمسی وبشتلرينك رأسلري سبيله واجبه اولمسی وكندوسنده مؤنت وكلفت بولمسی مؤنت اولمسی ايجاب ايتمكله عبادت ماليه ده شرط اولان عقل وبلوغ كي اهميت كامله شرط اوله رق مؤنت جاني ترجيح اوله رق زنكین اولان صبيان ومجانين كي شبر مكلفلرك ماللرنده فطره قدرت ممكنه ايله واجبه اوله رق شيخين حضراتنه كوره ولي ووصيلري طرفندن ادا ايديلوب امام محمد عندنده عبادت معناسی راجح اولوب بونلر ايسه عبادتله مكلف ومخاطب اولمقدقندن قياسله عمل ايدمرك عدم لزومنه قائلدر .

مسئله ۶۵ - ۳ کندوسنده عبادت معناسی بولنان مؤنتدر عشر (۱) کبی
زیرا عشر اعدانک تسلطنی دفع ایدن غزاة مسلمین ایله (انکم لتنصرون ب) (عاء)
ضعفائکم) مقتضاسنجه نصرت و مظفریتله دعا ایدن ضعفای مسلمینه صرف
اولنه رق حفظ اراضی به سبب اولمقله مؤنت اولوب عبادت مالیه دن بولنان زکاتک
محانه صرف اولمقله کندوسنده عبادت معناسی وارددر لیکن مؤنت اولمسی اصل
اولان اراضی ناهیه سببیه اولوب عبادت اولمسی ایسه تابع اولان محل صرف
حسبیه اولمقله اصل سببیه اولان مؤنت ترجیح اولنه رق کندیسنده عبادت معناسی
بولنان مؤنت عداولمشدر.

مسئله ۶۶ - ۴ کندیسنده عقوبت معناسی بولنان مؤنتدر خراج کبی
زیرا خراج ارضه تعلقی حسبیه مؤنت اولوب جهاددن اعراض اوله رق نظر
شرعده سبب ذل اولان زراعتله اشتغال اعتباریه عقوبتدر لیکن اراضی اصل
اولوب زراعتله تمکن وصف اولمقله مؤنت معناسی اصل عد اولمشدر. بناء علیه
خراج ابتداء اسلامه مشروع قلنمیوب بلکه مؤنت اولمقله عقوبت اولمق بیننده
متردد بولنه رق شکله عقوبت زائله اولیه جغندن اهل خراجدن النان اراضی
خراجیه ده خراج ابقا اولنور.

(۱) عشرک مشروعیکی کتاب. سنت. اجماع امتله ثابت اوله رق فرض اولدیغی عقلا
دخی ثابتدر. کتاب (وآتواحقه یوم حصاده) آیت جلیله سی. سنت (ماسقت السماء فقیه العشر
وماسقی بغرب اودالیه فقیه نصف العشر) حدیث شریفی اولوب الی یومنا هذا اجماعده
بونک اوزرینه منعقد اوله رق نصاب و حولان حول وبقا شرط اولیه رق کرک آز و کرک
چوق یغمور ویا نهر ایله صولنان اراضی عشریه نک بالجمله حاصلاتندن عشر و اراضی خراجیه نک
حاصلاتندن خراج وقربه ویا طولوم ویا طولابله صولنان اراضیدن نصف عشر النور.
هر تقدیر آیت جلیله مقدار مفروضده بمثل ایسه ده حدیث شریف تفسیر ایدرک مقداری
معلوم اولوب وجوب اداسنده نصاب وبقا شرط اولدیغندن برصاع یعنی بیک قرق درهم
وعند البعض یارم صاع مقدارینه بالغ اولمق شرطیه هر تقدیر نصاب مقدارندن از اولسه
دخی عشر و خراج لازمدر حولان حوله شرط اولدیغندن ولو سبزه اولسون برسنه ده
قاج دفعه حاصلات ویرایسه عشر ویا خراجی لازمکلور.

کرک عشر و کرک خراج عبادت خالصه اولیوب بلکه اجرت ارض اوله رق مؤنت
اولدیغندن وجوبنده صاحبی ایچون اسلام و عقل و بلوغ و حریت کبی شروط عبادتله مشروط
اولیه رق ولو وقف و غیر مسلم اولسون صبی و مجنون و مکاتب و مأذون فی التجاره اولان
کیسه لرک اراضیلرندن و مدیون و متوفانک ترکه سندن آله جفی کی صاحبی ویرمدیکی حاله
امام المسلمین طرفندن جبراً النوب محله صرف اولنور.

مسئله ۶۷ — عندالحنفی خراجله عشر اجتماع ایتیهرك اراضی عشریه دن خراج و اراضی خراجیه دن عشر النماز ایسه ده ائمه ثلثه عندنده اراضی خراجیه ده عشر غله و حاصلاتنك زكاتی اولوب خراج ایسه رقبه سنك زكاتی اوله رق رقبه سندن خراجی و زر عندن عشری النور .

مسئله ۶۸ — (۵) كفارات . عقوبته عبادت بیننده دائره اولوب نیتله مشروط اوله رق تحریر رقبه و یا محضاً عبادت خالصه دن بولن ان صوم متتابع و یا اطعام طعامله ادا اوله رق جبری اولیوب بلکه فتوی ایله لازم اولوب خطا و نسیان واکراه عذرلریله معذور اولنلره دخی لازم اولمقله ادا سنده عبادت معنایی بولندیگی کی ابتداء مشروع اولیوب بلکه نهار رمضانده فرض اولان ادای صوم و لازم المحافظه اولان یمین و واجبات حج کی وظائف مقدسه دینه اوزرینه واقع اولان جنایتلرک محوی و یاستری ایچون جزا اوله رق مشروع بیورلمقله وجوباً عقوبت اولوب اداء عبادتدر لیکن كفارت افطارک غیریسنده عبادت جهتی غالبه ایسه ده عندالحنفی كفارت افطارده عقوبت جهتی غالبه اوله رق حدود شرعیه کی غروب ظنیه قبل الغروب و کیجه ظنیه بعد الامساك جماع کی خطا و سهو واکراه و اجبار و اضطرار و شبهه اباحه عذرلریله ساقطه اولوب جمله سی ستارة الذنوب اولدقلرندن كفارات تسمیه اولنمشلردر .

مسئله ۶۹ — (۶) طاعات طریقله ادا ایدن مکلفک ذمتنه تعلق ایلیوب بلکه بنفسه قائم و ثابت اولان حق باریدر خمس غنائم و معادن ارض کی که مجرد اعلاهی کلمه الله ایله اعزاز دین ایچون مشروع قلنان جهاد سببیه حاصل اوله رق حق باری اولمقله جمله سی حق باری اولمق ایجاب ایدرایسه ده جناب حق تفضلاً و امتناناً درت خمسنی مجاهدینه احسان و اباحه بیوروب آنجق بر خمسنی رضای باری ایچون (واعلموا انما غنمتم فان لله خمسہ و للرسول و لذي القربى و الیتامی و المساکین و ابن السبیل) آیت جلیله سیله تعداد بیوریلان مستحقینه صرف اولمق اوزره استبقا بیوروب سلاطین عظام حضراتی اخذ و توزیعنه تعیین و تولیت بیورنمشلردر . زیرا سلاطین عظام اقامه حقوق باینده نائب شرعدر

دفائن و معادیندخی حکم مذ کرده غنائیم کبی اولوب عندالحاجه خمس معادن بولانه صرف اولنمق جائزدر .

مسئله ۷۰ — (۷) محافظه انساب و اموال و اعراض و عقول و دین ایچون عقوبت اوله رق مشروع بیوریلان حد زنا و حد سرقت و حد قذف و حد شرب خمر و حدرده کبی عقوبات کامله اولوب لکن ۵۵ مسئلهده بیان اولندیغی وجهله عندالحنفی حد قذفده حق باریله حق عبد مشترک اولوب حق باری غالبدر .

(۸) قتل سببیه مشروع بیوریلان حرمان ارث کبی عقوبت قاصره در زیرا حرمان ارثده مقتوله هیچ بر فائده و نفع بولمیبو مجرد ارتکاب جنایتدن قاتلی منع ایچون مشروع بیورلمقله قاتل حقنده عقوبت قاصره در حد قذفدن ماعداسی صرف حق باری اولوب حد قذفده حق عبده مشترک اوله رق حق باری غالبدر .

❁ اصل و خلف ❁

مسئله ۷۱ — حقوق مذ کورهدن ایمانله فروع ایمان کبی عبادت خالصه اصل و خلف اوله رق ایکیشر قسم اولوب لکن خلفیت کرک صریح و کرک غیر صریح اولسون انجق یانصا و یا اشاره و یا دلالة و یا اقتضاء سمعه ثابت اولوب رأیله ثابت اوله ماز (۱) حق باریدن ایمانده اصل اولان ذات باری و صفات مقدسه الهیه و ملائکه و رسل کرام و کتب سماویه و قضا و قدر و خیر و شر و حشر جسمانی امثالی بالجمله ضرورات دینییه قلبی تصدیق اولوب مجرد جزیه دن خلاص و نسای مسلمه ایله ازدواج و وفاتی حالنده تجهیز و تکفین و غسلی و صلات جنازه و اسلام قبرنه دفن کبی احکام اسلامیته نیک اجراسنه علامت اولمق اوزره شرط اوله رق اقرار تصدیق مذ کوردن خلفدر بناء علیه اسلامه اجبار واکراهده اولدیغی کبی اقرار مذ کور تصدیق قلبی مقامنه قائم اوله رق هر نقدر نفس الامرده اصل اولان تصدیق قلبی بولمسه بیه مجرد خلف اولان اقرار اوزرینه احکام مذ کوره اجرا اولنور زیرا تصدیق قلبی کبی امور باطنیه ده دلیل ظاهر امور باطنیه مقامنه قائم اوله رق حکم شرعی دلیل ظاهر اوزرینه

اجرا اولنور ، اصلتنه بناءً هييج بروجهله تصديق قلابي سقو طي قابل دكل ايسهده عجز واجبار كي بر عذرہ بناءً خلف اولان اقرار سقو طي قابلدن .

❦ احكام خلف ❦

مسئله ۷۲ — غير مكلف اولان صغار ومجانينك ايمانلرنده انلرك عجزلرينه بناءً ابوينلري ويا احد ابوينلرينك تصديق واقرارلري انلرك تصديق واقرارلرندن خلف اوله رق انلرك ايمان واسلاملريله صغار ومجانينك دخي اسلاملريله حكم اولنور بناءً عليه مجنون اولان غير مسلمك زوجہ سي مسلم اولدقده مرقومك وليسنه اسلام تكليف اولنوب قبول ايدرسه انلرك اسلاميته تبعاً مسلم اوله رق نكاحلري ابقا اولنوب امتناع ايدرسه فسخله تفريق ايديلور .

ابوينندن كيمسهلري بولنماز ويا اسلام اولمازلر ايسه اسلام اولمقده صغارك اهل داره تبعيتلري ابوينلرينه تبعيتلرندن خلف اوله رق دارحربده اسير ايديلوبده دار اسلامه چيقاريلورلر ايسه داراسلامه تبعاً مسلم اولوب اهل دارك تصديق واقرارلري ايله اسلاملري انلرك تصديق واقرارله اسلاملرندن خلف اولور . داراسلامه چيقاريلوبده دارحربده غنيمةله تقسيم اولنه رق برمسلمه اصابت ايدر ويا صاتيلرلر ايسه انلره ويا اسير ايدن اسلامه تبعاً مسلم اولوب دارحربده وفات ايدرسه غسل وتجهيز وتكفين وجنازه نمازي كي بالجملة احكام اسلام اجرا ايديلور .

ايجابي حالنده قادر اولانه صوايله حدثن طهارت اصل اولوب استعمالدن عجز حالنده تيم اندن وياتراب صودن خلف اوله رق عندالحنفى تيم ويا تراب بدل مطلق وعندالشافعي بدل ضرورت اولق اوزره اختلافيدر .

❦ شرط الخلفيت ❦

مسئله ۷۳ — خلفيتك شرطي اصلك ممكن معدوم اولمسيذر . زيرا اصل ممكن اولمسه سببيت منعقدہ اولمايه جنبي كي اصلك وجودي حالنده خلفه ضرورت اولمايه جغدن مثلاً بطريق الكرامه صويك امكان وجودينه بناءً (اذاقمتم الى الصلوة فاعسلوا وجوهكم الابيه) و (وان كنتم جنبا فاطهروا) ايت جليله لريله نماز

ومس مصحف وجنبه كوره تلاوت قرآن كې بلا طهارة ادالری جائز اولمیان شیلری محدث مكلفك قصد ایلمسی اصل اوله رق صو ایله طهارتك وجوبنه سبب اولوب بعده صوی استعمال دن عجزك ظهورینه بناء (فلم تجدوا ماء فتمموا صعيدا طيبا) مقتضاسنجه قادر اولنه قدر حكم وجوب تیممه انتقال ایدرك بلا طهارة ادالری جائز اولمیان شیلرك جمه سی تیممه جائز اولور لر ایسه ده اصل اولان صویك وجودیله استعماله قدرت حالنده خلف اولان تیممه صیرورت اولنه میه جغندن صو ایله طهارته قادر ایکن خلف اولان تیممه هیچ بری جائز اولماز.

❁ خلفیتده اختلاف ❁

مسئله ۷۴ — انفا بیان اولندیغی وجهله بالاتفاق حال عجزده تیمم طهارتدن خلف ایسه ده عند الحنفی خلف مطلق اوله رق حال عجزده قبل الوقت ایدیلان تیممه بعد الوقت مطلقا نماز وسائره جائز اولدیغی کبی (التراب طهور المسلم ولو الى عشر حجج مالم يجد الماء ولم يحدث) مقتضاسنجه بوزیلدقجه بر تیممه الی غیر النهایه نماز جائز ایسه ده عند الشافعی طهارت مستحاضه کبی جواز صلاته مانع اولان حدثك بقاسیله برابر حال عجزده ذمت مكلفدن اسقاط فرض حاجتنه بناء تیمم خلف ضرورت اولوب عدم ضرورته بناء قبل الوقت ایدیلان تیمم ایله بعد الوقت واجب اولان نماز جائز اولمیه جنی کبی بر فرضك اداسیله ضرورتك انتقاسنه بناء بر تیمم ایله بر فرضدن زیاده فرض قلنماز لیکن نوافل کثیرمك جواز یله قولنه بناء جای نظر در .

❁ عند الحنفی خلفیتده اختلاف ❁

مسئله ۷۵ — عند الحنفی حال عجزده تیمم بالاتفاق بدل مطلق اولوب لیکن خلفیتك الت ویأ فعلده اولمسی اختلافی اوله رق (فلم تجدوا ماء فتمموا صعيدا طيبا) آیت جلیله سی و (التراب طهور المسلم ولو الى عشر حجج مالم يجد الماء ولم يحدث) حدیث شریفی مقتضاسنجه شیخین حضراتی الت طهارتده اوله رق ترابك صودن خلف اولمسنه قائل اولوب امام محمد حضرتلری ایسه اصالت و خلفیت افعال مكلفك وصفی اولمسنه بناء فعل مكلف اولان تیممك طهارتدن خلف اولمسنه قائل اوله رق فعلده در .

❁ ثمره خلاف ❁

مسئله ٧٦ — شيخین حضراتنه كوره تراب صودن خلف اوله رق خلفیت الت طهارتده اولوب فعلده اولمدينی جهته حال اقتدارده صوايله طهارت كبی حال عجزده تیممه مستقلا طهارت اولمقله متیممك متوضیه و بالعكس اقتدارلی جائز اولوب امام محمد كوره نفس تیم طهارتدن خلف اولمقله راکع وساجدك مومییه وصحیحك معذوره اقتدارلی كبی متطهرك متیممه اقتداسی جائز دكلدر اشارت اولمدينی اوزره كرك آیت جاییله و كرك حدیث شریف شيخین حضراتنك قوللارینی مؤید اولمقله مختار اولان آنلك قوللریدر .

❁ كتاب طهارت ❁

❁ مقصد ❁

مسئله ٧٧ — محكوم به اولان افعال مكلف اقسامندن عبادت (وماخلقت الجن والانس الا ليعبدن) مقتضاسنجه بالعموم انس وجنك سبب خلقتلری اولدیغندن هر وجهله اقسام سائر اوزره مقدم اولدینی كبی عبادتك اقسامندن نمازده (الصلوة عمادالدين) مقتضاسنجه دینك دیره کی اوله رق بعدالایمان افضل فرائض اولمقله سائرلری اوزرینه مقدم اولوب (مفتاح الصلوة الطهور و تحريمها التكبير و تحليلها التسليم) مقتضاسنجه فرائض صلاتدن طهارت دائره منجیه صلاتك مفتاح مدخل وصحتی اوله رق جمله ارکاننده لازم بولندیغندن ابتدا احكام طهارتی بیانله مقصده شروعك لزومی بیاندن مستغنیدر .

❁ حقیقت طهارت ❁

مسئله ٧٨ — طهارت لغتده مطلقا نظافت وپاك اولمق معناسنه اولوب شرعه نماز و تلاوت قرآن و مس مصحف كبی بلا طهارة ادالری جائز اولمیان افعال مكلفك جوازنه مانع اولان احداث وانجاسدن ثوب و بدن و مكانی تمیزلكدر . چونكه نماز معراج مؤمنین و مناجات رب العالمین اولمقله نمازده بولنان کیسه

حضور معنويده جناب حقه مناجاتده بولنهرق قلباً حضور و خشوعله بدناً
نظافت و طهارتك لزومی مقتضای عقل و حکمتدر .

❁ احداث ❁

مسئله ٧٩ — احداث حدثك جمعی اولهرق آبدستسزلك وجنبلك
وحیض و نفاس حالنده بولنق کبی جواز صلات و مس مصحف و تلاوت
قرآن و طوافك صحتلرینه مانع اولان نجاست حکمیهدن عبارت اولوب بولردن
طهارت قادر اولانلره آبدست و غسل ایله عاجز اولانلره بولردن بدل
اولهرق تیمم ایلهدر .

❁ طهارت مذکوره نك سبب وجوبی ❁

مسئله ٨٠ — مختار اولان كرك فرض و كرك نوافل مطلقاً نماز و مس
مصحف و جنبه كوره تلاوت قرآن کبی بلا طهارة اداری جائز اولیان شیلری
محدث مكلفك قصد ایلمسیدر .

❁ وجوب نك شرطلری ❁

مسئله ٨١ — وجوب نك شرطلری عقل . بلوغ . اسلام . آبدست و غسل
ویا تیممه قادر اولمق و حیض و نفاسك انقطاعلریله وقت صلاتك دارالمسیدر .

❁ صحت نك شرطلری ❁

مسئله ٨٢ — مرأوده حیض و نفاسك انقطاعلریله مطلقاً مكلفده اعضای
مغسولهده غسلك و ممسوحدهده مسحك محل غسل و مسحی كاملاً استیعابلریدر .

❁ حکمی ❁

مسئله ٨٣ — بلا طهارة اداری جائز اولیان شیلرك جوازی اولوب حکمت
و فائدهسی تکفیر ذنوب و دفع شیطاین و نظافت مخصوصه ایله تنویر اعضا
و مقام مناجاته مستعد اولمقدر .

❁ فضیلتی ❁

مسئله ٨٤ — (الوضوء شرط الایمان و السواك شرط الوضوء و لولا ان اشق

على امتی لامرهم بالسواك عند كل صلاة و ركعتان یستاك فیهما العبد افضل
من سبعین ركعة لا یستاك فیها (مقتضاسنیجه امام ایمانله تزیید فضائل و ثوابدر .
زیرا مطلقا نظافت ثمره ایماندندر .

❁ صفی ❁

مسئله ۸۵ — مطلقا نماز ایچون فرض قطعی و طواف و مس مصحف
ایچون واجب اولوب بونلرك غیرى محالرده مستحب اولمیدر . بناء علیه
ایجابی حالنده آبدست و غسل و بونلردن عجز حالنده تیمم فرض . واجب .
مستحب اولور .

❁ ارکانی ❁

مسئله ۸۶ — محل محل غسل و محل مسحی مسح ایله ازاله نجاستدن
عبارتدر .

❁ آلتی ❁

مسئله ۸۷ — حدثن طهارتك آلتی قدر اولنلره ماء مطلق و عاجز اولنلره
(التراب ظهور المسلم ولو الى عشر حجج مالم یجد الماء اولم یحدث) مقتضاسنیجه
تراب منحصرا اولوب نجاستدن طهارتك آلتی بیان اولنهجنی اوزره یکر میدن
زیاده شیلردرکه

و غسل و مسح و الجفاف مطهر * و نحت و قلب العین و الحفر یدکر
و دبغ و تخلیل ذکاة تخلل * و فرك و ذلك و الدخول التغور
تصرفه فی البعض ندف نرحها * و نار و غلی غسل بعض تقور

نظامیله جمع ایدلمشدر .

چونکه حدثن طهارتله نجاستدن طهارت بیننده اوج وجهله فرق وارد
بری آلت طهارت ایکنجیسی محل طهارت اوچننجیسی کیت طهارتدهدر .
آلت طهارتده فرقلى بیان اولندیغی اوزره حدثن طهارتك آلتی حال
اقتدارده ماء مطلقه و حال عجزده تراب طاهره منحصرا اولوب نجاستدن طهارت
ایسه یکر میدن زیاده شیلردر . محل طهارتده فرقلى حدثن طهارتك محلی

اعضای مخصوصه اولوب نجاستدن طهارتک محلی ایسه انلرایله ثوب و مکانه شاملدر . کمیت طهارتده فرقلری حدیدن طهارت متجزی اولمديغندن محل غسل و مسحدن ولو برقیلک محلی خالی قالسه تمام اولمديغنی حالدیه نجاستدن طهارتده نجاست غلیظهده درهمدن ازی نجاست خفیفهده ربعدن دونی معقولردر .

❁ دلیلاری ❁

مسئله ۸۸ — ابدست حقنده (اذاقم الی الصلوة فاغسلوا) و غسل حقنده (فاطهروا) و تیمم حقنده (فتمموا صعیداً طیباً) و نجاستدن طهارت حقنده (وثیابک فطهر) ایت جلیلهلری اولوب (وثیابک فطهر) ایت جلیلهسی بالعباره ثیابک وبالذلاله بدنله مکانک لزوم طهارتنی افاده ایدر . زیرا نمازده انفکاک قایل اولان ثوبک طهارتنی لازم اولنجه هیچ بروجهله قایل انفکاک اولمیان بدنله مکانک لزوم طهارتلری بیاندن مستغیدر و هربرسی حقنده سنت و اجماع امتده منعقددر .

❁ ابدست ایله غسل و تیمم بینلرنده فرق ❁

مسئله ۸۹ — واجب اولان غسل ایله تیممک مشروعیتلرنده سبقت حدث شرط اولوب ابدستک مشروعیتنده شرط اولمديغندن وجوب غسلک دلیلی اولان (وانکنتم جنباً فاطهروا) و تیممک دلیلی اولان (وانکنتم مرضی او علی سفر او جاء احد منکم من الغائط او لامستم النساء فلم تجدوا ماء فتیمموا صعیداً طیباً) ایت جلیلهلرنده جنب و غائط و لمس نساء کبی حدثلرک سبقت وقوعلرینه تعلیقاً تصریح بیوزیلدیغنی حالدیه وجوب وضوءک دلیلنده (اذاقم الی الصلوة فاغسلوا) بیوزیلهرق یالکیز اراده صلوته تعلیقله اکتفا اولتمشدر . بناءً علیه غسل اوزرینه غسل و تیمم اوزرینه تیمم مشروع اولمیهرق عبث اولوب ابدستده ایسه سبقت حدث شرط اولمیهرق (وضوء علی الوضوء نور علی النور) مقتضاسنجه ابدست اوزره ابدست مستحب اولوب ابدسته مداومت سبب شهادت و مذکر توحیددر .

مسئله ۹۰ — ایت وضوءک صکره نازل اولان سوره مائده ایتلرندن

اوله رق بالاجماع مدنيه اولوب حدثن طهارة ايسه بالاجماع فرضيت صلاته
برابر قبل الهجره مکه مکرمه ده تعليم جبرائيل ايله فرض بيورلمشدر . بلکه
(هذا وضوئي ووضوء الانبياء من قبلي) دلالتيله ابدست شريعت من قبلنا در
زيرا حضرت پيغمبر طهارتسن نماز قلمامشدر . بناءً عليه آيت وضوء بقای
وجوبك تأيیدی کي برچوق فوائد جليله نك بياني ايجون انزال بيورلمقله
طائفة شيعه ورافضيلك (وارجلکم الى الکعبين) آيت جليله سنده جر قرائتيله
چپلاق آياغه مسحك جوازيله لزومنه استدلاللري غير وارددر خصوصيله
(الى الکعبين) ايله ارجلك غايه لنمسيده حکم مذکوري تأييد ايدر زيرا محل
مسح ظهر رجل اولوب يانلري دکلدرد .

مسئله ۹۱ — غسل ايله تيممك اسباب موجهلري محتمل الوقوع اولوب
آبدستده ايسه نمازکي سبب وجوبك تکررينه بناءً محقق اولديغنه اشارت ايجون
انلرده ان وابدست ايتنده اذاليله ايرادیده ايت وضوءك حکم نزولنددر که زمحشری
سلم علی شيخ النحاة وقل له * عندي سؤال من يحبه يعظم
انا ان شککت وجدتموني جازما * واذا جزمت فاني لم اجزم
قل في الجواب بان ان في شرطها * جزمت ومعناها التردد فاعلم
واذا لجزم الحكم ان شرطية * وقعت ولكن لفظها لم يجزم
لغزيله اشارت بيورمشدر .

✽ آلت طهارة اولان صويك اقسام واحکامی ✽

مسئله ۹۲ — آلت طهارة اولان صو ماء مطلق وماء مقيد وماء مخلوط
وماء مستعمل اوله رق درت نوع اولوب ماء مطلق يغمور ونهر وقيو وچشمه
صولري کي عندالاطلاق فهمه تبادر ايدن صولر اوله رق محالرينه نسبتی تنويع
ايجون اولوب تقييد ايجون دکلدرد زيرا جمله سی (الم تر ان الله انزل من السماء
ماء فسلكه ينابيع في الارض) مقتضاسنجه سمان نزول ايدن يغمور صولر بدر .
هر نقدر آيت جليله ده ذکر اولنان (ماء) لفظی سياق اثباتده واقع ايسه ده
مقام امتنانده عموم افاده ایده جکندن اقسام مذکور نك جمله سنه شاملدر
بناءً عليه ماء مطلق طاهر ايله بالاتفاق كرك حدثن طهارة وكرك نجاستدن
طهارة جائزدر .

* ماء مقید *

مسئله ۹۳ — کل صوینی . قاون وقارپوز وسبزه واوزوم واصله وطعام
صولری وشیره وشربت وسرکه کی کندیلرینه مخصوص اسملرایله تعبیر اولنهرق
اطلاقی حالده فهمه تبادر ایلمیان صولر اولوب هر نقدر کندیلریله نجاستدن
طهارت جائز ایسه ده بالاتفاق حدثن طهارت جائز دکلدرد .

* ماء مخلوط *

مسئله ۹۴ — ایچنه یاپراق وجبوبات کی اجسام طاهره قارشوب چورویه رک
چامور کی قویولا شهرق اقسنه خلل کلان وغالب اولهرق سائر مایعات قارشان
ویانظافت قصد اولمیهرق برشی حاشلانونب پشیریلان صولر اولوب هر نقدر
رقتنه خلل کلمسه دخی ماء مقید حکمنده اولهرق بالاتفاق حدثن طهارت
جائز دکلدرد .

اما صابون و صوده کی طهارت قصد اولنان برشی ایله مخلوط اولور ویا
قاینادیلور سه سیلاننه خلل کلدجه حدثن جائزدر زیرا غسل صوینی مغسول
اوزرینه اتمقدن عبارت اولمغه سیلانی لازمدر صویه قاریشان شی سود
وسرکه کی مایع طاهر ایسه اعتبار غلبه اولوب ماء مطلق غالب ایسه طهارت
جائز ایسه ده مغلوب ویا مساوی ایسه جائز دکلدرد (تعیین غلبه) صویه قارشان مایع
یالکزر لونده مغیر ایسه غلبه لونده ویالکزر طعمده مغیر ایسه طعمده هرایکی
وصفده مغیر ایسه ایکسندن بر بنک غلبه سی اعتبار اولنوب ماء مستعمل کی
اصلا مغیر دکلمسه اجزا اعتباریله تعیین اولنهرق غالبک مقتضاسیله حکم اولنور .

* ماء مستعمل *

مسئله ۹۵ — ماء مستعمل کندوسیله رفع حدث ویاسقاط فرض ویا قصد
قربت حاصل اولان صولر اولوب مختار اولان طاهر وغیر مطهر اولهرق
نجاستدن طهارت جائز ایسه ده حدثن طهارت جائز دکلدرد . رفع حدث ایله
مستعمل اولان کندوسیله ابدست الثان ویاغسل ایدیلان صولر واسقاط فرض
ایله مستعمل اولان جنب اولان محدثك اعضاسنه تماس ایدن صولر وقصد قربتله

مستعمل 'ولان ثواب قصديله قبل الطعام وبعد الطعام غسل يدكبي طاعت قصديله استعمال اولنان صولردر .

مسئله ۹۶ — غسله نظراً جمله بدن عضو واحد اولوب ابدسته نظراً متعدد اولمغله غسله بر عضوده قوری قالان محل دیگر عضوده بولنان صو ايله ایصال دیله رق تمام اولور ایسه ده آبدستده محندن انفصال ايله صو مستعمل اوله رق دیگر عضوده قوری قالان محلی یشارتمغله تمام اولماز .

* ماء مطلق *

مسئله ۹۷ — ماء مطلق دخی جاری ورا کد اوله رق ایکی قسم اولوب ماء جاری اقان صولر اولوب کړک از وکړک چوق اوصاف ثلثه سندن بری تغیر ایتدکجه نجاست قارشمغله تنجس ایتیه رک حدثن طهارت جائز ایسه ده تغیر ایدرسه تنجس ایدرک استعمالی جائز دکلدرد .

* ماء را کد *

مسئله ۹۸ ماء را کد اقیان صولر اولوب بوده کثیر یعنی عندالحنفی بولندیفی محاک اوزری یوزارشونه وعندالشافعی قلتینه بالغ اوله رق وعندالمالک اوصافی تغیر ایتیه رک چوق ایسه حوض کبیر اوله رق ماء جاری حکمنده اولوب اوصافی تغیر ایتدکجه نجاست وقوعیله تنجس ایلز ایسه ده اودرجه لره بالغ دکل ایسه حوض صغیر اوله رق کړک اوصافی تغیر ایلسون وکړک ایلسون مطلقاً نجاست وقوعیله تنجس ایدرک استعمالی جائز اولماز .

مسئله ۹۹ — استعمال صویک یوزنده اولمغله ازلق وچوقلغنده درینلکک حکمی یوقدر بناءً علیه اوستندن اقوب التندن چیقمغله حوض صغیرک صوبی ماء جاری عد اولنیه رق یوز آرشونه بالغ اولمیان حوضلر و صهرنجلر حوض صغیر اولمغله هر نقدر پک درین اولسه لردخی مطلقاً ایجلرینه نجاست دوشرسه تنجس ایدرک ایجلرنده بولنان صولرک جمله سنی چیقاروب ییقامق لازمدر .

* قیولرک احکامی *

مسئله ۱۰۰ — مساحة سطحیه سی یوز آرشونه بالغ اولمیان قیولرک کوزلی

و كرك كوزسز اولسون حوض صغیر اوله رق ماء را كد قلیل اولمغله قیاس اولان ایچلرینه مجرد نجاست دوشمكله و یادموی حیوان دوشوب تلف اولمقله كرك صولری و كرك تماس ایتدیكى شیلر تنجس ایدرك تطهیری قابل اولمامسی و اوستندن صولنوب التندن قاینایه رق کریسندن كلمسینه نظراً ماء جاری حکمنده اوله رق اوصافندن بری تغیر ایلدجكه تنجس ایلامسی اكلاشیلور ایسه ده خلاف قیاس اوله رق استحصانا ایچنه نجاست وقوعیله تنجس ایده جکی کی بیان اولنه جنی وجهله تطهیریده قابلدر انك ایچون مسائل الآبار تتبع الآثار بیورلشدر.

❁ تنجس ایدن قیولرك صورت تطهیری ❁

مسئله ۱۰۱ — قیولرك حكم تطهیری ایچنه دوشن نجاستك انواعی اعتباریله اوج درجه اولوب (۱) ولو بردامله قان ویا بول کی مایع نجاست قاریشور ویا انسان و قویون و قوزو و قاز و اوردك کی بیووك جثه لی حیوان دوشوب تلف اولور . ویا هر نه قدر دوشوب تلف اولان حیوان دموی پك كوچوك اولسه دخی شیشوب طاغیلور ویا تویی دوکیلور ویا اوزرنده نجاست بولونورسه صویك جمله سی تنجس ایدرك ابتدا انی چیقاردقن صوكره صویك جمله سنی چیقارمق لازمدر . کریسندن كلهرك جمله سنی چیقارمق قابل اولماز ایسه قیونك قوفه سیله وجوباً ایکیوز و مندوباً اوچبوز قوفه صو چیقارمقله طهارتیله حكم اولنور ایسه ده مختار اولان (فاسئلواهل الذکر ان كنتم لاتعلمون) مقتضاسنجه قیوده بولنان صویك مقداری صو علمنه واقف ایکی شاهد عادلک شهادتلیله تقدیر ایدیلهرك اولمقدار صویك اخراجیله طاهر اولوب استعمالی جائز اولور .

مسئله ۱۰۲ — قیونك تطهیرنده بومقدار صویك جمله سنی دفعةً چیقارمق لازم اولمیوب بلکه بر قاق نوبته چیقارمق کافی اولوب بومقدار صو چیقاریلدقه قیونك اغزندن قوفه نك آیریلسمیله هم قیو و همده قوفه وسائر طاهر اولور (۲) درجه سی ایچنه دوشوب تلف اولان حیوان اوزرنده نجس بولنیه رق طاووق و کدی جثه لرنده متوسط اولوبده شیشوب طاغلمق و تویلی دوکولمک کی بر حال واقع اولماز ایسه بونلری بعدالاجراج وجوباً قرق و مندوباً الشمس قوفه صو

چيقارمق كفايت ايدر . (۳) درجه سى دوشوب تلف اولان حيوان اوزرنده نجس بولميه رق شيشوب طاغيلميه رق وتويي دو كوله يرك بر فاره ويا سرچه كې اوفاجق ايسه وجوبا يكر مى مندوبا اوتوز قوفه صو چيقارمق كفايت ايدر . دوشوب تلف اولان حيوان بردن زياده ايسه اولكيلره قياساً معامله اولنور . قيويه دوشن حيوانك اوزرنده نجس بولميو ب صالحه سى نجس ايسه صويه ملاقى اولميه رق حياً چيقاريلور ويا دوشوب تلف اولان حيوان قوربغه وينكج كې دموى دكل ايسه صو نجس ايلز ايسه ده خلافى حالنده جمله سى نجس ايدر ك جمله سنى چيقارمق ايجاب ايدر .

❁ صوتي افساد ايدوب ايتيان حيوانلر ❁

مسئله ۱۰۳ — چكر كه . آرى . سينك . بوجك . ييلان . عقرب . ينكج . قوربغه . بالق . پيره . تحته قوروسى كې كرك برى و كرك مائى ويا هم برى هم مائى دموى اولميان حيوانلر ك صوده و سائر مايعاتده تلف اولمىله نجس ايلز .

مسئله ۱۰۴ — سرچه و كوكرجين كې اتى ينان قوشلر ك ترسلرى طاهر اوله رق صوتي افساد ايلميه جكي كې محافظه سى متعذر اولديغندن اتى ينيان قوشلر ك ترسلرى ده افساد ايلز ايسه ده طاووق . قاز . اوردكك ترسلرى نجس اولوب انلردن محافظه ممكن اولمقه دوشدكلرى صولرى افساد ايدرلر . يرتيجى قوشلر ك ترسلرى بك چوق اولورسه ثوبى وقابلرده بولنان صولرى افساد ايدر ايسه ده ضرورته بناءً قيولرى افساد ايلز .

❁ ارتقار ك حكملى ❁

مسئله ۱۰۵ — كرك انسان و كرك سائر حيوانلر ك ارتقار ينك طاهر و مكروه و مشكوك و نجس اولمى خصوصنده صالحه لر ينك حكمنه و صالحه لر ينك حكميده حاصل اولديغى اتلر ينك حكمنه تابع اوله رق اتى طاهر اولنك كرك صالحه سى و كرك ارتقى طاهر و مكروه اولنك مكروه و مشكوك اولنك مشكوك و نجس اولنك نجس اولمى ضرورى اولمقه كرك مسلم و كرك غير مسلم و كرك محدث و كرك طاهر اغزلرى

قوصحق و شراب کي برشی ایله متنجس اولدقجه ارتقلى مطلقاً طاهر اوله رق
بلا کراهة استعمالی جائزدر زیرا انسانک اتی طاهر اولوب عدم اکلی (ولقد
کرمننا بنی آدم) مقتضاسنجه حرمت و کرامتنه مبنیدر بناءً علیه قویون و کچی
امثالی حیوانلرک اغزی طاهر اولدقجه ارتقلى طاهر و مطهرلردر . و کدی
وسائر اولرده بولنان فاره امثالی حشراتک و سواقلرده کزن طاق و قاز
واوردک و شاهین و اتمجه امثالی یرتجی قوشلرک قاقلری کیمک اوله رق ارتقلى
طاهر ايسه ده مکروه اولقله بشقه طاهر صو وار ایکن انلری استعمال مکروه
اولوب نفسنده طاهر مع الکرهه مطهر اولقله اويله صو وارا یکن تیم جائز اولماز .
مسئله ۱۰۶ — حماراهلینک واندن متولد قاترک اتلرینه نظراً ارتقلىنک
نجس اولسنه استحساناً ترنه نظراً طاهر اولسی معارض اوله رق مشکوک
الطهره اولقله اندن بشقه صو بولماز ايسه احتیاطاً انکله ابدست و غسله تیمک
علاوه سی ایجاب ایدر .

✽ ایچنه نجاست دوشن قیونک وقت تنجسی ✽

مسئله ۱۰۷ — قیو . لاشه نک غیری نجاست وقوعنده (حادثه نک اقرب زمان
واقرب سببنه اضافه سی اصل) اولقله وقوعی وقتندن اعتباراً نجس اولسیله
حکم اوله رق صویک جمله سنی چیقارمقله تطهیر اولنوب فاره وسائر دموی
بر حیوانک لاشه سی کوریلدکده وقت وقوعی معلوم ايسه بالاتفاق اولوقتدن
دکل ايسه اقرب زمانه اضافه ایله عندالامامین کوریلدیکی وقتدن و امام اعظم
حضر تلرینه کوره شیشمک و طاغلمق و یاتوی دوکولمک کي بر حال کوریلور
ايسه اوچ کون و اوچ کیجه اقدامدن و کورلمدیکی حالده احتیاطاً برکون و بر
کیجه اقدام دوشمش عد اوله رق انلردن صکره النان ابدست وایدیلان غسل
ویقانان البیسه ایله قلنان نمازلر بونلرایله برابر اعاده اولنوب احتیاطه رعایه مختار
اولانده بودر .

✽ حال اقتدارده غسلاک و حال عجزه ده اندن ✽

✽ بدل تیمک اسباب موجبهلری ✽

مسئله ۱۰۸ — جنبک و انقطاع حیض و نفاس کي حدث اکبرک وقوعی

اولوب جنبلك هم اركك وهمده قادينه شامل اولوب حيضله نفاس قادينه مخصوصدر .

جنبلكده ولو بلا انزال شهوتله غيبوبة خشفه ويا بلا دخول اويقوده احتلام ويا عند الامامين شهوتله منينك محندن انفكا كيله مطلقا خروجي و ابو يوسفه كوره شهوتله انفكاك و شهوتله خروجيدير . بناءً عليه ابو يوسفه كوره شهوتله محندن ايرلمش ايكن امساك ايديلهرك شهوتك سكوتندن صكره چيقمقله غسل ايجاب ايلز حال سعهده مختار اولان امامين قولى و حال ضرورة ويا مسافر اولديني محله سو ظن ايهامي كي برحاك وقوعنده ابو يوسفك قوليله عمل اوليدر .

❁ احكام تيم ❁

مسئله ۱۰۹ — تيم لغتده مطلقا قصد معناسنه اولوب شرعهده امت محمده مخصوص برخصات جليله اوله رق صويي استعمالدن عجز حالنده ۷۲ مسئلهده بيان اولنديني اوزره عند الحنفى اندن بدل مطلق و عند الشافعى بدل ضرورت اوله رق نيتمه ير جنسندن طاهر برشيئه ايكي اللريني بركره وروب ايلرو و كرويه تحريك ايدرك بعده سيلكوب قاپليو يوزينه بعده بركره دخی وروب ديرسكلريله برابر اللريني و قوللريني مسحدن عبارتدر .

مسئله ۱۱۰ — (خلق الماء طهورا مالم يتغير اوصافه بالنجاسة) مقتضاسنجه تنجس ايلدجكه صوفطرة طاهر و مطهر اوله رق عند الحنفى و سائلدن اولديني ايچون ابدست و غسلك صحترلنده نيت شرط دكل بلكه مسنون ايسهده تراب فطرة ملوث اولوب مطهر اولمسي انجق قربت و طاعت قصدينه بناءً قصد و نيت معناسنه تيم ايله امر اوله رق تيمك صحتنده رفع حدثله طهارته نيت شرط اوله رق فرضدر .

❁ تيمله نمازك صحتك شرطلري ❁

مسئله ۱۱۱ — تيمله نمازك جوازنده نمازكي بلا طهارة اداسي جائز اولميان عبادة مقصودهيه نيت شرطدر . بناءً عليه قرائت قرآن و مس مصحف و دخول مسجد گي بلا طهارة ادالري جائز اولان و يامس مصحف كي عبادة مقصودهك

غیری ایچون ایدیلان تیمله نماز صحیح اولماز زیرا مثلاً تلاوت قرآن هر نقدر عبادۀ مقصوده ایسه ده جنبك غیری به بلاطهارة جائزه اولوب مس مصحف هر نقدر بلاطهارة جائز دکل ایسه ده لکن عبادۀ مقصوده دکلدر بلکه مقصود تلاوتدر بناء علیه تیمله نمازك جوازنده هم عبادۀ مقصوده و همده بلاطهارة اداسی جائز اولمیان عبادتك اداسی نیتیه ایدلمکدر .

❁ صحت تیمم ایچون صوینی استعمالدن عجز ❁

مسئله ۱۱۲ — یا اصلاً صو بولنما مقله و یا بولنوبده كرك بدنأ و كرك خارجاً بر عذر شرعی به بناءً ابدست لازم ایسه ابدسته و غسل لازم ایسه غسله قادر اولما مقله اولوب بویله عجزه سبب بردشمنك منعی کی قول طرفندن ایسه قولك صنعيله حق باری ساقط اولیه جغندن بویله تیمله قلنان نمازك حال اقتدارده اعاده سی لازم ایسه ده اصلاً صوینی بوله مامق و یا مرض کی عذر سماوی به بناءً ایسه اعاده سی لازم کلمز .

❁ ابدستی بوزان شیر ❁

مسئله ۱۱۳ — حقیقی و حکمی اوله رق ایکی قسم اولوب حقیقه بوزان شیر اوکدن و یا ارقه دن چیقان بول و غائط و ریح و لو سائر محلدن چیقان قان و ایرین و صاری صو کی كرك خروجی معتاد و كرك قوم و قورد کی غیر معتاد شیرك خروجیه تطهیری واجب اولان محله تجاوزی اولوب بونلر ایله صاغ اولنلرك تیمم و آبدستلری بوزیلور ایسه ده میتك آبدستی بوزولیه رق غسلی اعاده اولنمیوب بلکه یالکمز چیقان محل غسل اولنور .

مسئله ۱۱۴ — آبدست و تیممی بوزمقده یاره اوزرینه باغلنان صارغی اوزرینه چیقان یا شلق سیلان حکمنده اوله رق ناقض اولوب اعاده ایدیلهرك تجدیدی لازم کلور اغز طولیسی قوصمق و اغزدن توکریکه غالب و یا مساوی اوله رق چیقان قانده ناقض اولوب توکرك غالب اولورسه ناقض دکل ایسه ده ممکن ایسه احتیاطاً اعاده لری لازمدر .

❁ نواقض حکمی ❁

مسئله ۱۱۵ — یانی اوزرینه ویا اولقلری اوزرینه یتارق مقعدینی یردن آیره جق درجه اویومک ناقض ایسه ده مقعدی اصلایردن آیریلماز ایسه ناقض دکلدر وکذا بالیق وچیلدیرمق و سرهوش اولمق ناقض اولدقلری کی ولوسهوا اویانق اولان بالغک نمازده قهقهه ایله کولسی هم نمازی وهمده ابدست و تیمی ناقض اولوب ضحک یعنی یالکمز کندیزی ایشیده جک درجه کولسی نمازی بوزار ایسه ده ابدست و تیمی بوزماز تبسم هیچ برینی بوزماز بلا هائل مباشرت فاحشه ده ناقضدر .

مسئله ۱۱۶ — اصلک ثبوت و صحتنه مانع اولان هرشی خلفک صحتنه دخی مانع اوله جغندن آبدستک صحتنه مانع اوله رق نقض ایدن هرشی خلف اولان تیمیده نقض ایده جکی کی ابتدا جواز تیمه مانع اولان هرشیئک وجودیده ناقض اوله رق صوی استعماله قدرته ده تیم بوزیلور .

وکذا ابتدا جواز تیمه مانع اولیان هیچ برشی بعدالتیمم ناقضده اولیه جغندن حاجت ضروریه ایله مشغول اولان صوم معدوم حکمنده اوله رق ابتدا جوازینه مانع اولمدیغی کی بعدالتیمم وجودیده ناقض دکل ایسه ده احتیاجدن فضله سی ناقض اولمقله ابدسته کافی صویک وجودیله ابدست بدلنده ایدیلا تیم بوزیله جغنی کی غسله کافی صویک وجودیله غسل بدلنده ایدیلا تیمده بوزبلوب جنبلک عودت ایدرک غسل لازمکار .

❁ حکم مسح ❁

مسئله ۱۱۷ — ابدسته شرطلرینی جامع مستلر اوزرینه مسح حرج عذرینه بناء غسلدن بدل اوله رق قولاً و فعلاً سنت مشهوره ایله ثابت اوله رق رافضیت و خارجیت تهمتی ایرام ایتدکجه اصلتنه بناء ایاقلری غسل عزیمتله عمل اولمقله مسحدن افضل ایسه ده بویله برایهام بولنور ویا ابدست صوی ایاقلری غسله غیر کافی اولور ویا وقت غیر مساعد اوله رق کوریلان لزوم اوزرینه مدتی ظرفنده مستلر اوزرینه مسح لازمدر زیرا شیخین حضراتی تفضیل وختنین

حضراته محبت و مستلر اوزرینه مسح اهل سنت علامتیدر. امام مالک کوره مسافره جائز ایسه ده مقیمه جائز دکلدر رافضیلره کوره اصلا جائز دکلدر .

اوزرینه مسح جائز اولان شیلر ❀

مسئله ۱۱۸ — بوغازلری دوشمیهرك طوپوقلردن یوقاری یه آیقلری ساتر اولوب ایچنه صو کچمیان و دلنیهرك درت بیک آدیم مقداری محله یورومکه متحمل اولان کرك دری و کرك بشقه شیلردن یاپیلان مست ولاپجین و پوطين حتی صحتک شرطلرینی جامع اولان چوراب اوزرینه دخی مسح جائزدر .

❀ صحتک شرطلری ❀

مسئله ۱۱۹ — مستلر اوزرینه مسحك جوازنده طوپوقلردن یوقاری یه قدر آیقلری ساتر اولملری (۲) حدثك سرایتی منع ایچون مستلرایچنده بولنان آیقلرك لا اقل اوچ پرمق مقداری اوزرینه مسح ایلمسی (۳) اوزرنده چیزمه وقوندره کبی برشی بولنیهرق دلنهدن درت بیک آدیم محله یورومکه متحمل اولمس (۴) عندالحنفی وقت حدثه وعند الشافعی وقت لبسده طهارت تامه اوزرینه کیلمش اولمس (۵) آیقندن لا اقل اوچ پرمق مقداری باقی قالمسی (۶) اوچ پرمق مقداری دلیك ویرتقدن سالم اولمس شرط اولدیغندن ولو بردانهسی بولنماز ایسه مسح جائز اولماز .

❀ مدت مسح ❀

مسئله ۱۲۰ — حضرت عمر و علی و خزیمه بن ثابت و ابی سعید الخدری و صفوان ابن عالعوف ابن مالک و ابی عماره و حضرت عایشه صدیقه کبی برچوق اصحاب کرام حضرتک اخبار و افاده لریله ثابت اولان (یمسح المقیم علی الخفین یوما ولیلة والمسافر ثلثة ايام ولیالیها) خبر مشهوری و فعل رسول الله ایله ثابت اولهرق عنده الحنفی مستلری کیمش اولدیغی ابدستک بوزیلدیغی وعند الشافعی کیدیلدیکی وقتدن مقیم حقنده ایرتهسی کون اولوقته قدر یکر می درت ساعت و مسافر حقنده اوچ کون اوچ کیجه اولوب بومدتلرك مرورندن صکره تکرار

ایاقلر ییقانهرق طهارت کامله اوزرینه کیلمدکجه مسح جائز اولماز امام مالک عندنده مسافره کوره بروقله مقید اولیوب بلکه دیلدیکی مدت مسح ایدر .

❁ تبدل مدت ❁

مسئله ۱۲۱ — مقیم اولان ماسح مدت مسحی منقضی اولدن سفره چیقارسه مدة اقامت مدة سفره تبدل ایدرک اوچ کون اوچ کیجه مسح ایده جکی کبی مسافر اولان ماسحده اثنای مدته اقامته نیت ایدرسه مدت اقامته تبدل ایدرک اندن زیاده مسح ایده مز .

❁ حکمی *

مسئله ۱۲۲ بیان اولندیغی وجهله قولاً وفعلاً خبر مشهورایله ثابت اولهرق علامت اهل سنت اولقله انکاری اکفار ایجاب ایلمز ایسهده موجب ضلالت اولسیدر .

❁ جبیره وصارغی اوزرینه مسح حکملری *

مسئله ۱۲۳ — قریق وچقیق اوزرلرینه صاریلان اغاجلره جبیره و یاره وچبان امثالی اوزرلرینه باغلانان بز وامثالنه صارغی دینوب کاملاً کسب عافیت ایتدکجه غسل مضر ایسه ولو بلا طهارة باغلانیلسه لر دخی بلامدة اوزرلرینه مسح جائز اولهرق عین غسل حکمنده اولقله دوشملریله مسح بوزلمیه جفی کبی غسلهده دخی مسح جائز اولوب التلرینک اصلا غسیله دخی مسح بوزلماز .

❁ ارکان وضوءده مواضع اختلافه کیفیت اختلاف *

مسئله ۱۲۴ — بدایعک بیاننه کوره (فاغسلوا وجوهکم) مقتضاسنجه آبدستده یوزی بر کره غسل بالاتفاق فرض اولوب امرک تکراری عدم اقتضاسنه بناء بردن زیاده سی اوچه قدر مسنوندر لیکن مغسول مفروض بیاننده اختلاف اولنهرق عندالحنفی ظاهر روایتده غسلی فرض اولان حدود وجه بیان اولنماش ایسهده راویت اصولک غیریسنده بیان اولندیغنه کوره وجه مواجهدهدن مأخوذ اولهرق حدودی طولاً الیک اوزرندن عادة صاج بتن محلدن چکه نک نهایتنه قدر وعرضاً ایکی قولانغک یموشاقلری اراسی اولوب هر نقدر کوزلرک واغزو بورنک

ایچلری وصیق اولان صقال و بیق وقاشلرک التلری حدود وجهده داخل اوله رق غسللری فرض اولسی لازمکلور ایسه ده کوزلری غسلک عمی ایرائی و عند الحنفی اغز و بورنک ایچلری وصیق اولان صقال و بیق وقاشلرک التلری مواجهده دن خالی اوله رق کورنمکلرندن و عند الشافعی صویک ایصالنده خرج عذرینه بناءً بونلرک ظاهرلری فرض غسلده ظاهر بشره مقامنه قائم اوله رق بونلر ایله مستور اولوب کورنمیان محللری غسلک فرضیتی بونلری غسله انتقال ایدوب سیرک اوله رق التلری کوریلنلرده غسلک بقای فرضیتی لازمدر عبدالله بلخی ایسه التلرینک مطلقا حدود وجهده دخولنه بناءً غسللرینک فرض اولسنه قائل اولمشدر .

مسئله ۱۲۵ — (وایدیکم الی المرافق) مقتضاسنجه بالاتفاق دپرسکلره قدر برکره الاری غسل فرض اولوب لکن درسکلری غسلک فرضیتنده اختلاف اوله رق ائمه حنفیه عندنده غایت مغیاده داخل اوله رق غسللری فرض اولوب امام زفر (و اتموا الصیام الی الیـل) ده اولدینی کبی عدم دخولنه ذاهب اوله رق عدم فرضیتنه قائلدر .

مسئله ۱۲۶ — (وامسحوا برؤسکم) آتی علی اطلاق دلالة وثبوتاقطعی اولقله بالاتفاق مسح رأس فرض اولوب ولکن مقدار مفروضی تعیینده مأول اولقله اختلاف اوله رق امام مالک حضرتلری (با) متعلق بولنا مسحک مدخولی بولنان رأسه الصاق واتصالی افاده ایدوب نظمک خاص قسمندن اوله رق مدلولینک قطعیتنه بناءً رأس تکمیل باشک اسمی اوله رق جمله سنی مسحک فرضیتنی اقتضا ایدوب ولکن عرفا اکثرک کل مقامنه قیامنه بناءً هیچ اولماز ایسه اکثریسنی مسحک فرض اولسنه قائل اولدینی کبی امام شافعی حضرتلریده مسحله امری رأسی مسحه تعلق ایدوب مسحت یدی بالمدیل و کتبت بالقلم و ضربت بالسيفده اولدینی کبی عرفا برشیئیی مسحله امری ممسوحک کاملاً احاطه واستیعابی اقتضا ایتیموب بلکه اسمک ادنا ما یطلق عاینه متناول اولسنه قائل اوله رق ولو اوچ قیلک مسحیله فرضک حصوله قائل اولمشدر .

ائمه حنفیه ایسه مسحله امرات مسح اقتضا ایدوب عادة الت مسح ایسه اصابع ید اولوب اکثرک کل مقامنه قیامنه بناءً لا اقل اوچ پارمق مقداری محلی مسحک فرض اولسنه قائل اولمشدر که ربع مقداری دیمکدر .

مسئله ۱۲۷ — اهل سنت عندند (وارجلکم الی الکعبین) لامک نصیله
 ارجل ایاق معناسنه رجاك جمعی اولوب اعضای مسغوله اوزرینه معطوف اوله رق
 چپلاق ایاقلری برکړه غسلرینک و مقتضای سنت اوله رق مدتی ظرفنده شرائط
 مسیحی جامع اولان مستلر اوزرینه مسحك جوازیه فرض اولسنه قائل اولوب
 رافضیلر ایسه مشهور اوله رق جر قرائتک ظاهر مقتضاسنه بناءً ممسوح مجرور
 اوزرینه عطفله چپلاق ایاقلری مسحك وجوبنه وحسن بصری حضرتلری
 قرائتینه عمل ایچون مسحله غسلک تخییرینه و بعض متأخرین مسحله غسل بینی
 جمعه قائل اوله رق مطلوب مفروضی تعیینده اختلاف ایملر ایسه ده ۱۲۰ مسئله ده
 بیان اولنان خبر مشهوره بناءً مختار اولان چپلاق ایاقلری غسلک فرض اولوب
 شرائط صحتی جامع اولان مستلر اوزرینه مدتی ظرفنده مسحك جوازیدر .

❦ حدث اکبر اولان احوال نسانک احکامی ❦

مسئله ۱۲۸ — احوال مذکورہ حیض ونفاس واستحاضه اوله رق اوچ
 قسم اولوب حیض لغتده اقق معناسنه و شرعده نجاستدن اولدیغنه کوره بالغه
 اولان مرأمنک رحمندن اوچ کوندن اون کون اراسنده طهور ایدن دمدن
 و حدثدن اولدیغنه کوره قان سببیه خرج عذرینه بناءً مدتی ظرفنده نمازک
 اصل وجوبنه وعدم حرجه بناءً صومک یالکز صحت اداسنه مانع اولان عذر
 شرعیدن عبارت اوله رق حال حیضده ترک اولنان نمازک حال طهرده قضالری
 لازم دکل ایسه ده هر قدر صائمه اولسه دخی حال حیضده ادا و یانرک ایدیلان
 صومک حال طهرده قضالری لازمدر .

❦ مدة حیض ❦

مسئله ۱۲۹ — عند الحنفی حیضک اقل مدتی ساعت اعتباریه اوچ کون
 و اوچ کیجه و عند المالك اقل و اکثری غیرمقدر اولوب عند الشافعی اقلی برقوله
 کوره برکون و برکیجه دیگر قولنه کوره یالکز برکوندر . و اکثر مدتی
 عند الحنفی اون کون و اون کیجه و عند الشافعی اون بش کون اولوب عند الاثمه
 بالاتفاق اقل مدتدن نقصان و اکثر مدتدن زیاده کلان دمدم استحاضه و دم عذر
 اوله رق طهارتله مشروط اولان هیچ برشیئتک جوازی نی منع ایلز .

بناءً عليه هر قدر قان اقرار ايکن اولسه دخی نماز وصومک ادالری جائز اولوب ترك ايتدکاری حالده قضالری لازمکلور اوچ کونله اون کون اراسنده کسیلوب اون بش کوندن اول تکرار کلیرسه کسیلدیکی کونلر دخی حال حیض اولقله نماز واورج و معامله زوجیه ودخول مسجد ومس مصحف وتلاوت قرآن کبی طهارتله مشروط اولان شیلری ادا جائز اولماز .

✽ نفاس ✽

مسئله ۱۳۰ — نفاس لغتده قادینک طوغورمسی معناسنه وشرعده ولادتک عقبنده رحم مادر دن ظهور ایدن قاندن عبارت اولوب چوجغک اکثریسنک خروجی تکمیل ولادت حکمنده اوله رق ابتدا باشی کلیرسه اکثریسنی تعینده اعتبار کوکسنه وعکسنه کلیرسه کوبکنه در .

✽ مدة نفاس ✽

مسئله ۱۳۱ — عند الحنفی نفاسک اکثر مدتی قرق وامام مالکله امام شافعه عندنده التمش کون اولوب اقل مدتی بیان اولندیغی اوزره چوجغک ظهورندن عبارت اوله رق بالاتفاق محدود دکلدر .

✽ حکمی ✽

مسئله ۱۳۲ — حکم نفاسدخی حکم حیض کبی ولو سجده شکر ویا سجده تلاوت اولسون مطلقا نمازک اصل وجوبی وصومک یالکز صحت اداسنی وتلاوت قرآن ومس آیت ومصحف ودخول مسجد وطواف ومجامعت کبی شیلرک جوازینی منع ایدرک حرام قیلار شوقدر وارکه محلنک غیریده اختلاف نیتله حکم قرآن تخاف ایدرک (ربنا اتنا فی الدنيا حسنة وفي الآخرة حسنة وقنا عذاب النار) کبی ادعیه دن اولنلری دعا نیتله و (لا اله الا هو) کبی اذکار دن بولنانلری ذکر نیتله و (الحمد لله رب العالمین) کبی ثنایي مشتمل اولنلری ثنا نیتله تلاوت جائزدر .

✽ حکم ولادة ✽

مسئله ۱۳۳ — اعضاسی ظاهر اولان سقط (قبل الوقت کرک حیا وکرک

میتا ظهور ایدن چوجق) اولسه دخی ولادت صایلهرق قادین نفاس اولوب معتدەنك عدتی تمام وجاریه ام ولد اولور .

❁ حکم استحاضه ❁

مسئله ۱۳۴ — استحاضه بیان اولندیغی اوزره عندالائمه بالاتفاق حیض ونفاسك اقل مدتدن از وا کثر مدتدن زیاده کلان و طقوز یاشنه بالغه اولیان کوچوک قیزلردن واللی بش یاشنی تجاوز ایدرك حیضدن و فیضدن کیسلان آیه وکبه قادینلردن کلان قانلر اولوب عذر شرعی اولهرق نماز و اوروج وجماعت کبی جوازلی طهارتله مشروط اولان شیلرك جوازینه مانع دکلدیر . بویله اولان قادینلر معذوره اولهرق هر نمازك وقتنده قادره آیه ابدست لازم اولدقده ابدست وغسل لازم اولدقده غسل ایدوب عجز حالده تیم ایدرك قان اقرار ایکن دخی نمازی قلملری و اوروجی طوتملری جائزدر .

❁ حکم طهر ❁

مسئله ۱۳۵ — حیض ونفاسك کیسلملرینه طهر دینوب گرك حنفی وکرك شافعی عندنده ایکی حیض آره سنده اقل مدتی اون بش وامام مالک عندنده اون کون اولوب اکثری ایچون حد یوقدر بناء علیه اون کوندن اقدام حیض و قرق کوندن اقدام نفاس کیسلوبده اون بش کوندن اقدام تکرار دم کلسه کیسلمش اولان حیض کونلری حال حیض ونفاس کونلری حال نفاس عد اولنور

❁ نجاستدن طهارت *

مسئله ۱۳۶ — نجاست غلیظه وخفیفه اولهرق ایکی قسم اولوب صوکی مایعك غیریسنده غلیظهك درهم مقدارندن وخفیفهك ربع مقدارندن آزی معفو اولهرق جواز صلاته مانع دکلر آیه ده زیاده لری مانع اولهرق ازاله لری لازمدر مایعه بیلرنده فرق یوقدر جامد اولنلرده غلیظهك درهم مقداری وزنله (۷۰) دانه ارپه مقدار یله مایع اولنلرده ال آیه سیله تقدیر اولنور .

❁ غلیظه و خفیفه ❁

مسئله ۱۳۷ — عندالامام غلیظه نجس اولدیغی اتفاق ادله ایله و عندالامامین

اتفاق ائمه ايله ثابت اولان شيلر اولقله عندالامام ادله نك عدم تعارضنه بناءً بالجملة آت وسائر كوبره لری غلیظه اولوب عموم بلوايه بناءً حقلرنده ائمه اختلاف ايدرك عندالامامین خفیفه لر در آتی یمنان حیوانلرك اتلری و بوللری حقنده ادله وائمه نك اتفاقلرنه بناءً بالاتفاق غلیظه اولوب آتی ینانلرك بوللری بالاتفاق خفیفه ایسه ده اتفاق ادله وائمه یه بناءً انسانلرك و طاق و قاز و اوردكك ترسلری و بدندن چیقان قان وسائر بالاتفاق غلیظه لر در امام محمده كوره (علیکم بالبناها و ابوالها) مقتضاسنجه آتی ینانلرك بوللری طاهر در .

❁ نجاست غلیظه اولان قان ❁

مسئله ۱۳۸ — برعضودن چیقوب اقلر قان اولوب طمارلرده بولسان قان محندن آیریلدقجه طاهر اولدینی کبی ات و جکر و طلاق و بوبره ك و چکر که و بالق قانلری و هر نقدر جوق اولسه دخی پیره و کهله قانلری نجاستدن صایلدقلرنندن جواز صلاته مانع دکلر در شهیدلرك قانلری کندی اوزرلرنده بولندقجه طاهر ایسه ده باشقه شیئه اصابت ایدرسه نجسدر ایسه یه اصابت ایدن سوقاقلرك چامورلری هر نقدر نجاستدن خالی دکلر ایسه ده عموم بلوايه بناءً عین نجاست اولدینی تعین ایدوب ا کلاشیلمدقجه ضرورته بناءً معفو اوله رق جواز صلاته مانع دکلر نجاست حقیقه . مرئیة و غیر مرئیة اوله رق ایکی قسم اولوب قان کبی نجاست مرئیة نك طهارتی اثرینك زوالیله و بول کبی غیر مرئیة ده طهارتی عندالحنفی صیقلامسی ممکن اولنلرده اوچ دفعه طمله سی کیسلانه قدر صیقارق و ممکن اولمیانلرده قوروده رق غسل ایله و عندالشافعی بردفعه غسل ایله حاصل اولور .

* مطهرات *

مسئله ۱۳۹ — ۸۷ مسئله ده بیان اولندینی اوزره حدندن طهارت حال اقتدارده مطلق صویه و حال عجزده تراب طاهره منحصر ایسه ده نجاستدن طهارت مغسولاتده غسل و جلالی آینه مثلوده سیلمك و ارض مثلوده قورومق و دشه ملك و اغاجده یونمق و لاشه مثلوده طوزه و شرابده سرکه یه تحویل و دریده حقیقه و یا حکما دباغت و حیواناتده اهل کتاب اوله رق اهلینك محندن بوغازلمسی و منی

مثلوده چیتيله مك و مست كییلرده دلك و حمام قورنہ سی مثلوده صویك برطرفدن
کیروب دیگر طرفدن چیقمیسی و قیولرده ۱۰۱ مسئلهده بیان اولندینی اوزره
درجات ثلاث اوزرد صو چیقارلمسی ویا صوی چكلمسی بغدادی وارپه مثلوه
حبوباتده تقسیم و یاریسندن ازی تجس ایدن بموقده حلاج اتمق و کوبردهه یاقوب
كل ایتك و زیتون یاغی مثلوده صابون یا تمق و نجس محلی بللو اولمیان ثوبده
لاعلى التعین بر محانی ییقامق کبی شیر اولوب جمله سی ۸۷ مسئلهده بیان اولئان
نظم مذکور ایله جمع ایدلمشدر.

❁ حکم حیوانات ❁

مسئله ۱۴۰ — اوزرلرنده نجاست بولندقجه خنزیردن بشقه بالجمله حیوانلر
حی ایکن طاهر اولوب تلف اولقله تجس ایدرلر لکن خنزیرك كرك دیرسی
و كرك اولوسی بالجمله اجزاسیله عین نجاست اولوب ضرورته بناءً قلیی دیکیشده
استعمال تجویز اولنمشدر.

❁ کتاب الصلوات ❁

مسئله ۱۴۱ — صلوات لغده مطلقاً دعا مضاسنه اولوب صرف جاهل اولان
امی ایله دلسزك نمازلرنده بولندیغندن افعال معلومه واركان مخصوصه دن عبارت
اولان نمازه نقل اولنمشدر افعال معلومه حدثن طهارت . نجاستدن طهارت
ستر عورة . استقبال قبله ایله وقت ونیتدن واركان مخصوصه ده افتتاح تکبیری .
قیام . قرأت . رکوع . سجود . قعدۀ اخیرده تشهد مقداری اوتورمقدن
عبارتدر .

مسئله ۱۴۲ — ۵۸ مسئلهده بیان اولندینی اوزره محکوم به اولان افعال
مكلف اقسامندن نماز (الصلاة عمادالدين فمن اقامها فقد اقام الدين ومن تركها فقد
هدم الدين) مقتضاسنجه دینك دیره کی و معراج مؤمنین و بارگاه الوهیتده مناجات
مسلمین اوله رق کتاب و سنت و اجماع امتله ثابتله اوله رق ضرورات دینییه دن
بعدالایمان افضل مافرض الله اولان عبادۀ خالصۀ بدنییه دن اولوب بالجمله احکام
شرعیه سنه رعایتله جماعتله ادا ایدنلرك دنیاده اسلامیتيله حکم ایدیلهرك اوزرینه
بالجمله احکام اسلامییه اجرا و عقباده مستحق الطاف الهیه اولوب بلاعذر ترك ایدنلر

مستحق عذاب الهی اوله رق عند الحنفی ادا ایدنه قدر حبس اولوب فرضیتنی انکار موجب اکفاردرد .

❁ فرض نمازلی ترک حکمی ❁

فی حکم من ترک الصلوة وحکمہ * ان لم یقر بها حکم الکافر
فاذا اقر بها وجانب فعلها * فالحکم فیہ للحسام الباتر
وبه یقول الشافعی و مالک * و الحنبلی تمسکا بالظاهر
و ابو حنیفة لایقول بقتله * ویقول بالحبس الشدید الزاجر
و المسلمون دماؤهم معصومة * حتی یراق بمسئیر باهر

نظمیله فرض اولان نمازلی بلاعذر شرعی ترک حکمنی بیانده ائمه اربعه نیک قوللی جمع ایدلمشد که انکاری بالاتفاق اکفاردی و اقرار ایدوبده بلاعذر عمدا ترک ایدر سه ائمه ثلثه عندنده قتل و عند الحنفی ادا ایدنه قدر حبس اولتور زیرا حق عبد ایچون حبس مشروع اولدینی کی حق بارینک اداسی ایچوندخی موافق عقل و مقتضای حکمتدر . نماز (نبی الاسلام علی خمس شهادة ان لا اله الا الله و اقام الصلوة و ایتاء الزکوة و صوم رمضان و حج البيت من استطاع الیه سبیلاً) و (الاسلام ان تشهد ان لا اله الا الله و تقیم الصلاة و تؤتی الزکوة و تصوم رمضان و تحج البيت از استطعت الیه سبیلاً) حدیث شریفلی مقتضاسنجه ارکان اسلامیهدندر .

❁ صفتی اعتباریله اقسام صلاة ❁

مسئله ۱۴۳ — فرض . واجب . نافله اوله رق اوچ قسم اولوب فرض اولانده فرض قطعی و فرض عملی اوله رق ایکی قسم اولوب فرض قطعی اولانده فرض عین و فرض کفایه اولوب فرض عین اوقات خمسهایله صلات جمعه . فرض کفایه صلات جنازه اولوب فرض عملی اولان نمازده عند الامام صلات و تردر . هر نقدر صلات و تر امامین حضراتیله ائمه ثلثه کوره سنت مؤکده ایسه ده حضرت امامه کوره عملاً فرض . اعتقاداً واجب . ثبوتاً سنتدر .

فوت اولور سه لزوم قضای و خارج شهرده حیوان اوزرنده عدم جوازی و رمضانده جماعتله جواز اداسی حضرت امامک قولی مؤیدلردر زیرا قضا امرله

واجبك مثلی اتیاندن عبارت اولسی و نوافلك حیوان اوزرنده جواز اداسی و نوافله جماعتك مكروه اولسی صلات و ترك وجوبنی تأیید ایدر .

• واجب اولان نمازلی •

مسئله ۱۴۴ — واجب اولان نمازدرده یا ایجاب باریله واجب اوله رق واجب لعینه در حضرت امامه کوره صلات وتر و پیرام نمازلی و سجدۀ تلاوت کبی (صلات و ترکی بایرام نمازلیده امامین حضراتیله ائمه ثلثه عندنده سنت مؤکده اوله رق نوافلدندر) و یا ایجاب عبدالله واجب اوله رق واجب لغیره اولور صلوات مندوره و صلات طواف و بعدالشروع افساد ایدیلا نوافله نمازلی کبی که عبدك فعلی اولان نذر و طواف و شروع سبیلریله واجب اولمشلردر .

• نافلة نمازلی •

مسئله ۱۴۵ — نافلة دخی یا مؤکده در قبل الظهر و قبل الجمعة و قبل الفجر و بعد الظهر و بعد الجمعة و بعد المغرب و بعد العشاء قلنان سنن نوافل ایله صلات تراویح و امامین حضراتیله ائمه ثلثه یه کوره صلات عیدین ایله و ترکی و یا غیره مؤکده در قبل العصر و قبل العشاء قلنان سننلر ایله صلات اواین و تهجد و تحیه مسجد و صلات ضحی و صلات وضو و صلات تسبیح و برائه و قدر کبی نوافل سائرده در .

• احکام نوافل •

مسئله ۱۴۶ — عند الحنفی درت رکعتی سنت مؤکده لرك درت رکعتی مستقلا بر نماز اوله رق برنجی قعدملری قعدۀ اولی اولقله تشهد اوزرینه قصر اوله رق صلوات شریفه و بعدالقیام سبحانك اوقونماز و درت رکعتی برسلامله ادا اولنور. غیرمؤکده لرك هرایکی رکعتی بر نماز اولدیغندن احکام مذکورنك خلافتنه اوله رق ادا اولنوب هر قعدمه سننده بعدالتشهد صلوٰة شریفه و بعدالقیام سبحانك و اعوذ بسم الله اوقونوب بالجملة نوافلك هر رکعتنده بعدالفاتحه ضم سورده ایدیلور .

❁ فرض نماز لرك اسباب وجوب لري ❁

مسئله ١٤٧ — فرض اولان افعال مكلفك اصل وجوب لري و وجوب ادالري و وجود ادالري كي امور ثلثه دن هر بری ایچون برر سبب حقیقی و بررده سبب ظاهری اوله رق اسباب سته لازمدر .

❁ اصل وجوبك سبب حقیقیسی ❁

مسئله ١٤٨ — قوللری اوزرینه متوالیا توارد ایدن نعم الهیه در زیراً منعمه تشکر منع عایه اوزرینه عقلاً و نقلاً واجب اولوب (لئن شکرتم لازیدنکم) مقتضاسنجه نعمته شکر ازدیاد نعمته باعث اولمقله بالجمله تکالیف الهیه نك فائده سیده مکلفینه عائد اوله رق جناب حق غنی مطلق اولمقله افعالی علل و اغراضدن بریدر لکن نعم مذکورہ دائماً بروقت ایچنده وارد اولدیغندن (اقم الصلاة لدلوك (لزوال) الشمس الى غسق (اول ظلمة) الليل و قرآن الفجر) و امثالی آیت جلیله و سنن سنیه مقتضالرنجه نعم مذکوریه ظرف اولان و قتلر وجوب عبادته سبب ظاهر اوله رق تجدد و تکرر ایتدکجه مسبب اولان وجوب عبادته تکرر ایدرك تجدد ایدر والا امر تکرار اقتضا ایلمیه جکندن تکرار لری مقتضای امر اولیوب بلکه تکرر اسبابك مقتضاسیدر .

❁ حکم سبب ❁

مسئله ١٤٩ — سبب تحقق ایتدکجه مسببك عدم تحقیقنه بناءً سبب اولان وقت کیرمدکجه مسبب اولان نماز و سائر واجبات واجب اولیه رق قبل الوقت قلنان نماز و سائر نافلة اوله رق انکله بمدحلول الوقت وجب اولان واجبات مکلفك ذمتدن ساقط اولیه جقلری کی عندالحنفی سبب اولان و قتلر خروج ایدرك منقضی اولمدقجه (ذمت مکلفده وجوب ادالری تقرر ایتیه جکی جهته) قبل - الادا وقت چقمندن وفات ایدرسه فوت اداسیله ده مسئول و مؤاخذ اولنماز و سفره چیقارسه قصر ایدر زیرا شروع مقارن اولمدقجه اداسیله خطاب الهی وقتك اك صوك جزؤنده توجه ایدم جکندن اندن اقدام اداسیله مکلف دکدر

ائمه ثلثه عندئذ ايسه درت ركعت ادا ايدمك مقدار زمانك مروريله نمازك اداسي كاملاً واجب اولوب اندن صكره سفره چقارسه قصر ايدلمز (بدائع) بناءً عليه اصل وجوبك سبب حقيقيسى نعم مذكوره وسبب ظاهريلريده وقتلريد .

❁ وجوب ادانك سبب حقيقى و ظاهريلرى ❁

مسئله ۱۵۰ — سبب حقيقى نمازه كوره (اقيموا الصلوة) و صومه كوره (فليصمه) و زكاته كوره (اتوا الزكوه) كى خطابات الهيه ايله طلب ادانك فعل ادايه تعلق اولوب سبب ظاهريلريده ادانك شروعه مقارن اولدينى جزؤ وقتدر بناءً عليه شروعه مقارن اولمديجه سبب ادا جزؤ اخيرده طلب اداسيله توجه ايدن خطاب الهيدر

❁ وجود ادانك سبب حقيقى وسبب ظاهريلرى ❁

مسئله ۱۵۱ — سبب حقيقى جناب حقه اداسنى ديله يوب يراشمى وسبب ظاهريله استطاعت عيىدر بناءً عليه هروقتك نمازى اول وقت كيرمدكجه واجب اولمديغىد . فرض اوله رق جائز اولوب دخول وقتله جوارينه نظراً هرنمازك وقتى وجوب اداسنه سبب اولوب اول وقتك خروجندن صكره ادا اوله رق صحيح اوليوب بلكه قضا اولمسنه نظراً نمازك وقتى صحت اداسنك شرطى اولوب بروقت ايچنده هم او وقتك فرضى وهمده اندن بشقه نمازلرك صحتنه نظراً هرنمازك وقتى اول نمازك ظرفى اولمقله اصول فقهمده بيان اولندينى اوزره اوقات مذكوره صلوات مزبورهنك وجوب ادالرينه سبب كنديلرينه ظرف و صحت ادالرينه شرط اولوب صحيح قيمه كوره صومه نظراً معيار وجهه نظراً اركان حكه وقت حجبى كاملاً عدم اشغاله بناءً ظرفه وبر حجبى زيادهيه غير مساعد اولمسنه بناءً معياره مشابه اوله رق مشكلدر .

❁ سبب اولان وقتك انتفاسيه سبب اولان عشائيله وترك انتفالى ❁

مسئله ۱۵۲ — انفابيان اولندينى اوزره اوقات خمسدهه فرض اولان نمازلرك وجوب ادالرينه سبب اوقات مخصوصه لرى اولوب سبب انتفاسى سبب انتفاسى

مستلزم اوله جغندن صلات عشا ايله و ترك وقتلى ايسه بعد المغرب شفقك غيوتبتدن فجر ك قبيل طلوعه قدر اولان زماندن عبارت اولمقله قطب شمالى جوارنده بولنان اهالى كې اقصر ليالیده شفقك غيوتبتيله برابر فجر ك طلوعيله ياتسو نمازيله صلات و ترك وقتلى غائب اولنلره بولرك ادا لرى واجب اولمهرق تحق اويلن و اكندى واقشام و صبح نمازلرندن عبارت اولهرق درت وقت نمازك ادا لريله مكلف اولملى لازمكلوب ابدستده اعضاى مغسوله نك تناقصيله ارکان مفروضه وضوءك تناقصى قيلندن اولور .

❁ فرض اولان نمازلرك اوقات مخصوصه لرى ❁

مسئله ۱۵۳ — (ان الصلوة كانت على المؤمنين كتاباً موقوتاً) امثالى ايات جلاله مقتضاسنجه هر نمازك وقتى معين اولمقله هر نمازى كندى وقتى ايجنده ادا فرض اولوب قبل الوقت قلنان نمازلر نافله اولهرق (دخول وقتله) واجب اوله جق نمازلر انكله ساقط اولميه جغندن عند الحنفى يغمور و سفر كې عذرلر ايله كرك تقديم و كرك تأخير طريقيله ايكي وقتك فرضلرينى ادا اولهرق بروقتده جمع جائز دكلدر زيرا بو وجهله جمع يابرينى دها وقتى كيرمدن قبل الوقت ادا ايدرك تقديم طريقيله اولوب بو ايسه انفا بيان اولنديغى اوزره جائز دكلدر زيرا سبب تحقق ايتدكجه مسبب تحقق ايلز و يا خود وقتك حلولىله اداسى واجب اولان نمازى تأخير ايله فوت ايدوب وقت اخرده قضا ايله اولور بو ايسه فوت ادا اولمقله حلال دكلدر جوازينه قائل اولنلرك دليل اولمق اوزره ايراد ايتدكلرى اثر ايسه برنجى وقتك نمازى اخر وقتله تأخير ايله ايكنجى وقتك نمازى نينده بلافاصله وقتك ابتداسنده ادا ايدرك هر نمازى كندى وقتى ايجنده بربرى ارقه سنده متعاقباً قيلمغه محمول اولمقله مطلوبى اثبات ايدمهز .

❁ مذهب حنفیده دخی ایکی نمازی بروقتده جمعك جوازی ❁

مسئله ۱۵۴ — حسب الضرورة يالكز وقت حجه حجاج مسلمينه برمساعده مخصوصه اولهرق شرطلرينى جامع اولمق شرطيله برنده مؤخر اولانى تقديم ديكرنده مقدمى تأخير طريقيله ايكي محله استحسانا جمع جائز اولوب انلردن برى

امام المؤمنین و یانائی بولمق و جماعتله وقت ظهرده ادا اولمق اوزره صلات عصری وقتدن تقدیمله عرفاتده وقت ظهرده صلات ظهری بعدالادا متعاقباً صلات عصریده ادا ایدرك جمع اولوب ایکنجیسی عرفاتدن بعدالعوده صلات مغربی تأخیر ایله مزدلفهده وقت عشاءه ابتدا اقشام نمازینی بعده یاتسو نمازینی ادا ایله جمع خلاف قیاس اوله رق استحسانا تجویز بیورلمش ایسهده خلاف قیاس تجویز اولنان شی بشقه سنه مقیس علیه اوله میه جغند بونلره قیاسله اعدار سائرهمه بناء محل اخرده تجویز اولنه ماز .

❁ اوقات صلات ❁

مسئله ۱۵۵ — مستحبه و مکروهه اوله رق ایکی قسم اولوب اوقات مستحبه بروجه اتیدر . صباح نمازینک وقتی فجر ثانینک طلوعندن کونش طوغانه قدر اولوب نماز تمام اولمدن کونش طوغارسه نماز بوزیلور . بناء علیه صباح نمازینک ابتداسیله انتهای متفق علیه اولوب ابتدا ادا ایدن حضرت ادمدر .

❁ صلات ظهرک وقتی ❁

مسئله ۱۵۶ — اوילה نمازینک وقتی امام اعظم حضرتلرندن ظاهر روایتده فی زوالدن ماعدا دیکیلان برشیئک کولیکه سی اوزامقده نهایت بولوب قیصالغه باشلایینی وقتدن اعتباراً ایکی مثلی اولانه قدردر دیگر روایتده برمثلی اولانه قدر اولوب امامین حضراتیله امام زفر و ائمه ثلثه حضراتی بوقولی اختیار ایلشلر ایسهده مختار اولان روایت ظاهرده . مختار اولان هر ایکی روایتده کوره ایکندینک ابتدای وقتی صلات ظهرک انتهای اولوب ارالرنده وقت مهمل یوقدر اخر وقتی غروب شمس قدردر .

❁ اقشام نمازینک وقتی ❁

مسئله ۱۵۷ — کونش باتدقدن شفق غائب اولانه قدر اولوب شفقده غروب شمسک عقبنده ظاهر اولان قزیلق ویا اندنصره حاصل اولان بیاضلق اولمق اوزره اختلافیدر .

❦ وقت عشاء ❦

مسئله ۱۵۸ — یاتسو نمازینک وقتی اقشام نمازینک نهایتندن طلوع فجرک قیلنه یعنی صباح نمازینک ابتداسنه قدر اوله رق ارالرنده وقت مهمل یوقدر ،

❦ وقت وتر ❦

مسئله ۱۵۹ — صلات عشاءنصکره قلمق شرطیله صلات عشانک و قئدر بناءً علیه صلوات مفروضه دن هر برینی اوقات مخصوصه لرندن اول قلمق جائز اولدینی کی صکره یه برامقده کناهد زرا براقیلدینی حالدہ قلنان نماز ادا اولیوب بلکه قضا اولوب بو ایسه (فخلف من بعدهم خلف اضاعوا الصلوة واتبعوا الشهوات فسوف یلقون غیا) مقتضاسنیجه بلاعذر فوتی عذاب الیمی موجب اولقله احترازک لزومی بیاندن مستغیدر.

❦ ادا وقضا ❦

مسئله ۱۶۰ — کرک عبادات کی حقوق باری یه و گرک معاملات کی حقوق عبادتہ تعلق ایدرک مأمور به اولان افعال مکلف ادا وقضا اوله رق ایکی قسم اولوب. ادا امرله واجبک عینی. قضا مثانی تسلیمندن عبارت اوله رق اداى محض وادای شبیه بالقضایه وادای محضه اداى محض کامل وادای محض قاصر اولق اوزره اوج قسم اولوب اداى محض کامل بالجمله احکام شرعیه سنی جامع اوله رق صلوات واجبه یی جماعتله وقتی ایچنده ادا وعین مغضوبی سالماً صاحبنه رد و اعاده دن وادای محض قاصر صلوات مذکوریه یی منفرداً ادا وعین مغضوبی جنایتله مشغول اوله رق رد و اعاده دن وادای شبیه بالقضاده لاحقک فوت ایتدیکی اجزای صلاتی امامک فراغندنصکره اتمامندن و بشقه سنک کوله و یا جاریه سنی مهر تسمیه ایتدکدنصکره الوب منکوحه یه تسلیمندن عبارت اولدینی کی قضا دخی قضای محض وقضای شبیه بالادایه وقضای محضدخی مثل معقول و مثل غیر معقول ایله قضایه و مثل معقول ایله قضا دخی مثل معقول کامل و مثل معقول قاصر ایله قضایه منقسم اوله رق درت قسم اولوب مثل معقول کامل ایله قضای

محض صومی صومله و مغصوبك ضمانی مثلی ایله قضادن . مثل معقول قاصر ایله قضای محض حقوق باریده جاری اولیوب حقوق عبادده مغصوبی قیمتیه قضادن . مثل غیر معقول ایله قضای محض موته قدر عجزك بقاسی حالده صومی فدیة ایله وقصاصی دیتله قضادن و قضای شبیه بالادا دخی امامه رکوعده ایریشهرك نمازك فوتندن خوفله تکبیرات عیدی رکوعده و مهر تسمیه اولنان عبد مهمك قیمتی تسلیمله قضادن عبارت اولهرق درت قسمدرکه جمله سنك تفصیلاتی اصول فقهده مذکوردر .

❁ اوقات مکروهه ❁

مسئله ۱۶۱ — مطلقاً نماز قلمسی مکروه اولان وقتلرده ایکی قسم اولوب بری طلوع شمس و نصف نهار یعنی وقت استواء و غروب یقین وقت احمرار اولهرق اوچ قسم اولوب شو اوچ وقتده ۱۴۳ مسئلهده بیان اولنان اقسام صلاندن آنجق آلتی نوعی منعقد اولهیلور .

آنلرده (۱) بو اوچ وقتده حاضر اولان جنبازمك نمازی اولوب بلا کراهه منعقد اولور . (۲) بو اوچ وقتده آتی تلاوت اولنان سجده تلاوت اولوب تنزیهاً مکروه اولهرق (۳) اول کونك صلات عصری اولوب تحریماً مکروه اولهرق منعقد اولور . (۴) بو اوچ وقتده شروعله واجب اولوب افساد ایدیلا (۵) بو اوچ وقتده قلمق اوزره نذر ایدیلا (۶) بو اوچ وقتده باشلانیلا نمازله اولوب معالکراهه منعقد اولورلر ایسهده ظاهر روایتده اول کونك ایکندی نمازندن بشقه سنی ترك ایدوب وقت مباحده قضالری واجبدر . اما اول کونك صلات عصری وقت کراهته توجه خطابه ناقصاً واجب اولدیغی کی ناقصاً ادا اولور .

❁ اوقات مکروهه نك ایکنجی قسمی ❁

مسئله ۱۶۲ — طلوع فجردن صکره (۲) صلات عصردن صکره (۳) صلات مغربدن اول (۴) بایرام نمازلرندن اول کرك مسجدده و کرك خانهده (۵) بایرام نمازلرندن صکره یالکز مسجدلرده و نمازگاهلرده (۶) عرفاتده جمع ایدیلا

صلات ظهر ايله صلات عصر آره سنده (۷) مزدلفه ده جمع ایدیلان صلات مغربله عشا آره سنده (۸) فرض نماز لک وقتلری دارالدقه (۹) جماعتله نماز ایچون قامت آلنور ایکن (۱۰) جمعه خطبه سی اوقونور ایکن اولوب بو وقتلرده مطلقا نافله نماز لر ايله واجب لغیره اولان نمازلردن بشقه نماز لر بلا کراهه منعقد اولوب نوافل ايله واجب لغیره یلر معالکراهه منعقد اولقله ترک ایدیلوب وقت مباحده اعاده لری لازمدر .

✽ نماز قیلق مکروه اولان محللار ✽

مسئله ۱۶۳ — اوقات مکروهه ده ادای صلات مکروه اولدینی کی کعبه معظمه نك طامنده (۲) مزبله ده (۳) مجزده ده (۴) مقبره ده (۵) محل غسلده (۶) حمامده (۷) دره ایچنده (۸) یولده (۹) چقور محله ده (۱۰) دوه پتاغنده (۱۱) قیون پتاغنده (۱۲) صغریتاغنده دخی مکروه اولوب .

نهی الرسول احمد خیرالبشر * عن الصلاة فی بقاع تعتبر

معاطن الجمال ثم مقبره * مزبله طریق ثم مجزره

وفوق بیت الله والحمام * والحمد لله الى التمام

نظمیله جمع ایدلمشدر .

✽ نمازك شروط وارکان ✽

مسئله ۱۶۴ — نمازك وجوب اداسنك شرطلری عقل . بلوغ . اسلام . حیض ونفاسدن پاک اولق اوزره اوچدر .

✽ صحت اداسنك شرطلری ✽

مسئله ۱۶۵ — حدثن طهارت نجاستدن طهارت . سترعورت . استقبال قبله . وقت نیت کی فرضنیدر که نمازه شروعدن اول بولملری لازمدر زیرا شروعك صحتی بونلرك وجود وحصوللرینه متوقف اولقله ولو بردانه سنك فقدانی صحت شروع مانع اولدینی کی اثنای صلاتده فقدانیله دخی نماز فاسد اولور درمختارده نمازك جوازیه صحتك شرطلرینی شرط انعقاد و شرط دوام و شرط بقا اولق اوزره الوچ قسمه تقسیم ایدوب نیت . تحریمه . وقت . خطبه

نمازك انعقادينك وطهارت. ستر عورت. استقبال قبله دوام صحتك وهر نقدر نفسنده ارکان صلاتدن ايسه ده نمازك ابتداسنه تقدم ومقارنتی شرط اولیه رق قرائت بقای صحتك شرطی اوله رق امی بی استخلاف جائز دکلدر.

✽ ارکان صلات ✽

مسئله ۱۶۶ — ارکان صلات اتفاقی واختلافی اوله رق ایکی قسم اولوب ارکان اتفاقیه قیام. قرائت. رکوع. سجود. قعدۀ اخیرده تشهد مقداری اوتورمقدردر. ارکان اختلافیه تکبیر تحریمه. خروج بصنعه. تعدیل ارکاندر زیرا تکبیر تحریمه نك شرط ویارکن اولسی اختلافی اولدینی کی خروج بصنعه امام اعظم حضرتلرینه کوره و تعدیل ارکان ابو یوسفه کوره رکن اوله رق فرضدر بناء علیه هرایکسینه رعایتك لزومی بیاندن مستغیدر.

✽ رکن — شرط — فرض ✽

مسئله ۱۶۷ — رکن ماهیة مفروضه داخل اولان فرضدر ابدسته نسبتله اعضای مفسوله ی غسل و ممسوحه ی مسح و نمازه نسبتله قیام و قرائت کی شرط. ماهیت مفروضدن خارج اوله رق موقوف علیه اولان فرضدر ابدسته نسبتله اعضای مفسوله ی غسل و ممسوحه ی مسح استیعابی و نمازه نسبتله طهارت کی زیرا ماهیت صلات ارکان مخصوصه سندن عبارت اولوب شروط مذکوره ايسه انلردن خارج اوله رق نمازك جوازیه صحتك موقوف علیهی اولان فرضلرنددر فرض ايسه شروط واركانه شامل اولقله هرایکسندن اعمدر برده فرض بونلره شامل اولدینی کی نمازده ارکان صلاتدن هر برینی محل مخصوصنده ادا ایچون قیامی رکوع اوزرینه و رکوعی سجده اوزرینه و سجده ی قعدۀ اخیره اوزرینه تقدیمله ترتیب ارکانی محافظه (ولا بطلوا اعمالکم) مقتضاسنجه شروع اولنان نمازی اتمام و فرضدرده امامه متابعت و امامك نمازینك صحتی رأینده بولنق و امامدن تأخر و امامه عدم مخالفت و اصحاب ترتیبدن ايسه وقت وسعتده قضایه قالان نمازی عدم تذکر و تحریمه واداده کندیسنه مشارکه و امامك امامنه نیت ایلدیکی قادینك عدم تقدم وعدم محاذاتی و اوقات صلاتك

دخولنی تیقن کبی برچوق شیلرده فرض اولمقله انلره شامل اوله رق ولو برینک فوتیله صحت صلات فوت اولور .

وارکان وشروطدن هربری یکدیگرینه مبانیدر زیرا بیان اولندیعی اوزره شروطماهیت مفروضدن خارج اولوب ارکان ایسه اندن جزؤ اوله رق داخلدر .

❁ فرض قطعی - فرض عملی ❁

مسئله ۱۶۸ — فرض. قطعی و عملی اوله رق ایکی قسم اولوب فرض قطعی اوقات خمسده نماز ورمضانده اوروج کبی دلالة وثبوتاً قطعی اولان ادله ایله ثابت اولوب بالاتفاق لزومیه حکم اولنان امر مشروعدرکه انکاری اکفار وترکی فسق ایجاب ایدر فرض عملی ایسه باشی مسحده محل مسحی ربع مقداریه تقدیر وابدستده دیرسکلر و طوپوقلرک مواضع مغسولهده دخوللری کبی دلالة ویا ثبوتاً دلیل ظنی ایله ثابت اوله رق فوتیله صحت مفروض فوت اولور مثلاً آبدستده علی الاطلاق مسح رأس دلالة وثبوتاً قطعی اولان (وامسحوا برؤسکم) امرجلیله ثابت اوله رق فرض قطعی اولمقله انکاری اکفار ایجاب ایدوب حالبوکه ۱۲۶ مسئلهده بیان اولندیعی اوزره هر نقدر مطلق مسحده دلالة وثبوتاً قطعی ایسه ده مقدار مفروضی تعیینده مأول اوله رق ظنی دلالة اولمقله حسب الاجتهاد بین الائمة اختلاف اوله رق انکاری اکفار ایجاب ایلیوب فوتیله صحت مفروض فوت اولور . فرض مطلق اوله رق ذکر اولنورسه کماله بناءً فرض قطعییه حمل اولنور .

❁ ستر عورت ❁

مسئله ۱۶۹ — صحت صلاتک شرطلرندن بولنان ستر عورتده هر نقدر ایپکلی البسه کبی ایرککلره کینمسی حرام اولان شیلردن اولسه دخی ستری لازمدر زیرا انسانک کندی جنسی یانه بیله عورت محلی اچیق اوله رق چیقیمی عقلا و حکمة بلکه طبعاً بیله شایان تقییح اولدیغی بیاندن مستغیدر حرام اولان شیلر ایله ستر عورت نهایت ستر مغصوبله محل مغصوبده نماز کبی حرام اولسهده جواز صلاته مانع اولیه رق ذمت مکلفدن واجب ساقط اولور ستر عورتک لزومی نمازه مخصوص اولیوب بلکه خارج صلاتده و تنها محله اولسه بیله

خلاف ادب و مغایر شرع و انسانیت اوله رق لازمدر یالکز حاجت ناس ضرورت منزله تنزیل اولوب ضرورتلرایسه ممنوع اولان شیلری مباح حکمنده قلمقله ابدست بوزمق واستنجا ایلک وحسبالایجاب تداوی ایچون حاجت مقداری اطبایه کشف عورت جائز اولوب تنها محللرده ستری لازم اولان عورت محلیده اوکو ایله ارقه سی کی عورت غلیظه در .

مسئله ۱۷۰ — نمازده ستری لازم اولان عورت محلی ایرککلره کوره کوبک التندن دیزلری التنه قدر اولوب هر نقدر کوبکی عورت دکل ایسه ده دیزلری عورت اوله رق ستری لازمدر .

هر نقدر خنی و مدبره و مکاتب وام ولد اولسه دخی جاریه نرک ارقه لری ویانلری وقارنلری و حره لرک یالکز یوزلری والترینک ایچلری و معتمد اوله رق ایاقلرندن ماعدا صاحب لریدخی عورت اوله رق سترلری لازمدر .

سن عورت ❀

مسئله ۱۷۱ — درت یاشنه قدر کرک قز و کرک اوغلان چوجقلری ایچون اصلاعه رت محللری اولیوب وفاتلری حالده کرک ایرکک و کرک قادینلرک غسلر جائزدر . درت یاشندن یدی یاشنه قدر اشتها اولنمازلر ایسه یالکز اوکلریله ارقه لری عورت اوله رق سترلری لازم اولوب اشتها اولنورلرایسه عورت محللری توسیع و تغلیظ اولنوب اون یاشندن صکره هر حالده بالغ و بالغه حکملرنده اولورلر .

عورت غلیظه و خفیفه ❀

مسئله ۱۷۲ غلیظه اوکله ارقه و اطرافنی اولوب خفیفه ماعدالریدر جواز صلات ایچون لزوم سترده بینلرنده فرق اولیوب بلکه فرق اچانلری منعه رفق ویا عنف ویا ضربه حرمت نظرک غلظت و خفتلرنده در بناء علیه دیزلرینی اچانلر رفقله و او یلقلرینی اچانلر عنقله و اوکلریله ارقه لرینی اچانلر ضربه منع اولنور .

نیت ❀

مسئله ۱۷۳ — نیت لغده مطلقا قصد معناسنه اولوب شرعه احداث فعلده

جناب حقہ جزما اطاعت قصد ایلکدر نیتک سبب مشروعیتی عبادتی عادتدن وفرض واجب اولان عبادتلی دیکرلرندن تمیز ایچون اولمقله بالاتفاق شروع ایدہجکی اصل عبادتہ نیت لازم اولدینی کبی فرض ویا واجب اولدقلرینی نیتلہ تعیینده لازمدر .

❁ استقبال قبله ❁

مسئله ۱۷۴ — فول وجهک شطر المسجد الحرام) مقتضاسنجه صحت صلاتده حقیقه ویا حکما استقبال قبله شرطدر. دشمن خوفی ویا مرض ویا جهت قبله یی تعیینده اشتباه کبی اعذار مشروعیه بناءً استقبال قبله دن عاجز اولنلره قادر اولدقلری ویا بالتحرری ظن غالبلی حاصل اولان جهت حکما قبله اوله رق استقبالی لازمدر.

❁ تعیین قبله ❁

مسئله ۱۷۵ — مسکون اولان محللرده اسلاف طرفندن بالتعیین وضع اولنان محرابلر و بونلر بولمدیغی حالده جوارنده بولنوب جهت قبله یی بیلان مسلمانندن سؤال بوده بولمدیغی حالده تحرری و اجتهادله تعین ایدہجک جهتی استقبال لازمه اولمقله محرابک خلافه سؤالک وبلا سـوآل تحرینک حکمی اولیه جغی کبی محراب و سؤال ایدہجک کیمسه بولنیه رق بالتحرری تعین ایدہجک جهتک خلافه استقبال ایله قلنان نمازده جائز دکلدر .

❁ وقت ❁

مسئله ۱۷۶ — صحت صلاتده شرط اولان وقت وجوبنه سبب کندیسنه ظرف اولان اوقات مخصوصه لریدر بناءً علیه انار تحقق ایتدکجه اصل وجوب تحقق ایتیه جکی کبی صحتلریده تحقق ایتیه جکندن تیقن و تحقیقلری لازمدر .

❁ احکام اذان ❁

مسئله ۱۷۷ — اذان تأذیندن اسم مصدر اوله رق لغتده مطلقا اعلان معناسنه اولوب شرعده الفاظ مخصوصه ایله وقت صلاتک دخولنی اعلان و محل نمازی تعیین و جماعتی نمازه دعوت و اعلان کلمة الله ایله اعزاز دین و قطع اعذار مشرکین حکمت جلیله سنه بناءً کرک ادا و کرک قضا و کرک حضر و کرک سفرده انفراد

و جماعتله ایرکله کله واجب قوتنده سنت مؤکده اولوب جمعه نك غیریده بر وقت ایچنده بر جامعده ایکن اذان مشروع اولمדיنی کبی بر فرض ایچونده تکرار قامت مشروع اولمديغدن جامعلرده فلان صوک جماعتلرده اعاده اولنمازلر .

(ومن احسن قولا ممن دعا الى الله و عمل صالحا وقال اني من المسلمين)

ایت جلیله سیله مؤذنلرده تقدیر و تحسین بیورلمشدر کرك اذان و کرك اقامه نك صحابری نك شرطاری عقل و اسلام اولوب عدالت و ذکوت و قیام کالری نك شرطی اوله رق بلوغله مشروط دکللردر .

• حکم امامت •

مسئله ۱۷۸ نمازده امامت جماعتک نمازینی امامه ربطدن عبارت اوله رق امام نفسنده منفرد اولغله کندیسنه نسا اقتدا ایلدکجه صحتنده امامته نیت شرط دکل ایسه ده اقتدانک صحتنده شرطدر .

• امامتک شرطلری •

مسئله ۱۷۹ — اسلام . عقل . بلوغ . ذکورت . قرائت . صحت . امامته مانع اولان اعذاردن سلامت اولوب ولو بردانه سنک فقدانیه امامتک عدم صحتنه بناء جماعتک نمازلری ده صحیح اولماز زیرا شروط مذکوره صحت اقتدا ایچونده شرطدر .

• حکم اقتدا •

مسئله ۱۸۰ — اقتدا لغتده مطلقا برکیمسه یه اویمق معناسنه اولوب شرعه ده جماعتک نمازلرینی امامک نمازینه ربط ایدرک انک نمازبنک صحتی کندی نمازلرینک صحتی و فسادی فسادینی مستلز اولمایدر .

• صحت اقتدانک شرطلری •

مسئله ۱۸۱ — امامت غایت اقتدا اوله رق اقتدا صحیح اولمديکجه امامتک عدم تحققنه بناء اشارت اولمدينی اوزره صحت اقتدا امامتک شرطلرینه توقف ایتدیکی کبی صحت امامتدخی بوجه آتی بیان اولنه جق شروط اقتدایه متوقفه در

صحت اقتدائک شرطارندن بری اقتدایه نیت ۲ ولو حکما اتحاد مکاندر بناءً علیه
 راکبک راجله وراجلاک را کبه اقتدارى صحیح اولماز اما امامله جماعت اراسنده
 برحائل بولنورسه صحت اقتداده امامک حاله واقف اولمق کافیدر . (۱) من بینہ
 و بین الامام نہر او طریق اوصف من النساء فلا صلاۃ له (مقتضاسنجہ امامله
 جماعت اراسنده نہر و طریق وصف نسا اقتدایہ مانعلردر (۳) نمازلرک متحد
 اولمسیدر بناءً علیه صلات ظہر قلان امامہ اقتدا ایدرک صلات عصر جائز اولماز
 اما نفل مطلق فرض مقید اولوب مطلق مقیدده داخل اولهرق اتحادلرینہ بناءً
 متفکک مفترضہ اقتداسی صحیح ایسده بنا القوی علی الضعیف لزومنه بناءً
 عکسہ صحیح دکلدرد (۴) مقتدینک اعتقادندہ امامک نمازینک صحیح اولمسیدر
 (۵) تحریمہ وادادہ شتراک شرطیلہ قادینک امام وجماعت رجالہ عدم تقدم
 وعدم محاذاتیدر (۶) انتقالات ارکاندہ امامک حالہ واقف اولمقدرد (۷) ارکان
 صلاتک اداسنده امامہ اشتراکدر بناءً علیه امامدن اول کاملاً رکوع وسجود
 کبی بررکنک اداسیلہ اقتدا باطل اولهرق مقتدینک نمازی فاسد اولور . (۸)
 راکع وساجدک راکع وساجدہ ومومینک راکع وساجدہ اقتداسی کبی ارکاندہ
 وصحیحک صحیحہ ومعذورک صحیحہ اقتداسی کبی شرط صلاتدہ مقتدینک
 امامک مثلی ویا دونندہ بولنمسیدر (۹) اوکجه سی اعتباریلہ جماعتک امامدن
 مؤخر اولمسیدر بناءً علیه تقدمی اقتداسنک صحتہ مانعدرد .

❁ اقسام مقتدی ❁

مسئله ۱۸۲ — مقتدی. مدرک. لاحق. مسبوق. لاحق مسبوق اولهرق درت
 قسم اولوب مدرک تکمیل نمازی جماعتله ادا ایدن . لاحق بعدا لاقتدا غفلت ویا
 سبقت حدث ویا صلات خوف ویا مقیمک مسافرہ اقتداسی کبی برعذرہ بناءً
 نمازک بعض رکعت ویا رکنلرینی امامله برلکده ادا ایدہ میان کیمسه اولوب
 حکمی اول رکنلری ویا رکعتلری اکالده عین مقتدی اولهرق تلاوت وسجده
 سهو ایلز و مسافر ایسه اقامتہ نیتله فرضی تغیر ایلز ومسبوقک خلافتہ ممکن ایسه
 ابتدا فوت اولانی ادا ایدوب بعده اقتدا ایدر .

مسبوق امامله نمازک اولنه ایریشمیان مقتدی اولوب حکمی امامک سلامندن

صکره ایریشه مدیکی رکعتلری ا کالده منفرد اوله رق قرأت حقنده نمازک ابتداسنی ادا ایلمکده اولمقله سبحانک اعوز. بسمله ایله فاتحه وضم سوره ایله قلا ر و تشهد حقنده اخر صلاتی قلمقله قعدۀ اخیره فرض اوله رق ترکیله نمازی فاسد اولور لاحق مسبوق نمازک ابتداسنه ایریشه مدیکی کبی بعدالشروع دخی بیان اولنان حاللره بناءً نمازک بعض رکنی ویا رکعتلرینی امامله ادایی فوت ایدن کیمسسه اولوب اولی اولان امامک سلامندن صکره ابتدا سبقت ایدن رکعتی اتمام ایدوب بعده لاحق اوله رق فوت اولانی اتمام ایلمکدر.

❁ صلات جمعه ❁

مسئله ۱۸۳ — اوقات خمسہ نمازلری کبی جمعه نمازیده کتاب وسنت واجماع امتله ثابت اوله رق اهلنه فرض عین اولمقله انکاری اکفار و بلا عذر ترکی فسق ایجاب ایدر اهلیده وجوبنک شرطلری کندیسنده بولنان مکلفدر.

❁ وجوبنک شرطلری ❁

مسئله ۱۸۴ — سائر نمازلرک وجوب وصحتنده شرط اولان شیلر جمعه نمازینک وجوب وصحتنده دخی شرط اولدقلری کبی فضله اوله رق شهرده ویا اتصالده اقامت وحریت و ذکورت ووجود بصر وصحت بدنله عزیمت وعودته قدرت کبی شیلرده شرط اوله رق بونلرک فقدانی حالنده واجب دکل ایسه ده بولنانلره وقت ظهرده صلات ظهردن بدل و خلف اوله رق اداسی لازمدر. کندیسنه جمعه واجب اولیه رق ویا واجب اولدینی حالده فوت ایدن منفردا صلات ظهیری ادا ایدر.

❁ صحت اداسنک شرطلری ❁

مسئله ۱۸۵ — جمعه نمازی قلنه جق محلاک شهر ویا فهای شهر اولمی (۲) وقت ظهرده قائمسی (۳) موظف خطیب و نأبی بولنسی (۴) قبل الجمعه تلاوت خطبه (۵) اذن عام (۶) امامدن بشقه ایرکک اوله رق لااقل اوچ کیمسسه جماعتدر شروط مذکورده دن برینک فقدانی حالنده صلات جمعه صحیحه اولیسه جغندن فرض ظهرک اداسی لازمدر.

❁ صلات عیدین ❁

مسئله ۱۸۶ — بیان اولندیغی اوزره صلات جمعه بالاتفاق فرض اولوب بایرام نمازلی عندالامام واجب ایسه ده امامینله ائمه ثلاثه عندنده سنت مؤکده لر در جمعه نك كرك وجوب و كرك صحتك شرطلری بونلرده دخی شرط ولوب یالکیز خطبه قبل الجمعه شرط اوله رق واجب اولوب بایرامده ایسه سنت اوله رق بعد الصلاة تلاوت اولنور .

صلات عیدین ایکی رکعت اولوب کندولرینه مخصوص اوله رق واجب اولان تکبیرلرک اوچی اولکی رکعتده قبل القراء اوچی ایکنجی رکعتده بعد القراء اوله رق التی در رکعت ثانیه نك ركوع تکبیریده تکبیرات واجبیه یه مقارنتله واجبدر . اثنای تکبیرده اللر بعدالرفع یانلرینه ارسال ایدیلور .

❁ صلات مریض ❁

مسئله ۱۸۷ — طاعت بقدرالطاقة مشروع اولمقله خسته ومعذور اولنلرک نمازلی کندی قدرت و طاقتلری ایله مقدر ومتناسب اوله رق خسته لق سببیه عجزك شدت و ازدیادنه کوره حکمی تغیر و احکامی تناقص ایدر بناءً علیه قیامدن عاجز اولان قاعدا . ركوع وسجوددن عاجز اولان انلردن بدل ایما ایله والحاصل قدرتنك مقتضاسنه کوره ادا ایدر .

❁ صلات سفینه ❁

مسئله ۱۸۸ — بلاضرورة حیوان اوزرنده ایما ایله نمازك جوازی نوافله مخصوص اوله رق فرض . واجب وبونلره ملحق اولان نمازلی حیوان وزرنده جائز دکل ایسه ده کمی و واپور ایچنده بالجمله شرائط وارکان صلاته رعایت اولنمق شرطلریله ادا لری جائز اولوب ولکن کمینك حال سیرده اولمسی و یا دمیرلی بولنمسی و دمیرلی اولدیغی حالده دخی قییده و یا آچیقده بولنمسی و اچقده بولندیغی حالده دخی شدت روزکارله صاللانوب صاللانما سی احتماللریله احکام صلاتك تغیری ضروری اولوب کیتمکده اولان کمی ایله اچیقده دمیرلی اولوبده صاللانمقده اولان کمیده عندالامام بلاعذر فرض اولان قیامك ترکیله ركوع وسجودله قاعدا نماز حائز

ایسه ده اسائت اولوب امامین حضراتنه کوره فرض اولان قیامی ترکله قاعدا نماز جائز دکلدر . لیکن کیتمکده اولان کمی ایله صاللانمقده اولان کمیده باش دونمسی غالب اولمقه قول امام ترحیح اولنور .

کمی کناردا اولوبده صاللانمقده ایسه کنار حکمنده اوله رق بلاعذر قاعدا بالاتفاق جائز دکل ایسه ده قائما جائزدر . کنارده باغلی اولوبده صاللانمقده ایسه حیوان حکمنده اوله رق کړك قائما وکړك قاعدا جائز دکلدر . اما قاره یه چیقماق ممکن دکل ایسه سریر حکمنده اوله رق جائزدر . بربرینه باغلی اولان کیلر مکان واحد حکمنده اوله رق برنده بولنان امامه دیکرنده بولنان جماعتک اقتدالری جائزدر . وکمیده تحریمه تکبیری وکمی دوندکجه ممکن ایسه استقبال قبله لازم ایسه ده حال عجزده استقبال قبله ساقط اولور زیرا استقبال قبله حقیقی و حکمیدن اعم اوله رق لعذر حال امکانه بیله ساقط اوله بیلور .

✽ صلات سفر ✽

مسئله ۱۸۹ — سفر لغتده مطلقا یوجلیق معناسنه اولوب شرعده ایکی قسم اوله رق بری قصر صلات و ترک ادای صوم رمضان و تمدید مدت مسح و بلا محرم حره یه حرمت خروج و اسقاط اضحیه اقتضایدرک تغیر احکام ایجاب ایدن سفر طویلدرکه عند الحنفی مختار اولان سیر عادی ایله لا اقل اون سکنر ساعتک مسافه یه کیتمکدن عبارتدر . دیکری جمعه و بایرام نمازلرینی و جماعتک ترکی و حیوان اوزرنده نوافلک ادا لرینی تجویز ایدن سفر قصیردرکه مطلقا شمردن خارجه خروجدن عبارت اولوب بومقامده مقصود سفر طویلدرکه عند الحنفی درت رکعتلی فرضلری ایکیشر رکعت قیلماق لازمدر زیرا سفرده عند الحنفی درت رکعتلی فرضلر عزیزه اوله رق ایکیشر رکعت شروع اولمقه اتمام ایدلمز اما عند الشافعی رخصت اوله رق قصر و اتمامده مخیردر . (ومن کان منکم مریضا او علی سفر فعدة من ايام اخر) مقتضاسنجه مختار اوله رق وقت اقامتده قضا ایلک اوزره رمضانده ادای سوءک ترکی و مدت مسحک اوچ کون اوچ کیجه تمیددی و وجوب اضحیه نک سقوطی کبی شیلری اقتضا ایدر . بوجهله سفرك حصولی مجرد مقیم اولدینی بلده نک عمراتی تجاوزله حاصل اوله رق بالجمله احکام سفر اجرا اولنوب حکم

سفرک اجر اسند مسافه مذکور دن از محله کیتک معتبر اولمديغی کبی سفره نیت ایدلمیه رک دنیایی طولاشمق دخی معتبر دکدر سنتلرده قصر جاری اولیوب حل استراحت و قرارده تکمیلا ادا و حال عیجله و فرارده ترک ایدیله بیلور .

✽ عمران بلده ✽

مسئله ۱۹۰ — حیوان قوشدیر مق . جنازه دفن ایلمک کبی مصالح بلده ایچون بر اقیلان محللر اولوب بلده دن ایری اولمديغه بلده حکمنده اوله رق حکم سفرک اجر اسنده انی تجاوز لازم اولوب آراده تارلا و خالی محل ایله بلده دن اوچیوز ادم قدر آیری ایسه حکم سفرک اجر اسنده انی تجاوز لازم دکدر .

✽ حکم سفرک جواز اجر اسنک شرطلری ✽

مسئله ۱۹۱ — عند الحنفی مسافه سفرک اون سکر ساعتدن دون اولماسی (۲) مسافرک بالغ اولسی (۳) مسافرک وطنه عدم دخولی (۴) رأینده مستقل اولوب قوجه سی یاننده قادین . متبوعی یاننده تابع کبی بشقه سنه تابع اولماسی شرط اوله رق خلافلری حالنده احکام سفر اجرا اولنه ییه جغندن متبوعلری سفره نیت ایلدکجه تابعلر مسافر اولماز . متبوعلری سفره نیت ایتدکده تابعلر هر نقدر نیت ایلمسلر دخی حکما مسافر لدر .

✽ حکم اقتداء ✽

مسئله ۱۹۲ — ولونمازده وقت ایچنده مسافرک اقامته نیتیه و یا مقیمه اقتداسیله مقیم اوله رق درت رکعتی فرضلری اتمام ایدرایسه ده خروج و قتله صلات سفر ایکیشر رکعت اوله رق ذمتنده تقرر ایدرک کرک اقامته نیتله و کرک مقیمه اقتدا و تبعیتله فرضی تغیر ایدمه جکندن ادا خصوصنده مقیمک مسافره و مسافرک مقیمه اقتدالری صحیح اولدینگی کبی خروج و قتله قضاده دخی هر نقدر مقیمک مسافره اقتداسی جائز ایسه ده مسافرک مقیمه اقتداسی جائز دکدر زیرا شفع اولده اقتدا ایسه قعده حقند و شفع ثانیده اقتدا ایلمسه قرأت حقنده مفترضک متفله اقتداسی قیلندن اوله رق جائز دکدر چونکه مسافر حقنده قعده اولی قعده

اخیره اوله رق فرض اولوب مقیم حقنده ایسه واجبه اوله رق فرضه نسبتله نفل حکمنده اوله رق مفترضك متنفله اقتداسی لازمکلور بوا یسه جائز دکلدر شفع ثانیده ایسه مسافر حقنده قرأت فرض اولوب مقیمه کوره نافله اوله رق ینه مفترضك متنفله اقتداسی لازمکلور زیرا مقیم شفع اولده قرائتله فرضی اسقاط ایلمکله شفع ثانیده قرائتی نافله در.

❦ صحت اقامتک شرطلری ❦

مسئله ۱۹۳ — عند الحنفی اقامته نیت . عند الشافعی درت کون اقامت (۲) عند الحنفی لا اقل اون بش کون وعند الشافعی درت کون مدت اقامت (۳) رأینده استقلال (۲) سیرسفری ترك (۵) اتحاد محل (۶) محلك اقامته صلاحیتی اولوب بوشرطلر کاملاً بولمقدجه اقامته نیت صحیح اولیه رق حکم سفر اجرا اولنور .

❦ احکام جنازه ❦

مسئله ۱۹۴ — (للمسلم علی مسلم ست حقوق) مقتضاسنجه حیا طوغوب وفات ایدن چوجوق اولسه دخی صاغ اولوب وفاتنه واقف اولنلر اوزرینه جنازه نك غسلی وتجهیز وتکفینی ونمازی وقبرینه ایصالیه دفنی فرض کفایه اوله رق بعضیلرک ادا لریله مقصدك حصوله بناءً دیکر لرندن ساقط اولور .

❦ احکام مذکورهنك وجوبنك شرطلری ❦

مسئله ۱۹۵ — عاقل، بالغ، مسلم اولوب جنازه نك وفاتنه واقف اولمقدر .

❦ احکام نوافل ❦

مسئله ۱۹۶ — نوافلك احکامی مساعدده ومسامحه اوزرینه مشروع اولمقله قیامه قادر ایکن قاعدا ادا بلا کراهه جائزایسه ده قیام ثوابی فوت اولوب سنت فجر دن بشقه هیچ بری قضا اولنماز یالکمز سنت فجر فرضیه برلکده فوت اولمق شرطیه انجق قبل الزوال قضا اولنور و بالجمله نوافل شهر خارجنده حیوان اوزرنده متوجه اولدینی جهتی مستقبلاً ایما ایله جائز اولوب فوق العاده ضرورت مس ایتمدکجه فرض ، واجب ، صلات وتر ، مندورات ، صلات

عیدین و جنازه و یرده آیتی تلاوت اولنان سجده تلاوت ادا ابدیلزلر ایسه ده (الضرورات تبیح المحظورات) مقتضاسیجہ حال ضرورتمده (فان خفتم فرجالا اورکبانا) مفادینجه جائز اولوب بعده اعاده وقضالریده لازمکلمز .

❦ صلات تراویح ❦

مسئله ۱۹۷ — کړك رجال وکړك نسا بالجمله مکلفله صلات تراویح عینا سنت مؤکده اولدینی کبی جماعتله اداسیده کفایه سنت مؤکده در صلات مذکورہ وقتک سنتی اولوب صومک سنتی اولمديغندن ترك صوم ایدنلره دخی مسنونہ اولدینی کبی نهارا بالغ ویامسلمان وحیض ونفاسدن پاك اولنلره ده مسنونہ در وقتی بعدالغشاء کړك بعدالوتر وکړك قبلالوتر طلوع فجره قدر اولوب برکونلاک فرض نمازلرك عدد رکعتلری مقدارنده اولمق حکمتنه بناء بالاجماع یکرمی رکعتر هرقدر ایکی رکعت باشند اوتورمق شرطیله یکرمی رکعتی بر سلامله قیلمق جائز ایسه ده افضل اولان ایکیشر رکعت اداسیدر زیرا ترویحه بونکله حاصل اولور .

هردرت رکعت ترویحه دنصکره اولمقدار توقف مستحب اولمقله جماعت بوتوقفده تسبیح ویاتلاوت ویاسکوت ویامنفردا بشقه نمازایله اشتغاله مخیرلردر . هر قعده سی قعده اخیره اوله رق بعدالتشهد صلاوات شریفه تلاوتی سنت مؤکده ویا واجب اولمی اختلافی اولمقله هرقدر جماعته موجب ملال اولسه دخی ترك اولنماز .

قضا امرایله واجبك مثلنی اتیاندن عبارت اوله رق واجباته مخصوص اولوب تراویح ایسه نافله اولمقله کاملاً فوت اولدینی حالده قضا اولنماز .

❦ احکام سجود ❦

مسئله ۱۹۸ — سجده وضع الجبهة علی الارض یعنی تعظیم ویاتعبد ایچون آنی یره قویمقدن عبارت اولوب ملککړك حضرت ادامہ واولاد یعقوب علیه السلامک حضرت یوسف علیه السلامه سجده لرینه بناء جناب حقک غیریسنه سجده تعظیم جائز ایسه ده سجده تمبذ قطعیا جائز اولیه رق اکفار ایجاب ایدر . سجده تعبد

صلاتیہ . سجده سہو . سجده شکر . سجده تلاوت اولیٰ اوزرہ درت
قسم اولہرق سجده صلاتیہ . رکن صلات اولوب سجده سہو . وقت اداسنہ
مساعدا اولہرق سہو فرضی محندن تأخیر ویا واجبات اصلیدن برینی تأخیر
ویا ترکہ نمازہ عارض اولان نقصانی جبر واکمال ایچون تشہد مقداری اوتوردقدن
صکرہ یالکیز بر طرفہ سلامہ سجده سہو نیتیلہ اینکی کرہ سجده وتشہد
وسلامدن عبارت اولہرق واجبدر .

مسئلہ ۱۹۹ — بیان اولدینگی اوزرہ سجده سہو و جوبند وقتک مساعد
اولسی شرط اولدینندن صباح نمازندہ قبل السلام طلوع شمس وایکندی نمازندہ
احمرار شمس وبعد السلام عمدا نقض وضو کی بر حال وقوعیلہ وقت مساعد
اولماز ایسہ سجده سہو ساقط اولہجنی کی مختار اولان جمعہ وایرام نمازلی
کی جماعت کثیرہ ایلہ قلنان نماز لردہ دخی امامک سجده سہو اوزاقدہ بولنان جماعتک
نمازدن چیقارق ترک متابعتہ نماز لرنی افساددن محافظہ یچون سجده سہو ترک اولنور .
سجده شکر . وقوع بولان بر نعمتہ قارشو جناب حقہ تشکرا بر کرہ
سجده دن عبارت اولہرق مسنونہ مشروعہدر .

❁ سجده تلاوتک احکامی ❁

مسئلہ ۲۰۰ — سجده تلاوتک سبب وجوبی اوقویان حقندہ بالاتفاق تلاوت
ایشیدن حقندہ صحیح اولہرق اہلی طرفندن سجده ایتلرندن برینک تلاوت
ویاستماعی ویانمازده اوقویانہ اقتدا واتباعدن عبارت اولوب بالاتلاوة سجده ایتہ
باقق ویا انی یازمق ویا ہیجہ لیہ رک تلاوتیلہ سجده لازمکلمز .

❁ اہلی ❁

مسئلہ ۲۰۱ — نمازہ مکلف اولنلردر بناءً علیہ نمازہ مکلف اولمدقلرندن
حیض ونفاس حالندہ بولنان قادینلرہ رک تلاوت وکرك استماعلہ سجده واجبہ
دکل ایسہدہ جنبہ واجبہدر .

❁ نمازده حکمی ❁

مسئلہ ۲۰۲ — سجده ایتی نمازده تلاوت ویاستماع اولندقدہ نمازدن جزء

اولمقله انجق نمازده ادا اولنوب ترك اولنديغی حالده خارج صلاتده قضا اولنماز ايسهده سهواً تأخير اولنورسه سلامدنصكره نمازك صحتته منافی برحال واقع اولمدقجه حرمت صلاتك بقاسنه بناءً قضا اولنور نمازده تلاوت اولندقدنصكره تلاوته دوام اولنهجق ايسه درحال سجدهيه وياسجده نيتيله ركوعه واريلوب بعده تلاوت اكمال ايديلور . سجده ايتك تلاوتندنصكره تلاوت امتداد ايتيهجك ايسه نهايت اوچ ايت صكره سجده تلاوت نيتيله ايديلان ركوع وبلانية ايديلان سجود صلات سجده تلاوت مقامنه قائملردر .

مسئله ۲۰۳ — نمازده محل قرأت قیام اوله رق ارکان سائرده قرأة ممنوعه اولمقله قیامك غیریسنده سجده آیتی تلاوته نه او قویانه ونهده ایشیده نه سجده لازمکلمیهجکی کی عندالحنفی مقتیدخی نمازده تلاوتدن ممنوع اولدیغندن انك تلاوتيله دخی سجده لازم دکل ايسهده نمازده کنديسنه مشارك اولميانلر قرأتدن ممنوع اولمدقلرندن كرك خارج صلاتده وكرك منفردا نمازده بولنه رق ایشیدنلره لازمکلور .

مسئله ۲۰۴ — مجلس واحده آیت واحدهنك تکرر تلاوتندن سجدهنك تکرری لازم کلز ايسهده ایت واحدهي متعدد مجلسلرده ویا متعدد آیتلری مجلس واحده تلاوته سجدهنك وجوبی تکرر ایدر.

❁ احکام زکات ❁

مسئله ۲۰۵ — عبادة مالیهدن اوله رق افعال مکلفدن زکاتدخی کتاب وسنت واجماع امتله ثابت اوله رق اهلنه فرض عین اولان ارکان اسلامیهدندر .

❁ حقیقت زکات ❁

مسئله ۴۰۶ — زکات لغتده نماء وزيادهك وبركات ومدح وتطهير معنالرينه اولوب (وما انفقم من شیئی فهو یخلفه) مقتضاسنجه اداسی حالده، اضعاف مضاعفيله خلف وبركات احسان ایدهرک باقي قالان مالی تمیه وتزید (وخذ من اموالهم صدقة تطهرهم وتزکيهم بها) مفادنجه ویرنلری اوساخ بخل ومعاصیدن تطهر وتزکيه ایچون عبادت اوله رق اهلنه مشروع بیورلمشدر بناءً علیه

بالجمله انبیای عظام حضراتی انوار قدسیتله مقدس ومطهر بولندقلرندن بالاجماع زکاتله مکلف دکلردر (واوصانی بالصلوۃ والزکوة مادمت حیا) آیت جلیله سنده توصیه بیوریلان زکاتله مقصد مقامات مقدسه انبیایه لایق اولمیان حالات بشریه دن تطهر وتنزه معناسنه زکات نفس ویاخود واوصانی بتبلیغ احکام الزکوة تقدیرنده اوله رق ۶۵ مسئله ده بیان اولندیغی اوزره بعده الایمان نمازله زکاتک افضل مافرض الله اولدقلرینی و زکاتک شریعت قدیمه دن اولدیغنی بیانه محمول اوله رق سوال وارد اولماز .

شرعه زکات حوایج اصلیه دن فضله نصابه بالغ اوله رق ملک تامله مالک اولوب اوزرندن برسنه کچن مالک (هاتوا ربع عشر اموالکم) مقتضاسنجه فرض اولان مقدارینی اهلنه تملیکا ویرمکدن عبارتدر بناءً علیه حوایجبدن فضله ویا نصابه بالغ ویا ملک تامله مالک ویا نامی اولماز ویا حولان حول بولماز ایسه شرعاً ادای زکات لازمکلمیه جکی کبی خانه سنده اسکان و حیواننه ارباب کبی تملیک مفعله ویا اباحه طریقله تأدییه سی صحیح اولماز .

❁ حوایج اصلیه ❁

مسئله ۲۰۷ — حوایج اصلیه انسانک و افراد عائله سی ایچول مسکن ولوازم بیتیه وملبوسات ومأکولات ومشروبات وارباب صنایعدن هر بریسنک محتاج اولدیغنی آلات وادوات واهلنه کوره محتاج اولدیغنی اسلحه وحیوانات وکتاب واستخدام ایچون کوله وجاریه امثالی امر معیشتجه محتاج اولنان اموال واشیا اولوب احتیاجله مشغول اوله رق معدوم حکمنده اولقله هر نقدر نصابله بالغ و حولان حوله بولنسه دخی زکات لازمکلمز.

❁ نصاب ❁

مسئله ۲۰۸ — نصاب . طرف شارعدن وجوب زکات وامثاله علامت اوله رق نصب وتقدير اولنان مقدارلردن عبارتدرکه اقل مرتبه لری کوشده

ایکیوزدرهم ۱۱۱ التونده یکر می مثقال قیون و کچیده قرق و صغروماندهده اوتوز و دوهده بش دانه اوله رق ایکی قسم اولوب بری (ائمارله مزروعاتک غیریسنده) حولان حول و نما ایله مشروط اوله رق صاحبی ایچون وجوب زکات الحجاب ایدر ائمارله مزروعاتک حوللری ایریشدکری وقت اولوب زکاتلریده عشرلری ایله خراجلرندن عبارتدر دیکری بونلر ایله مشروط اولیه رق صدقه فطر واضحیه و انفاق محارمک وجوبلریله اخذ صدقه نک حرمتی ایجاب ایدر .

✽ ایجاب زکاتده معتبر اولان نماء ✽

مسئله ۲۰۹ — حقیقی و حکمیدن اعم اوله رق مالک تزايد ایدوب ارتمسندن عبارت اولوب حقیقه نماء ربح و تجارت و توالد و تناسل ایله اساءه ایله . حکما نماء مالک صاحبی و یا وکیل و یا نائی یدنده بولنه رق ارتیرمغه مقتدر و متمکن اوله بیلیمکه اولوب التونله کموش فطره تجارت ایچون اولمقله مطلقا نامیلردر .

مسئله ۲۱۰ — نصاب مذکورک زکاتی ایجابنده حوا یچدن فضله و حقیقه و یا حکما نامی اوله رق حولان حول ایله مشروط اولدینی کی ملک تامله مملوک اولمسیده شرط اولوب ملکک تمامیتی ایسه یداً ورقبه مالک اولمقدن عبارت اولمقله مأذون فی التجاره و یا مکاتب و یا مرتهن یدنده مرهون بولن ان ماللرک هر نقدر صاحبی رقبه سنه مالک ایسه ده یداً تصرفه و انلر تصرفه مالک ایسه لرده رقبه سنه

درهم — مثقال

[۱] کوشک نصابند . معتبر اولان بهراون درهمی یدی مثقالدن عبارت اولان بر درهم شرعی اون درت قیراط و برنیراط بش ارپه مقداری اولمقله بر درهم شرعی یتمش ارپه مقدارندن عبارت اولدینی کی بر مثقال و یا ینار یکر می قیراط و بر قیراط بش ارپه مقدارندن عبارت اولمقله بر مثقال یوز ارپه مقدارندن عبارت اولوب کورک وجوب زکات و کورک ادای واجبده اعتبار التونله کوشک عینا وزنلرینه اولوب قیمتلرینه دکلدر . بناءً علیه قیمة نصابه بالغ اولوبده وزنا بالغ اولیان التونله کوشده زکات لازم کلز .

اون درهمی یدی مثقال اعتبارینک سببی

فارق اعظم حضرتلرینک زمان خلافتلرنده اون درهمی اون مثقال و اون درهمی اتی مثقال و اون درهمی بش مثقال اوله رق اوچ درلو درهم اولوب مذکور مثقاللر جمع اولنه رق یکر می بر مثقالک حد وسطیسی نه رق دراهم مذکوره توحید اولنمشدر .

مالك اوليه رق تماميت ملك بولنديغان انلرك يدنده بولنديغى مدتجه نه انلره ونه ده صاحبلىرىنه زكات لازم كليه چكى كى (لازكات فى مال الضمار) مقتضاسىنجه عبد ابق و مال مفقود و مغصوب و مسروق و ياد كزه دوشوب بر زمانلر قالوب و ياقيرده دفن اولنوب محلى اونوديلان و يا مجهول بر كيمسه يه براقيلوب بولمىنان ماللركى ملكك بقاسيله برابر كندىسنه وصول متعذر اوله رق انتفاع ممكن اوليوب ضمار تعبير اولنان ماللردى دى يدا مالكييت بولنديغىدن بر زمانلر كره اله كچكده كچن سنه لرك زكاتى لازم كلمز .

❁ زكاتك اصل و جوبنه سبب ❁

مسئله ۲۹۱ = سبب ظاهرى مكلفك نصاب مذ كوره ملك تامله مالك اولمى . سبب حقيقىسى (آتوا الزكوة) كى خطاب الهينك اداسيله مكلف اولنلره توجهيدر . بناء عليه اموال موقوفه و مغصوبه و مسروقه و غائبه اوله رق ملك تام بولمىنانلره زكات لازم كلز زير ا بونلر ملكك قياميله برابر انتفاع ممكن اوليان ضمار قىلندندر .

❁ اصل و جوبنك شرطلى ❁

مسئله ۲۱۲ — عاقل بالغ حرمسلم اوله رق نصاب مذ كوره ملك تامله مالك اولوب دار اسلامده بولمق كى ولو حكما زكاتك و جوبنه واقف اولمقدىر بناء عليه شروط مذ كوره بولمىنانلره واجب دكلدر .

❁ ووب اداسنك شرطلى ❁

مسئله ۲۱۳ — وجوب اداسنك شرطلى اصل و جوبك شرطلى كندىسنده بولنه رق نصاب مذ كور حقيقه و يا حكما نامى اوله رق (مزروعاتله اثمارك غيرىسنده) اوزرندن برسنه كچمكدىر ۶۵ مسئلهنك حاشيه سنده بيان اولنديغى اوزره (و آتواحقه يوم حصاده) مقتضاسىنجه مزروعاتله اثمارك حوللرى ايرىشدكلرى وقت اولوب زكاتلريده عشرلريله خراجلرندن عبارت اولمقله كرك آز و كرك چوق برسنه ده قاچ دفعه حاصل اولور ايسه زكاتلى لازم كلور باخاصه حيواناتده شرطى اسامه و اموال عروضده

شرطی یاعقد تجارتہ مقارنت شرطیلہ صریحا ویا عروض تجارتلہ برعینی صاتون الموق ویا تجارت ایچون المش اولدینی عقارینی عرض بدلندہ ایجار کبی دلالة تجارتہ مقارن نیتدر بناءً علیہ نقودده ثمنیت و حیواناتده اسابہ واموال سائردهه تجارتہ نیتلہ برابر حولان حول وجوب ادانک شرطلرندندر. بیان اولنان حولان حول نصاب اصلی ایچون شرط اولملقلہ اثنای حولده استفاده اولنان مال کندی جنسنه ضم اولورسه انک حولنه تابع اولهرق حول اصلینک تمامنده جمله سنک زکاتی ادا لازم کلور. (اسابہ دول و دوشیلہ و سود و یوغوردی امثالی منافعیله استفاده ایچون سنه نک اکثریسنی قیرده اوتلا تمقدرکه قیون وچی و صغر و مانده ایله دوه جنسنه مخصوصدر.) بناءً علیہ تجارت ایچون اولمرجه بونلردن بشقه حیوانلره زکات لازم دکلدر .

❁ نصابه اعتبار *

مسئله ۲۱۴ — مقتضای کون و حدوث اولهرق مالک تمام سنهده برحالده بقاسی نادر اتدن اولملقلہ بدایتیلہ نهایتنده تمام اولمق شرطیلہ نصابه اعتبار اصل وجوبک سببی اولان تملک نصابک انعقادی ایچون حولک بدایتیلہ وجوب ادانک تحقیق ایچون نهایتنده اولهرق اثنای حولده نصابه عارض اولان تناقص و تزايدة اعتبار اولمدیغندن اثنای حولده تناقص ایدرسه اصل نصابک زکاتنک وجوب اداسنه ضرر ویرمز ایسهده نصاب کاملاً تلف اولورسه حول باطل اولوب دینک استغراقیلہ باطل اولماز بناءً علیہ تمام حولدن ولو برکون اقدم استفاده اولنان مال کندی جنسنه ضم اولهرق ختام حولده جمله سنک زکاتی تأدییه لازم کلور ایسهده نصابک جمله سی هلاک اولورسه انک حولی باطل اولهرق صکردهدن حاصل اولان نصاب کندی حولنه تابع اولهجنی کبی حولک بدایتیلہ نهایتنده دیندن سالم اولان مالک زکاتی لازمدر .

❁ صحت اداسنک شرطاری

مسئله ۲۱۵ — اداسیلہ مکلف اولنلره کوره صحت اداسنک شرطاری زکاتی ادا ایدرایکن ویا ادا ایچون وکیلنه ویرر ایکن ویا فقیره بلانیت و یروب

دها فقيرك النده ايكن ويا مالندن ايرير ايكن زكاته نيت ايتك ويا مسئله اتيهده بيان اولنه جنی اوزره نصابك جمله سنی تصدق ايتك و تملكاً ويرمك و ويرديكي زكاته منفعت دينويه قصد ايلامك كي شيلردر بناءً عليه بلا نية ويا اباحه طريقه ويا ويرديكي زكات بدلنده ويرديكي كيمسه دن خدمت امثالی برشی قصد ايتك زكاتك صحتنه مانعدر .

مسئله ۲۱۶ — انفا بيان اولنديغی اوزره زكات عبادت مالیه دن اوله رق صحتنده نيتك اشتراطندن بعد الحول بلانية نصابك جمله سنی تصدق خارج اوله رق بالاتفاق صحتيله ذمت مكلفدن فرض اولان زكات ساقط اولور زیرا زكات ذمت مكلفه تعلق ايليوب بلكه نفس نصابه تعلق ايتمكه نصابك هلا كيله بيله ساقط اولور و برده زكات قدرت ميسره ايله واجب اولوب نصابك جمله سنی تصدقه صفت يسرك فوتنه بناءً وجوب زكاته ساقط اوله رق زائل اولور ايسهده نذر ويا كفارت كي واجب اخرنيتيله تصدق ايدرسه منويدن صحيح اوله رق زكاتی ضامن اولور .

بلانية نصابك جمله سنی تصدقه بالاتفاق ذمت مكلفدن زكات ساقط اولور ايسهده زكاتی لازمكلان مالك بعضيسنی تصدق ايدرسه ادايى مطلوب اولان مقدار واجب تعين ايدهميه جكندن ذمت مكلفدن واجبك سقوطنده اختلاف اولنوب ابو يوسفه كوره مطلوب اولان مقدار واجبك عدم تعينه بناءً صحيح اوليه رق تصدق ايتديكي مقدار ايله باقى قالانك زكاتينده ادا لازم اولوب امام محمد كوره قليلی كثره قياسله تعين ايدهميه جكندن تصدق اولتان مقدارك زكاتی ذمت مكلفدن ساقط اولور .

مسئله ۲۱۷ — ويريله جك اولان ماله نظراً صحتك شرطی ويره جكي زكات مال اولوب خانه سنده اسكان وحيواننه اركاب كي منفعت اولماقدر .
كنديلرينه ويريله جك اولان كيمسه لره نظراً شرطی مؤلفه قلوبدن ماعدا (انما الصدقات للفقراء والمساكين والعاملين عايتها والمؤلفة قلوبهم وفي الرقاب والغارمين وفي سبيل الله وابن السبيل) آيت جليله سنده تعداد بيوريلان يدي صنف فقرای مسلميندن اولوب انلرك غريسنه و اصول و فروعی و زوجة سی و مملوك و مملوكه سی كي انفاق و اعاشه لری ايله مكلف و محكوم اولديغی كيمسه لردن

اولما مقدر بناء علیه صنوف مذ کورده نک غیر یسنه و انفاق لریله مکلف اولدیغی کیمسه لره تأدییه صحیح اولیه جغندن انلره ویرمکه ذمتدن واجب ساقط اولماز.

❁ زکاتک محلی ❁

مسئله ۲۱۸ — (انما الصدقات للفقراء والمساكين والعاملین علیها والمؤلفه قلوبهم وفي الرقاب والغارمین وفي سبیل الله وابن السبیل) آیت جلیله یله تعداد بیوریلان سکرز صنفدن شوکت اسلامیه نک کسب قوت ایدرک علت وسببیک زوالی ویا حضرت معاذه خطابا (خذها من اغنیائهم وردها فی فقرائهم) حدیث شریفیه منسوخ اوله رق مؤلفه قلوبک سقوطیه باقی قالان یدی صنف فقرای مسلمیندن عبارتدر زیرا زکاتک محلی زکاتله مکلف اولان اغنیانک فقراسیدر بناء علیه عند الحنفی صنوف مذ کورده دن ولو برینه ویرمکه ذمت مکلفدن وجوب ساقط اولور ایسه ده عند الشافعی صنوف مذ کورده نک هر برندن لا اقل اوچر کیمسه اوله رق یکر می بر کیمسه یه ویرمک ایجاب ایدر .

زیرا امام شافعی حضرت تری (انما الصدقات للفقراء) آیت جلیله سنده (للفقراء) ده لام تملیک ایچون اولوب فقرا فقیرک و صدقات صدقه نک جمعی اوله رق لام تملیکه ذکر اولنا صنوف سبعة نک جمله سنه مضاف قلنه رق مطلق جمع افاده ایدن و اوایله عطف اولمقله صنوف سبعة نک جمله سی استحقاق صدقاتده مشارک اولوب اقل جمع ایسه اوچ اولمقله هر صنفدن لا اقل اوچنه ویرمکه جائز اوله میه جغنه قائل اولمشلر ایسه ده هر یرده زکات و فطره کی صدقات واجبه نک اداسی ایچون بیان اولندیغی وجهله هر صنفدن لا اقل اوچر کیشیدن یکر می بر کیمسه یی بولمق داعی مشکلات و مشقت اولوب مشقت ایسه تهییلی موجب اوله جغنی کی ایت جلیله ده ذکر اولسان فقرا هر نقدر افراد افاده ایدن جمع صیغه سیله ایراد اولمش ایسه ده معروف بلام الجنس اوله رق جمعیتی مضمحل و باطل اوله رق مفرد حکمنده قلنه رق صنوف مذ کورده دن ولو برینه ادا ایله ذمت مکلفدن واجب ساقط اولور زیرا ایت جلیله ده صنوف مذ کورده یی ذکر دن مقصد کندیلرینه اعطای زکات جائز اولان فقرای بیان اولوب انلرک استحقاق لریله انلره تملیکک لزومی تعیین ایچون دکلدر زیرا صدقات عبادت مالیه دن اولمقله حق

باری اولوب انلرك حقی دكلدر بلكه علت احتیاجه بناء انلر كندیلرینه صرفه محل اولوب علت احتیاجده ایسه هر بریسی مساوی اولقله مؤلفه قلوبدن بشقه باقی قالان یدی صنفك كرك جمله سنه وكر كسه انلردن یالكرز بردانه سنه ادا ایله ذمت مكلفدن واجب ساقط اولور .

❁ اموال زكات ❁

مسئله ۲۱۹ — بومقامده موضوع بحث اولان اموال زكات نقود. اموال عروض . سوائم اوله رق اوچ قسم اولوب ۶۵ مسئله نك حاشیه سنده بیان اولنان اعشار و خراج كبی حاصلات ارضیه نك احكام زكاتی نظام مخصوصه تابعدر .

مسئله ۲۲۰ — نصابه مالك اولنلرك اموال موجوده لرینه زكات لازم كلدیكى كبی اموال مطلوبه لرینه ده لازم اولوب هر نقدر بر روایتده عندالامامین سعایت و كتابت و دیت بدللرندن بشقه دیونك جماسی بر اوله رق زكات لازم اولقله كرك از وكر ك چوق اندقجه مرور ایدن سنه نلرك زكاتلرینی ویرمك لازم ایسه ده عندالامام مطلوب اولان دیون. قوی . متوسط . ضعیف اوله رق اوچ قسم اولوب قرضاً و یریلان و بدل تجارت اولان اله جقلر كبی دین قویده قرق درهم مقداری قبض اولندقجه هار كچن سنلرك زكاتلرینی ویرمك لازمدر . ثمن سائمه و خدمت ایچون كوله و جاریه و اسكی پوستی ثوب بدلی كبی تجارت ایچون اولیان شیر بدلی كبی دیون متوسطدن نصاب یعنی ايكیوز درهم مقداری قبض ایدیلدكجه زكاتلرینی ویرمك لازمكلور .

مهر . وصیت . بدل مخالفه . دم عمدن بدل صالح . دیت . بدل كتابت و بدل سعایت كبی مال اولیان شیر بدلی اولان دینی ضعیفدن نصاب مقداری قبض اولنوب اوزرندن برسنه كچمدكجه زكاتی ویرمك لازمكلمز .

❁ نصابك حكم تافی ❁

مسئله ۳۲۱ — زكات مكلفك ذمتنه تعلق ایتیموب بلكه عین ماله تعلق ایتدیكى كبی قدرت میسره ایله واجب اولدیغندن هر نقدر بعدالحولان اولسه دخی نصابك تلف اولسیله یسر زائل اوله رق وجوب زكات ساقط اولور ایسه ده اتلافیه ساقط اولماز .

❁ زکات نقود ❁

مسئله ۲۱۵ — نقود. نقدك جمعى اوله رق كرك مسكوك و كرك كوپله و كرك مصنوع و كرك غير مصنوع مطلقا التونله كموشدن عبارت اولوب فطرة تجارت ايچون اوله رق نامى اولمقله حوايجدن فضله و نصابه بالغ اولوب اوزرلرندن برسنه كچه كده (هاتوا ربع عشر اموالكم) مقتضاسه نجه وزنا قرقده برينى زكات نيتيله تمليكاهلنه ويرمك كتاب. سنت . اجماع امتله ثابت اوله رق نصابه مالك اولنلره فرض عيندر .

❁ حكم مخلوط ❁

مسئله ۲۱۶ — التونى غالب اولان مخلوط خالص التون و كموشى غالب اولان كموش حكمنده اولدينى كي مساوات حالنده دخى احتياطاً خالص حكمنده اوله رق زكات لازمكلوب غشى غالب اولورسه عروض تجارت كي قيمت تقدير اولنهرق زكاتك لزومنده تجارته نيت لازمدر .

مسئله ۲۱۷ — مخلوطك خالص اوله رق التون و كموشى نصابنه بالغ اولور وياهرنقدر خالص اوله رق نصابه بالغ دكل ايسه ده كرك نقديندن و كرك عروض تجارتدن نصابى اكمل ايدمك بشقه مالى بولنور وياغشى غالب اولان مخلوط متلك وقره بشلك كي اثمان رايحه اولوبده ادناى نقديندن زكاتى واجب اولان مقداره بالغ اولورسه هرنقدر تجارته نيت ايدلمسه بيله نقد حكمنده اوله رق بعدالحول زكاتلرى لازمكلور .

❁ زكات عروض ❁

مسئله ۲۱۸ — عروض. عرضك جمعى اوله رق بومقامده نقدينله سواثمك غيرى اولان ماللردن عبارت اولوب عندالحنفى تجارت قصد اولمديجه اموال عروضه زكات لازم كليه جكندن مجرد ترين ايچون النان جواهر احجار و اينجو مقوله سنك قيمتلى هرنقدر نصابلره بالغ اولسه دخى زكات لازم كلز ايسه ده تجارت قصديله النورسه سائر اموال تجارت كي قيمتلرندن قرقده برزكات لازمكله جكي كي يوزك و كوپه امثالنك التون و كموشلرى ولو بشقه ماله ضمله نصابه بالغ اولورسه انلرك مطلقا زكاتلرى لازمكلور زيرا انلر فطرة تجارت ايچوندر .

* اموال عروضاك احكامى *

مسئله ۲۱۹ — نقودله حیوانات سائمه نك غیرى اولان اموال عروضاك زكاتلرینك وجوب ادا لرنده یا بالفعل مبادله ایله عقد تجارتیه مقارن اولمق شرطیه صریحا ویا عروض تجارتیه برعینی صاتون المق ویا تجارت نیتیه الدینی عقاری عرض بدلنده ایجارکی دلالة تجارتیه مقارن نیتیه شرط اولمقله بعده العقد وقبل المبادله تجارتیه نیت ویا کاربولورایسهم صاتارم نیتیه المش اولدینی شیلره زكات لازم کلمز چونکه سبب وجوب تجارت اولوب تجارت ایسه بالفعل مالی ماله مبادله در.

مسئله ۲۲۰ — ائمه اربعه عندنده بالاتفاق اراضی عشریه وخراجیه ومستأجره ومستعاره سنك عشر وخراجنی بعدالادا باقی قالان حاصلاتله تجارتیه نیتله زكات لازم کلمز زیرا بلا مبادله مجرد نیتله سبب وجوب اولان تجارت بولمیه جانی کی کرک عشر وکرک خراج ارضك زكاتی اولمقله (لائى فی الصدقة) حدیث شریفیه برسنه ده برشیدن ایکی دفعه زكات المق منهدر شوقدر وارکه ۶۵ مسئله ده بیان اولدینی اوزره ائمه ثلثه عندنده عشر ارضك غله سنك وخراج رقبه سنك زكاتی اولمقله اراضی خراجیه نك وقتنده خراجی وزرغندن عشری النور ایسه ده عند الحنفی خراجیه عشر اجتماع ایتیمه جکندن اراضی خراجیه دن خراج النوب عشر آلمانزه اراضی عشریه دن عشر النوب خراج النماز زرع برینك ارض دیکرینك اولورسه ائمه ثلثه وامامین حضراتنه کوره عشر زرع صاحبنه لازم کلوب امام اعظم حضر تیرینه کوره تارلا صاحبنه لازم کلبور استیجارده دخی حکم خلاف بویه در .

مسئله ۲۲۱ — تجارت مانع بولمیه رق عقد شرا ویا عقد اجاره ویا اقراض ویا استقراض طریق لریله بالمبادله مال بدلنده مال قزانمقدن عبارت اولوب بویه عقدیه مقارنت بولمیدینندن هبه وصدقه وخلع ومهر ووصیت ووراثت طریق لریله ویریلان مالی قبول کی (مال بدلنده مال اولیان) مجرد قبوله مقارن اولان نیت تجارت قول صحیح اوزره صحیح اولمیدینندن بویه هبه ویا صدقه ویا بدل خلع ومهر ووصیت ووراثت وصالح امثالنی قبول ایله النمان مالر ایله بالفعل مبادله بولمیه رق مجرد تجارتیه نیتله اموال تجارتدن اولمیه جقلرندن زكاتلری

لازمکلمز زیرا بلامبادله تجارت ایچون اولمق فطرة تجارت ایچون یرادیلان نقوده مخصوص اولوب اموال عروض ایسه حوایج بشریه ایچون یرادیلقله بالفعل تجارت قصدیلله مبادلهیه مقارن اولمقدقجه حوایج اصلیه دن معدوده لر در .

❁ زکات سوائم ❁

مسئله ۲۲۲ — سوائم. سائمه نك جمعی اولوب سائمه لغتده مطلقا اوتلایان حیوانلر معناسنه اوله رق شرعده سودی ویاغ وپنیر ودول ودوشی امثالی منافعیله استفاده ایلمك قصدیلله سنه نك اکثریسنی قیرده رعی مباحله اوتلایان قیون وکچی وصغرومانده ومطلقا دوه دن عبارت اولوب زکاتلرینك وجوبنده امام مالکك خلافنه دیگرائمه عندلرنده بووجهله اسامه شرط اوله رق زکاتلری کندیلرینه مخصوص مقدارلردن عبارت اولان نصابلر ایله لازمکلوب بلامبادله عقد تجارتیه مقارن اوله رق بونلر ایله تجاوزت قصد اولنورسه اموال تجارتدن اوله رق (هاتواربع عشر اوالکم) مقتضاسی اوزره ربع عشردن عبارت ولان زکات تجارت لازمکلوب سنه نك نصفنده یم و صمان واوت امثالی نواله ایله بسالنورلر ویاخود بونلر یوک ویا رکوب وعربه وطولاب وزراعت امثالی استخدام ویا اتلرینی یمك ایچون بسلمك کبی حوایج لازمهدن اولورلر ایسه اصلا زکاتلری لازمکلمز زیرا بوصورته حوایج اصلیه دن معدودلردر زکاتك وجوبنده ایسه حوایج اصلیه دن فضله اولمق شرطدر امام مالک عندنده حیوانات مذکورده زکاتك وجوبنده اسامه شرط اولیه رق مطلقا زکاتلری لازمکلور .

❁ نصاب سوائم ❁

مسئله ۲۲۳ — سائمه اولان قیون وکچی ویا ایکیسی مجموعی قرقه بالغ اولوب حوللری تمام اولدقده یوز یکرمییه قدر برقیون ویا کچی زکات ویریلور یوز یکرمیدن ایکیوزه قدر ایکی قیون ویا کچی وایکیوزدن اوچیوز طقسان طقوزه قدر اوچ و تام درت یوزده درت قیون ویا کچی ویریلوب بعده نصابلر اراسنده بولنانلر معفو اولمق اوزره هر یوزده برقیون ویا کچی ویریلور سنه کجمدیکندن انالریله برلکده بولمقدقجه یاوریلرینه زکات لازم کلز ایسه ده برلکده بولنورلر ایسه انالرینه تبعاً یاوریلرده زکات لازمکلور .

❁ صغر ومانداندك نصابلری ❁

مسئله ۲۲۴ — هرقدر یبانی ایله اهلیه دن متولد اولسه دخی اقل نصابلری اوتوز اولوب كرك لزوم زكات و كرك جواز انجیه ده اعتبار افالرینه در بناءً علیه اوتوزدن قرقه قدر بر یاشنده بر بوزاغی تام قرقدن التمشه قدر ایکی یاشنده والتمشدن صكره هر اوتوزده بر یاشنده و یا هر قرقه ایکی یاشنده بر طانه ویریلور .

❁ دوه نك نصابی ❁

مسئله ۲۲۵ — بشدن یكرمی بشه قدر هر بش دوه ده برقیون ویریلوب جمله سنده نصابلر اراسی معفو اوله رق زكات ایجاب ایلز تام یكرمی بشدن اوتوز بشه قدر ایکی یاشنده بردیشی دوه اوتوز اتیدن قرق بشه قدر اوچ یاشنده قرق اتیدن التمشه قدر دوت یاشنده التمش بردن یتمش بشه قدر بش یاشنده تام طقساندن یوز یكرمی به قدر دوت یاشنده ایکی و یوز یكرمیندن صكره دوت یاشنده ایکی دیشی دوه ایله هر بش دوه ده برده قیون زكات ویریلور .

مسئله ۲۲۶ — (المسلمون شركاء فی ثلاث فی الماء والكلاء والنار) مقتضاسنجه صو واوت واتش كبی اوچ شیده ناس شركت اباحه ایله مشترك اوله رق کیمسه نك تحت تملك و احرازنده بولمیزن ایرماقلر و نهرلر و قیولرده صولر و قیرلر و صرعالرده کندی کندیلرینه بتن خدای نابت اوتلر و خالی محله یا تمش اتلر ایله استفاده جمله یه مباح اولوب صاحبسز یرلرده کندی کندینه بتن اوتلر مباح اولدینی کبی مجله نك ۱۲۵۷ ماده سنده بیان اولدینی اوزره بر کیمسه نك ملککنده بلا تسبب کندی کندینه بتن اوتلرده مباح اولغله اجرتله صرعالرده اوتالایان حیوانلرده رعی مباحله اوتلامقله سائمه ارملرینه خلل کلیه چکندن زكات ایجاب ایدر زیرا ویریلان اجرت اوت پاره سی اولیوب بلکه حق دخولدر . چونکه بر کیمسه نك ملککنده کندوسنك تسبی اولقسزین خدای نابت اولان اولر دخی مباح ایسه ده صاحبی کندی ملککنه اخری دخولدن منع ایده بیلور .

مسئله ۲۲۷ — زكات ویرمکده افضل اولان ابتدا اقرباسندن محتاج اولان قرنداشلرینه بعده بونلرک اولادینه بعده قومشولرینه بعده اهل بلده سنه ویرمکدر

قومش-ولق حقنه رعایه زکاتی بولندیغی بلده دن بشقه بلده فقراسنه کوندرمک تنزیها مکروه ایسه ده بشقه بلده ده اقرباسندن محتاج بولنور ویادار اسلامه کوندریلور ویا قبل الحول کوندریلور ایسه بلا کراهه جائزدر . اقرباسندن محتاج اولنلره ویرمک هم صدقه وهمده صیلهٔ رحم اولمقله دیکرلرندن اولیدر.

❁ احکام صوم ❁

مسئله ۲۲۲ — عبادت بدنیهدن بولنان افعال مکلفدن صوم لغتده مطلقاً امساک یعنی طوتمق ویا پشتمق معناسنه اولمقله (فقولی انی نذرت للرحمن صوما فلن اکلم الیوم انسیا) دلالتیه لسانی طوتوب سوز سویلمکدن امساک ایدرک سکوته دخی شامل اولوب شرعه ایسه کرب فرض وکرب نوافل مطلقاً عبادت نیتیه دار اسلامده بولنهرق ویا دار حربده بولنوبده عبادت اولهرق مشروع بیوریلدیغی بر ویا ایکی عادل کیمسه دن ایشیدرک بیلان مسلم مکلف و حیض و نفاسی منقطع اولهرق مکلفه اولان مسلمه نیک عبادت نیتیه (طلوع فجردن عبارت اولان) وقت امسا کدن غروب شمس قدر حقیقه ویا نسیانا ییوب ایچمسی کی حکماً مفطراتدن امساک ایلریدرکه (فمن شهد منکم الشهر فلیصمه) آیت جلیله سی و (صوموا لرؤیته) حدیث شریفی و اجماع امتله صحیح و مقیم اولنلره ایام رمضانده اداسی و (فمن کان منکم مریضاً او علی سفر فعدة من ایام آخر) مقتضاسیجه سفر و مرض عذرلریله ایام اقامت و صحتده قضاسی و نذر و کفارت سبیلریله دیله دکبری وقت ادالری فرض عین اولهرق عبادت بدنیهدن اولوب هر عبادتک صحتلرنده کتاب و اجماع امتله نیت شرط اولمقله ولو نافله هر نه سببله اولسه دخی ائمه اربعه عندلرنده بالاتفاق بلانیة امسا کله اوروج صحیح اولماز و صحت صومده شرط اولان نیتله مقصد قلباً امسا کی قصد ایلکدر زیرا نیتک محلی قلب اولمقله حقیقت نیت اتیان فعلده جناب حق طاعت قصدندن عبارتدر .

ائمه ثلثه عندنده صوم رمضانک صحتنده دخی نیتله تعیین شرط ایسه ده عندالحنفی صحیح و مقیم اولهرق اداسیله مکلف اولنلر حقلرنده ایام رمضان معیار اولهرق معین اولوب معینی تعیین ایسه لغو اوله جغندن صحتنده اصل نیت کافی

اولمغلہ تعیین شرط دکلدر . اماحال مرض و سفردہ وصیام سائرہدہ وقت
ظرف اولمغلہ تعیین لازمدر . (۱)

❦ صوم رمضانك فرضیتی ❧

مسئله ۲۲۳ — صوم رمضانك فرضیتی (فمن شهد منكم الشهر فليصمه)
آیت جلیلهسی و (صوموا لرؤيته و افطروا لرؤيته فان غم عليكم فاكموا شعبان
ثلاثين يوماً ثم صوموا) حدیث شریفی واجماع امتله ثابتہ اولهرق ائمة اربعه
عندہ بالاتفاق هر بر مسلم مكلف صحیح و مقم اوزرینه اداسی فرض عین
اولوب حال حیض و نفاسده اداسی غیر صحیح اولمغلہ هر نقدر صائمه اولسه لدخی
ایام طهر لرندہ قضای لازم كلوب ادله قطعیہ ایله ثبوتنه بناءً انکاری موجب
اکفاردرد (ومن كان منكم مريضاً او على سفر قعدة من ايام آخر) مقتضاسنجه سفر
و مرض عذر لريله ایام معذرتلر بنده افطار ایدوب اعذار مذکورہ نك زوالند انصره
قضالری جائزدر .

مسئله ۲۲۴ — هر نقدر انفا بیان اولندیغی اوزره بالعموم عبادتك وجوبنده
مدار تکلیف اولان عقل و بلوغ شرط ایسهده بعده النية مجنون اولان ویا بابیلان
و غیر مكلف اولان صیبارك شرائطی جامع اولان اوروجلرینك صحتلرینه
بناءً صومك صحتنده عقل و بلوغ و افاقت و اقامت و صحت کبی شیلر شرط دکلدر
بلکه (مروهم لسبع و اضربوهم لعشرة) مقتضاسنجه غیر مكلف اولان صغیر
و صغیره عبادتله الفت و اعتیاد ایچون یدی یاشنده صوم و صلات امثالی عبادتله امر
و منہیاتدن منع اولنوب اون یاشنه بعدالبلوغ ترك اوزره اصرار ایدر لر ایسه شمارله
ضرب اولنور لر زیرا دکنك وقامچی امثالیه ضرب جزای جنایت اولوب بونلر
ایسه جنایتیه هل دکلدردر . بعد النية مجنون اولنلر ایله بایلنلر ك ایریهسی کونلر
اوروجلرینك عدم صحتلری جنون و اغما سبیلر یله عدم نیتلرینه مبنیدر .

[۱] ائمة عندنده صوم رمضانده وقت نیت غروب شمسدن قبل الامساكه قدر
لیلا اولوب عندالحقی ادای صوم رمضان ونذر معین ایله نافلهده غروب شمسدن نصف
نهار شرعیك قییلنه قدر نهارا دخی جائز ایسهده قضای صوم رمضان و شروعله واجب
اولوب افساد ایدیلان نافله و كفارت حج قران و حج متعهده قربان اوروجلری ایله نذر مطلق
اوروجلر بنده کیجهدن نیت لازم اولدیغی کبی كفارت اوروجلر بنده توالیده لازمدر .

❁ صوم رمضانك سبب وجوبی ❁

مسئله ۲۲۵ — خبازیهنك بیاننه كوره مذ هب مختارده (فن شهده منكم الشهر فليصمه) ایت جلیله سیله (صومو الرؤیته) حدیث شریفی مقتضای الرنجه لیلا ویا نهارا جزؤ شهرک شهودی اولوب فخر الاسلام وبشقه لرینك اختیار لرینه كوره هر کون وقت امساك اولان فجر صادقدن نصف نهار شرعینك قیلنه قدر کندی لرنده انشای صوم ممکن اولان وقتدر بوقوله كوره سبب وجوب اولان ایامك اختلافیله واجب اولان صومده مختلف الجنس اولقله هر کون صومك صحت لرنده نیتله تعین شرط اوله جغندن هر کون صومه نیت لازمدر اما نفس لیل ایله نصف نهار شرعینك مابعدنده انشای صوم ممکن اولدیغندن سببیتدن خارجلردر حکم نزرده بویله در.

❁ اثبات هلال ❁

مسئله ۲۲۶ — ائمه اربعه عندنده بالاتفاق صوم رمضان كرك ایت جلیله و كرك حدیث شریف مقتضای اوزره رؤیه هلال رمضانله وقابل اولمدینی حالدہ تکمیل ثلاثین یوم شعبانله واجب اولوب امام اعظم حضر ت لرینه كوره رؤیت هلال اچیق هواده خبر لریله علم حاصل اولان جمع كثیرك اخباریله وبولوطلو هواده كرك اركك وكرك قادین بر عادلك اخباریله ثابت اولوب امام مالك عندنده ایکی کیمسه نك اخباری لازم و امام شافعی ایله امام احمددن ایکیشر قول وارد اولوب اظهر اولان نفع عبد داعیه سی بولمدیغندن عدل واحدك کفایه سیدر نفع عبد داعیه سنه بناءً هلال شوالی اثباتده بالاتفاق عدل واحدك اخباری قبول اولنماز وائمه اربعه نك اجماع لریله وجوب صومده معرفت حساب ومنزله اعتبار یوقدر.

❁ اقسام صوم ❁

مسئله ۲۲۷ — مطلقا صوم. فرض. واجب نافله اوله رق اوچ قسم اولوب بولردن هر بریده فرض معین. فرض غیر معین. واجب معین. واجب غیر معین. نفل مسنون نفل مستحب. تحریم مکر وه. تنزیهاً مکر وه اوله رق سکنز قسم اولوب فرض معین ادای صوم رمضان. فرض غیر معین قضای صوم رمضانله کفارات

اور وجرلی واجب معین مندور معین. واجب غیر معین نذر مطلق و بعد الشروع افسادله قضاسی لازمکلاں و اعتکاف اور وجرلی اولوب. نفل مستنون محرمک طقوزنجی کونیلہ اونجی کوتی برالکده طوتمق. نفل مستحب ایام بیض و عرفہ و بازار ایرتسی و پنجشنبه کونلری و برکون صوم برکون افطارله صوم داود و سته شوال اور وجرلیدر. تحریماً مکروه اولان برنجی کون رمضان بایرامی ایله درت کون ایام تشریقدن عبارت اولان ایام خمسہ منہیدہ طوتیلان اور وجرلر. تنزیہاً مکروه اولان محرمک یالکزطفوزنجی ویا اونجی ویا لکیز جمعه ویا جمعه ایرتسی و نوروز یعنی ایلك بهار و مهر جان یعنی صوک بهار کونلری ایچون طوتیلان اور وجرلدر. کفارات اور جرلرندہ تتابع لازم اولدینی کبی غیر معین اولتلرک صحتلرندہ لیلاً نیت لازمدر.

مسئله ۲۲۸ — صوم قضانک سبب وجوبی ادانک سبب وجوبیدر زیرا قضا امر سببیله واجبک مثانی اتیاندر. صوم مندورک سبب وجوبی نذر و کفارت یمینده نقض یمینله حانث اولق و کفارت قتله خطاً قتل و کفارت ظہارده مقارنته عودت و کفارت جنایت حجدہ ترک واجبله ارتکاب حرمت و کفارت افطارده بلاعذر باشلادینی صوم رمضانی نہارا بوزمق. لعذر محرم ایچون کفارت حلقده طراش اولق کبی شیلدر.

✽ صوم رمضانک وجوب اداسنک شرطلری

مسئله ۲۲۹ — صحت واقامت و حیض و نفاسدن طہارتله حقیقه ویا اولو دارا سلامده بولتمق کبی حکما وجوبنه علمدر صحتک شرطلری حیض و نفاسدن پاک اوله رق نیت ایلمکدر.

✽ رکنی ✽

مسئله ۲۳۰ — رکنی. مفطراتدن حقیقه ویا حکما امسا کدر.

حکمی

مسئله ۲۳۱ — الا لاتصوموا فی هذه الايام فانها ايام اكل وشرب وبعال) حدیث شریفیله استدلال ایدرک امام شافعی و ابو یوسفدن برروایتده وابن مبارک عندلرندہ ایام خمسہ مذکورده صوم چاژدکل ایسهده عند الحنفی نہی مذکور

کراهة تحریمیه محمول اوله رق ارض مغصوبه ده نماز کی تحریمه مکروه اوله رق جائز اولوب حکم معنویسی نیتله ثوابه نائل اولمقدر زیرا برکون رمضان پیرامنده درت کون قربان بایرامنده صومدن نهی ضیافه اللهیدن اعراض کی معنای مجاوره مبنی اولوب ذات صومه نظراً دکدر بناء علیه اصلاً مشروع وصفا ممنوعدر حکم دنیویسی ذمت مکلفده لازم اولان اوروجلردن ایسه واجبک سقوطی ایسه ده مستحب اولان ایام مذکوره ده ترک صومه افطاردر .

❁ احکام حج ❁

مسئله ۲۳۲ — ارکان اسلامیه دن بولنان حج عمرده بر کره فرض اوله رق عبادت مالیه ایله بدنیه دن مرکب اولوب هر عبادتک صحتنده نیت شرط اولمقله کرک فرض و کرک نافله حجک صحتنده دخی نیت شرطدر عمره دخی عبادت اوله رق دیانه مشروعه اولمقله صحتنده نیت احتیاجده حج کی اولوب ولکن عمره امام اعظمه امام مالک عندلرنده انجق سنت مؤکده اولوب امام احمد حج کی فرض اولسنه قائل اولوب امام شافعی حضرتلرندن ایکی قول وارد اولوب اصح اولان فرض اولمسیدر وقت عمره خصوصنده اختلاف اولنوب ائمه ثلثه عندنده بلا کراهة هر وقت اداسی جائز ایسه ده امام مالک عندنده برسنه ده ایکی کره عمره مکروهه در .

❁ حقیقت حج واحکام لازمه سی ❁

مسئله ۲۳۳ — حج لغتده برامر معظمی قصد ونیتدن عبارت اولوب شرعه ده ۶۱ مسئله ده اشارت اولندیغی اوزره عبادت نیتله زمان مخصوصه مکان مخصوصی فعل مخصوصه زیارت مخصوصه دن عبارت اولوب زمان مخصوص طوافه کوره قربان بیرامنک طلوع فجرندن اخر عمره قدر وقوفه کوره یوم عرفه نیک زوالندن یوم نحرک طلوع فجرینه قدر اولان زماندر . مکان مخصوصه طوافه کوره بیت معظم وقوفه کوره جبل عرفاتدر . فعل مخصوصه مقصوده طوافه وقوف اوزرینه مقدم اوله رق حج نیتله میقاتلرک برندن احرامدر . زیات مخصوصه کعبه معظمه یی طوافه مدتی ظرفنده عرفاتده وقفه در . احرامک میقاتلرک برندن اولمسی حجک واجب لرندن اوله رق ترکیله هر قدر حج باطل

اولمازایسه ده جنایت حج اولمقله عودتله احرامه کریلزایسه دم یعنی قربان کسمک ایجاب ایدر بناء علیه حج میقاتلرک برندن حج نیتیه احرامه کیروب مکّه مکرمه به بعدالوصول طواف قدوم اولمق اوزره مسنون اوله رق بیت معظمی یدی دفعه طولاشوب بعده (حرم شریف خارجنده بولنوب مسعا دنیلان محله صفادن بدأ ایله مروه اراسنده کیدوب کلک مناسنه) یدی دفعه سعی ایدوب حج افراد ویا حج تمتعه نیت ایلش ایسه طراش ویا صاچندن ویا صقالندن برمقدارینی کسیدیره رک احرامدن چیقوب حج قرانه نیت ایلش ایسه احرامدن چیقمدن عرفه دن برکون اول مکّه دن مفارقتله عرفاته واروب عرفه کونی اوراده بولنه رق بعد الغروب مزدلفه به عودتله اوراده کیجه لیوب بایرام کونی صباح نمازینی بعدالادا منایه عودتله ذبح قربان ایله شیطانلری طاشلدق دئصکره مکّه به کلوب فرض اولان طواف زیارتی بعدالادا طراشله احرامدن چیقمقدن عبارتدر عمره ده بیان اولندیگی اوزره میقاتلرک برندن احرام ایله مکّه به بعدالوصول طواف وسی ایله طراش ویا صاچندن ویا صقالندن کسه رک احرامدن چیقمقدن عبارتدر.

❁ اقسام حج ❁

مسئله ۲۳۴ — حج افراد. حج تمتعه. حج قران اولمق اوزره اوچ اولوب یالکنز حج نیتیه احرامه کیروب بعدالاداء احرامدن چیقمق حج افراد اولوب ادا ایدنه مفرد بالحج دنیور. بعدالاحرام عمره یی ادا ایدرک احرامدن چیقوب بعده تکرار حج ایچون احرامه کره رک ادای حمله احرامدن چیقارسه حج تمتعه وحج تمتع دینوب ادا ایدنه متمتع بالحج دینور. حج و عمره به نیتله احرامه کیروب احرامدن چیقمدن حج ایله عمره یی برلکده ادا ایدرسه حج قران دینوب ادا ایدنه قارن بالحج دینور. افضل اولان حج قران بعده حج تمتعه در.

❁ طواف ❁

مسئله ۲۳۵ — بیت معظمک حجر اسعد بولنان گوشه سندن بدأ ایدوب صاع طرفدن کیدیتمک اوزره یدی دفعه طولاشوب ینه حجر اسعدده ختم ایتمکدن عبارت اوله رق طواف قدوم. طواف زیارت. طواف وداع ویا طواف صدر

اوله رق اوچ قسم اولوب طواف قدوم ابتدا مکيه دخوله ايدیلان طواف اولوب مسنودر . طواف زیارت بعدالعرفات میناده ذبح قربان ورجم شیاطیندنصکره احرامدن چیقماق ایچون ایدیلان طواف اولوب رکن حج اوله رق فرضدر . طواف وداع ویا طواف صدر بعدالحج مکهدن کیده جکله بیت معظمی وداع ایچون ایتدکاری طواف اولوب انلره واجبدر .

❁ اضطباع - استلام - رمل - هروله ❁

مسئله ۲۳۶ — اوزرنده بولنان حولینک براوجنی صاغ قولتوغینک التیندن الوب صول آموزونه اتمغه اضطباع دینورکه ایرککله سنندر . استلام سلامدن مأخوذ اوله رق طوافده حجر اسوده کلدجک تقییل وقابل اولمازایسه النی سورمک بوده قابل اولمازایسه کا یوزینی چویره رک نمازه باشلارکی تکبیر وتهلیل ایله اشارت ایلمکدر . رمل . بعده سعی ایدیه جک طوافک اوچ اولکی شوطنده پهلوانلرکی اوموزلرینی سله رک آدملرینی طارجه اته رق سرعتله یوریمک . هروله مسعاده سعی ایدرایکن (میلین) دنیلان ایکی یشیل دیره کک یاننه کلدجک سرعتله یوریوب بعده یاواشجه بورومکدرکه کک رمل وکک هروله مشرکله اظهار شجاعت کی سبیلری زائل اولوب مشروعتلری ابقا اولنان مناسک مسنونه در .

❁ مواقیت حج ❁

مسئله ۲۳۷ — مواقیت . میقاتک جمعی اوله رق زمانیه ومکانیه اولق اوزره ایکی قسم اولوب مواقیت زمانیه اشهر معلومه اولوب حج ایچون احرام انجق انلرده جائز اولور انلرده امام اعظمله امام احمد عندنده شوال وذی القعده ایله عشر ذی الحجه اوله رق ایکی ای اون کوندر بونلره کوره یوم نحرده ایام مجدندر . امام مالکک کوره ایام حج شوال وذی القعده ایله ذی الحجه در امام شافعی حضر تارینه کوره شوال وذی القعده ایله ذی الحجه دن اون کیجه در . اشهر مذ کوره نک غیریسنده حج نیتله احرامه کیرر ایسه امام شافعی نک خلافه ائمه ثلثه عندلرنده حج ایچون منعقد اولوب مکروه در امام شافعی حضر تارینه کوره اصح اولان عمره ایچون منعقد اولور .

(مواقیت مکانیہ) نظر کا الہی اولان بیت معظمی احاطہ شریفہ
 مباہی اولہرق حرم شریفی محیط اولان حدود معینہ اولوب اندن
 خارجہ بولنانلرہ آفاقی و مکہ مکرمہ بولنانلرہ مکی و حرمی و اہل
 حرم دینلدیکی کبی میقاتلر ایلہ مکہ مکرمہ اراسندہ بولنان محللرہ حل
 وانلردہ بولنانلرہ حل و اہل حل دینوب صنوف ثلثہنک احرام ایچون
 میقاتلریدہ ترتیب مذکور اوزرہ اولہرق (الحج عرفہ) مقتضاسی اوزرہ
 ادای حج ہرنہ غرض و ہرنہ خالدہ اولورسہ مدتی طرفندہ ولوبر لحظہ عرفاتدہ
 بولنقلہ اولوب عرفات ایسہ حل داخلندہ بولنقلہ تبدل مکانلہ نوعما سفر
 بولنق ایچون مکہدہ بولنانلرک حج ایچون میقاتلری حرم شریف اولوب ادای
 عمرہ ایچون حرم شریفہ دخول قصد ایدنلرک میقاتلری حل اولدینی کبی
 اہل حاک میقاتلریدہ حرم شریفہ مواقیت مذکورہ اراسیدر .

✽ آفاقیلرک میقاتلری ✽

مسئلہ ۲۳۸ — احرام ایچون خارجدن کلنلرہ مواقیت معینہ بش اولوب
 (۱) مدینہ منورہ طرفندن کلنلرک (ذوالحلیفہ) (۲) عراق طرفندن کلنلرہ
 (ذات عرق) (۳) اناتولی و شام طرفندن کلنلرہ رابغ جوارندہ (جحفہ)
 (۴) یمن طرفندن کلنلرہ (یلم) (۵) نجد طرفندن کلنلرہ (قرن) دنیلان
 محللر اولوب (ہن لہن و لمن اتی علیہن من غیر اہلہن) مقتضاسنچہ مواقیت
 مذکورہدن ہر بریسی ولواول دیار اہالیسندن اولسہ بیلہ اوغرایانلرہ دخی
 میقات اولہرق (لایجاوزالمیقات الاحرما ولولتجارة) مقتضاسی اوزرہ ہرنہ
 غرضلہ اولور ایسہ اولسون مکہ کیرمک ایچون بالاجماع مواقیت مذکورہنک
 برندن احرامہ کیرمک واجبدر بناء علیہ بالا احرام حدودی تجاوز ایدر ایسہ
 ائمہ اربعہ عذندہ بالاتفاق عودتلہ احرام لازمکلوب ضیق وقت و یا خوف
 عذریلہ عودتلہ احرامہ کیرہ من ایسہ بالاتفاق دم لازمکلور شوقدر وارکہ جدہ
 و خلیص کبی مواقیت مذکورہ ایلہ مکہ اراسندہ بولنان حلہ دخول احرام
 ایجاب اتمیہ جکنندن بولنلر دن برینہ کیرمک ایچون بالا احرام دخول ایدرک اہل
 حلہ التحاق ایدرسہ اہل حل اولہرق بولنلر کبی بالا احرام مکہیدہ کیرہ بیلور .
 ایشتہ بالا احرام مکہیدہ دخولک جوازندہ حیلة شرعیہ بودر .

مواقیت مذکورہ نك برندن احراملہ مكیہ كلان كیمسہ یا حج ویا عمرہ ایتمدكجہ احرامدن چیقماز بناء علیہ ایکیسندن بری واجب اولور .

❁ حجك سبب وجوبی و حکمی ❁

مسئله ۲۳۹ — (ولله على الناس حج البيت من استطاع اليه سبيلا) ایت جلیله سی و (بنی الاسلام علی خمس الحدیث) حدیث شریفی کبی کتاب وسنت واجماع امتلہ صحیح الوجود اوله رق غلبه سلامت وامنیت طریقله کنديسنك وعيالك حوايج اصلیه لرندن فضله ادای حج ایدوب خانه سنه عودت ایدنه قدر حالنه مناسب زاد وراحله سنه کافی مالی اولان عاقل و بالغ حر مسلم وفاسق ومجوسی اولیه رق عاقل و بالغ ولوعبد زوجہ سی ونسبا ویا رضا ویا دامادی کبی صهرا بشقه محرمی بولمق شرطیله کنديسنك ومعیتده بولنانلرك نفقه لر بله کیدوب کلمکه مقتدره اوله رق شرائط وجوبی مستجمعه اولان حره مکلفه یه امام اعظمدن اصح روایت و ابو یوسف وامام احمد و امام مالک حضراتنه کوره قادر وقادره اولدقلری ایلک سنه دهه علی الفور عمرده بر کره حج فرض عین اولوب بعد الفرض تأخیر ایله فسقه نسبت اولنه رق شهادتلی رد اولنور ایسه دهه حج کفارت ذنوب اولمقله نه زمان ادا ایدرسه اثم تأخیر ساقط اولور امام شافعی عندنده وجوب اداسی عمری اوله رق تأخیر جائزدر .

مسئله ۲۴۰ — فرائض سائرہ مکرره اولدینی حالده حجك عدم تکرری (ولله على الناس حج البيت) مقتضاسنجه سبب وجوب اولان بیت معظمك عدم تکرریدر زیرا صوم وصلات امثالی فرائض موقوفه نك تکرر ادالری سبب وجوبلری اولان اوقاتك تکررینه مبنیدر زیرا اصول فقهده بیان اولنه دینی اوزره امر مطلق تکرار اقتضا ایلز انك ایچون (فمن زاده فهو تطوع) بیورلمشدر . حجه عبادت مالیه وبدنیه دن مرکب اولمقله صحت اداسنده نیت شرطدر .

❁ صفت حج ❁

مسئله ۲۴۱ — حج ایجابنه کوره فرض . واجب . تطوع . حرام .

مکروه اوله بیلور زیرا استطاعت مالیه و بدنیه مالک اولنلره عمرنده برکرد
فرض و تکراری تطوع اولوب (لایحاوزالمیقات الاحراما ولولتجارة) مقتضاسی
اوزره بقعه مبارکه یی تعظیما خارج میقاتدن دخول ایدنلره احرامله حج و یا
عمره دن بری واجب اولمقله حجی اختیار ایدرسه واجب اولوب هر قدر ذمتدن
وجوب ساقط اولور ایسه ده مال حرام و یا ریا و سمعه طریقله حج حرام
و خدمته محتاج اولان والدینی کبی استیذان لازم اولنلردن بلا استیذان
مکروه در .

مسئله ۲۴۲ — حج فرض اولوبده قبل الادا مالی تلف اوله رق اداسندن
عاجز اولنلر هر قدر وفاسنه قادر اولمسه بیله بالاستقراض ادای حج جائز
اولوب (ان الله مع الداین حتی یوفی دینه مالم یکن دینه فیما یکره الله تعالی)
مقتضاسنجه ادائی جزما قصد ایدوبده قادر اوله میهرق وفات ایدرسه جناب
حق مؤاخذه بیور میرب بلکه اخرتده داینی ارضا بیوره جنی موعوددر . حج
واجب اولوبده اداسنه مقتدر اوله میهرق قبل الادا وفات ایدرسه بالاتفاق وجوب
ساقط اولوب بعد الاقترار وفات ایدرسه امام شافعی و احمد عندلرنده ساقط اولیه رق
وصیت ایتسه بیله دیون سائره کبی ترکه سندن احجاج لازم کلوب امام اعظمله
امام مالک عندلرنده ساقط اوله رق وصیت ایلدکجه ورثیه احجاج لازم کلز ایسه ده
وصیت ایلش ایسه ثلث مالندن امام اعظمله احمد عندلرنده بلد سندن امام مالک
عندنده وصیت ایتدیکی محلدن امام شافعی عندنده میقاتدن احجاج لازم کلور .

❁ شروط حج ❁

مسئله ۲۴۳ — اصل وجوبنک شرطری . وجوب اداسنک شرطری . صحت
اداسنک شرطری . فرض اوله رق وقوعنک شرطری اولق اوزره درت نوع
اولوب (۱) وجوبنک شرطری اسلام . دار حربده بولنه انلره وجوبنه علم .
عقل . بلوغ . حریت . شهر حجه و یا اهل بلده سنک حجه خروجلری وقتنده
استطاعت مالیه و بدنیه مالک اولمقدر بناءً علیه عند الحنفی حق اداده فروعله
مکلف اولمقدرندن غیر مسایمه و دار حربده مسلمان اولوب وجوب حجی بیلمیانلره
و مجنون و معتوه اولنلره و غیر بانغه و مملوک و مملوکیه و استطاعت مالیه و بدنیه

مالك اولميانلره حج واجب دكلدر قبل الوقت قلنان نمازله بعدالوقت واجب اولان نمازلر ساقط اولمدقلى كى قبل الوجوب ايديلان حج ائمه اربعه عندنده نافله اولمقله بعدالوجوب لازمكلان حج آنكله ساقط اولميه رق تكرر اداسيله واجبك ذمتدن اسقاطى لازمدر .

• وجوب اداسنك شرطلى •

مسئله ۲۴۴ — اصل حج واجب اولان كيمسهده بتمامها بولنورسه بنفسه اداسى لازم اولوب استطاعت بدنيه كى بعضيسى بولنماز ايسه بدل حج وقبل الادا وفاتى حالده وصيت واجب اولوركه اوده استطاعت بدنيه وماليه ايله امنيت طريق وقادين حقنده عدم محرم وعدم عدتدر .

• صحت اداسنك شرطلى •

مسئله ۲۴۵ — احرام . زمان . مكان . تميز . بلوغ . مباشرة افعال حج . عدم جماع احرامه كيرديكى سنه ادا اولوب شروط مذكورهدن ولو بردانهسى بولنسه اعادهسى لازمكلور عندالحنفى حال احرامده وطى جائز دكل ايسهده عقد جائز اولوب ائمه ثلثه عندلرنده عقدده جائز دكلدر امام احمدك خلافه طلاق رجعيده مراجعت جائزه در .

• فرض اولان حجدن وقوعينك شرطلى •

مسئله ۲۴۶ — اسلام . اسلاميتك موته قدر بقاسى . عقل . بلوغ . قادر ايسه بنفسه اداسى ونافله حجه عدم نيت وعدم افساد وبشقه سندن حجه عدم نيت اولوب فرضلريده (۱) ميقاتلرك برندن (لبيك اللهم لبيك لا شريك لك لبيك ان الحمد والنعمة والشكر لك) ديهرك تلييه ويا تلييه مقامنه قائم اولان اذكار سائر وياسوق هدى ايدرك تقليد بدنهدن عبارت اولان احرام اولوب ابتداء شرط . انتهاء ركندر . ابتداء شرط اولديغندن هر نقدر مكروه ايسهده اشهر حج اوزرينه تقديمى جائز اولوب انتهاء ركن اولديغندن حجي فوت ايدن سنه اتيهده قضا ايچون استدامه ايتيوب عمره ايله احرامدن چيقارق سنه اتيهده يكي دن احرامه كيرهرك قضا ايدر (۲) يوم عرفه نك زوالندن يوم نحر ك طلوع

فجرینک قییلی اراسنده هر نه سبيله اولورسه ولور لحظه عرفاتده (بولنق معناسنه) وقفه (۳) مناده قربانلری بعد الذبح رجم شیطینه طواف زیارتک یدی شوطندن اولکی درت دفعه سیدر. صکره کی اوچ دفعه سی واجبدر حجک بوایکی فرضلری بالاتفاق رکن اولقله هانکیسی فوت اولسه صحت حجه فوت اوله رق بشقه سنه لر قضاسی لازمکلور عندالبعض طواف ونیتله اولاه احرام ثانیای ووقوف ثالثا طواف زیارت کی فرضلری ادا بیننده ترتیبه رعایتله هر فرضی محله ادا ده فرضدر.

❁ محظورات احرام و حج ❁

مسئله ۲۴۷ — محرمه احرامده ایکن ممنوع اوله رق حجی افساد ایدن و یا جنایت اوله رق قربان کسمک کی جزا ایجاب ایدن محرمات ایکی قسم اولوب بری محرمک نفسنده واقع اوله جق شی دیکری بشقه سنده واقع اوله جق شیردر. کندی نفسنده واقع اوله جق محرمات (لارفت ولافسون ولاجدال فی الحج) مقتضاسنجه حال احرامده معامله زوجیه ده بولنق و ترک واجب و یا ارتکاب حرمتله فسق و دیکریله نزاعده بولنق و دیکیشلی بیسه کینمک و باشنی فس و سائر شی ایله ستر ایلمک و تراش اولق و صاچ و صقال و طرناغنی کسمک و عطر سورنمک کی منیات اولوب دیکری آوه مباشرت و یا اشارت و یا دلالتله تعرض ایلمک و داخل میقاتده بولنان اغاجلری و اوتلری کسمک کی شیر اولوب جمله سی حال احرامده ممنوع اوله رق جنایت حج اولقله بر قربان کسمک کی جزا ایجاب ایدر.

❁ اقسام جنایت ❁

مسئله ۲۴۸ — جنایت حج و یا احرام بری احرامه دیکری حرمه عائد اوله رق ایکی قسم اولوب احرامه عائد اولان احرامده بولنانلره مخصوص اوله رق جزا اولق اوزره دم یعنی قربان کسمک و یا صدقه و یا بونلرک قیمتلرینی تصدق ایجاب ایدر. قارن بالحج ایسه ایکی قربان کسمک ایجاب ایدر.

مسئله ۲۴۹ — دم ایجاب ایدن جنایت ایکی قسم اولوب بری عرفاتده وقفه دنصکره احرامده ایکن مجامعت و یا طواف زیارتی جنب ایکن یا بمقدرکه جزالری دوه و یا صغر قربان کسمکدر.

دیگری احرامده ایکن عطر سورنمک ویا صاچنه ویا صقالنه یاغ ویا قته سورنمک و عادت اوزره دیکیشلی الیسه کینمک وباشنی فس و امثالیه ستر و تراش ویا قیلارندن کسمک کبی منہیات احرامدن برینی ایشلمکدر که جنایت اولقله جزالری قیون ویا کچیدن قربان کسمکدر .

❁ صدقه ایجاب ایدن جنایتلر ❁

مسئله ۲۴۳ — بر عضوون از مقدارینه طیب سورونمک و برکوندن ازمندده دیکیشلی الیسه کینمک وباشنک و صقالنک ربغندن ازینی تراش و بر طرناق کسمک و طواف قدوم ویا صدی طهارتسز یا بمق کبی شیلر اولوب جزاسی فقرایه یارم صاع یعنی بشیوز یکرمی درهم مقداری بغدای ویا بر صاع یعنی بیک قرق درهم مقداری ارپه ویا قوری اوزوم ویا خورمه صدقه ویرمکدر .

❁ تصدق ایجاب ایدن جنایتلر ❁

مسئله ۲۴۴ — احرامده ایکن کهله اولدیرمک ویا دیری ارله رق یره برامق و چکر که تلف ایلمک کبی شیلر اولوب جزاسی صدقه فطردن آز صدقه ویرمک ویا اوروج طوتمقدر .

❁ قیمتلرینی تصدق ایجاب ایدن جنایتلر ❁

مسئله ۲۴۵ — حرمک صیدنی قتل ویا اشارت ویا دلالتله تعرضده بولنه رق اتلافنه سبب اولمق در که جزاسی قتل اولندیغی محله ویا یقیننده ایکی اهل حبره طرفندن تقدیر اولنان قیمتلرینی تصدق ایلمکدر .

❁ حرمتی حرمه عاند اوله رق محرمه و بشقه لرینه شامل اولان جنایتلر ❁

مسئله ۲۴۶ — حرمک آوینی آولامق و نباتاتی کسمک اولوب کرک محرم و کرک بشقه لری اولسون فاعلنه قیمتلرینی تصدق لارمدر مملوک ایسه صاحب لرینه قیمتنی ویرمکده لازمدر . زیرا بری حق باری دیگری حق مالکدر .

❁ احکام احصاء ❁

مسئله ۲۴۷ — بعدالاحرام بر عذر شرعی به بناً ادای حجدن منع اولنان محرم

مفرد بالحج ویا مفرد بالعمرة ایسه حرم شریفه بر قربان ویا قیمتی وقارن بالحج ایسه ایکی قربان کوندروب هر نقدر ایام نحر دن اول اولسه دخی احرامدن چیقماق ایچون قربانلرک بوغازلنه جفی وقتی تعیین ایدرک بعد الذبح احرامدن چیقار .

❁ بدل حج ❁

مسئله ۲۴۸ -- استطاعات مالیه سی بولنوبده بالذات کندیسی اداسندن عاجز اوله رق استطاعت بدنیه سی بولمیانلره بدل کوندرومک اداسی جائز اولمقله اولوجهله اسقاط واجب لازمدر .

❁ احکام اعتکاف ❁

مسئله ۲۴۹ — ائمه اربعه عندنده افعال مکلفدن اعتکاف کرک واجب و کرک سنت ویا نفل نماز و اوروج کبی عبادت بدنیه دن اولمقله صحتنده نیت شرطدر . اعتکاف (ان طهرا بیتی للطائفین والعا کفین) آیت جلیله سنک دلالتیله شریعه قدیمه دن اوله رق لغتده (ویعکفون علی اصنام لهم) مفهوم منجه عبادت ایچون بر محله حبس نفس ایدوب اکثمتک معناسنه اسم اولوب شرعه عندالامام ولومیز ایرکک هر نقدر اوقات خمسده نماز قلنمسه بیله موظف امام و مؤذنی بولنان مسجد جماعتده و امام شافعی و مالک عندلرنده مطلق مسجدده و امام احمد عندنده جمعه نمازی قلنان مسجدده عبادت نیتله مکث ایدوب اوراد و اذکار و عبادات و طاعاته اشتغال ایدرک کیفیت مخصوصه اوزره اکثمتسیدرکه نذر ویا شروع ویا تعلیق ایدرک ایجاب عبدایله واجب ورمضان شریفک عشر اخیرنده علی طریق الکفایه سنت مؤکده و عشر اخیرک عیریسنده هر نه زمان اولسه ولور لحظه مستحب اوله رق اوچ قسم اولوب مذهب مختارده نذر سبیلله واجب اولان قسم اولک صحتنده بالاتفاق صومده شرطدر . بناء علیه بلا صوم برای اعتکاف نذر ایلسه صائم اوله رق ایفاسی لازم کلور عندالامام قضای حاجت کبی حاجت طبیعیه . وادای عید و جمعه کبی حاجت شرعیه ویا بولنمدینی مسجدک یقیامسی ویا جبراً خارجه آتلمسی کبی حاجت ضروریه مس ایتمدکجه محل اعتکافدن خروج وحسب الضروره چیقمدینی حالده بلا ضروره خارجهده تأخر افسادی موجب اوله رق حرامدر

عند الأئمة مرأیه افضل اولان خانه سنك مسجدند اعتکافیدر احکام سائرہ سی وسیلة الفلاح نام اثر مرزده مذکور اولقله مراجعت بیورلمسی توصیه اولنور .

❁ احکام ضحایا ❁

مسئله ۲۵۰ — قضایا قضیه نك وعطایا عطیه نك جمعری اولدقلى كى ضحایاده ضحیه نك جمعی اوله رق قربان بیرامنده قربان نیتیه کسیلان حیوانلرك اسمی اولوب سبب وجوبی ایام نحر ویا رأس اولق اوزره اختلافیدر ایام نحر دن اقدم ذبحله واجب ساقط اولماز زیرا نافله اولور . امام اعظم حضرتلرینه کوره نصابه مالک اولان مقیمه ذبحله دمنی اقمق عملاً واجب اولوب ائمه ثلثه ایلله امامین حضراتی عندلرنده سنت مؤکده در بناء علیه بالاتفاق مشروعه اولوب اختلاف آنجق واجبیه ویا مسنونه اولمسی کبی وصفنده در . نصاب وجوبی ز کاتده اولدینی کبی حولان حول و نما ایلله مشروط اولیه رق حوايج اصلیه دن فضله اکیوز درهم کموش ویا یکر می مثقال آلتون قیمتنه مالک اولمقدن عبارت اولوب وجوبنك شرطلریده حریت . اسلام . اقامتله نصاب مذکوره مالک اولمقدر .

❁ رکنی ❁

مسئله ۲۵۱ — قیون . کچی . صغر . دوه بوغازلیوب قانتی آقمقدر قیون و کچیدن برسنه لکی صغردن ایکی سنه لکی دوه دن بش یاشنده اولانی بوغازلیوب جوازنده ایرکک و دیشیلری مساویدر واجب اولان اراقه دمی اولقله عیننی ویا پاره سنی تصدقله ذمتدن واجب ساقط اولماز قیونله کچیدن بری آنجق برکشییه قربان اولوب صغر ایلله دوه دن بری جمله سی مسلمان اوله رق قربان نیتیه کسمك شرطیه یدی کشییه کفایت ایدر .

❁ حکمی ❁

مسئله ۲۵۲ — دنیاده ذمتدن وجوبی اسقاطله اخرتده ثوابه نائل اولمقدر . بناء علیه حائز نصاب اوله رق اهله واجب اولان قربانی کسمك دخی عبادت اولقله صحته نیت شرطدر زیرا بدايعك بیاننه کوره ذبح حیوان بعضا اکل و بعضا بیع و بعضاده امر مجده وقوعبولان احصار وسائر جنایت حج امثالی بشقه

قربتلر اچون واقع اوله رق نیتله تعیننی لازمدر نیتک سبب مشروعیتی عبادتی عادتدن و بعض عبادتی دیگرلرندن تمیز و تفریق اولمقله حسب لنصاب واجب اولان ذبح صحابی دیگرلرندن تمیز ایچون نیت لازم اولوب بلانیة ذبح قربت لازمه اولهمیه جغندن صاحب اشباهک بیاننه کوره قربانی صاتون الیر ایکن سائر کتب فقهیه نیتک بیانلرینه کوره منوییه مقارن ولق ایچون حین ذبحده نیت شرط اولوب بلاعد نیتک منوییه مقارنتی ترک خلاف اولیدر. بیان اولدینگی اوزره نیت لازمه نیتک حین اشتراده اشتراطی اوزرینه بروجه آتی مسائل تفریع اولنور ذخیره نیتک قربان بحثنده بیاننه کوره برینک قربان نیتله المش اولدینگی قیون و امثالنی صاحبک اذنی اولیه رق بشقه سی کندی نفسی ایچون ذبح ایدوبده انک بدلنده هیچ برشی تضمین ایتدیرمیه رک مذبوح اولدینگی حالده استرداد ایلسه حین اشتراده قربانه نیت ایلمش اولمقله کندوسندن صحیح اوله رق ذمتندن واجب ساقط اولور ایسه ده برشی تضمین ایتدیریر ایسه واجب اولان اراقه دم تجزی قبول اتمیه جکندن اسقاط واجبده کفایت ایلمز بوصورته ذابح مذکور حیوانک قیمتی ضامن اولور ایسه بطریق الاستناد وقت قبضندن اعتبارا مالک اوله جغندن کندوسنه واجب اولان قرباندن کفایت ایدر .

مسئله ۳۵۳ — حکم مذکور بناء بر کیمسه دیگرینک قربانی غضب و یا سرقت ایدرک بدلنی صاحبنه ضامن اولسه بطریق الاستناد وقت غضب و یا سرقتندن اعتبارا مالک اوله جغندن کندیلری ایچون تصرفلری صحیح اولور ایسه ده خلاصه نیتک بنانه کوره و دیعه و عاریت و بضاعه و رهن اولان و موکل ایچون بالوکاله النان قیونلری مودع و مستعیر و مستبضع و وکیل و زوجیندر هربری دیگرک قیونلرینی بلاذن کندیلری ایچون ذبح ایدوبده قیمتلرینی ضامن اولسه لر کندیلرندن کفایت ایلمز زیرا بوصورتلرده اضحیه انجق ذبح سببیه تحت ضمانده داخل اولمقله ضمانله مالک اولملری بطریق الاستناد ذبحه مباشرت اوزرینه تقدم ایده میهرک بلا اذن بشقه سنک ملکنده ذبحله تصرف اولوب بو ایسه جائز اولهمیه جغندن کندیلرندن کفایت ایلمز .

مسئله ۳۵۴ — بیان اولدینگی وجهله ضامن اولق اوزره نقصان قیمت طلبنده بولمنسی اول کیمسه بلا اذن کندیسایچون کسه رک غاصب اولدینغه کوره اولوب

اما قیون صاحبه قربان و لمق نیتله مجرد معاونت و خدمت اوله رق ذبح ایدوب بوغازلیویرمش ایسه حسب العرف دلالة مأذون اوله رق غاصب اولمدیغندن ضمان ایجاب ایتیه جکی کبی صاحبی ایچون اسقاط واجبه حاصل اوله رق کفایت ایده جکندن حین اشتراکه نیتک اسقاط واجبه کفایتی درکاردر .

مسئله ۲۵۵ — بیاز اولندیغی اوزره قربان نیتله النان حیوانک نیت مذکوره ایله قربانه تعین و اختصاصده اختلاف اولوب هر نقدر ائمه ثلثه عندلرنده تعین ایلز ایسه ده فقهای حنفیه ک بیانلرینه کوره عند الحنفی فقیر اوله رق کندیسنه قربان واجب دکل ایکن قربان نیتله آلمق شروع سببیه اول حیوانک ذبحی کندیسنه ایجاب ایدرک انی ذبح واجب اوله رق قربانه تعین ایده جکندن انی صامق جائز اولماز ایسه ده زنکین اوله رق حسب النصاب کندینه ذبح قربان واجب ایسه ایجاب باری ایله واجب اولان انجق اراقه دمی اولوب بو ایسه هانکی حیوانی ذبح ایسه حاصل اوله جعندن قربان نیتله المش اولدیغی حیوان ذبحه تعین ایتیه رک انک یرینه بشقه سنی ذبحله ذمتدن واجب ساقط اولور دیه رک حکم مذکوره زنکین ایله زکورت بینی تفریق ایدیلش ایسه ده کتاب اضحیه ده بدایعک ۶۸ نجی صحیفه ده بیاننه کوره صحیح اولان کرک زنکین و کرک زکورت مطلقا قربان نیتله النان قربانه تعین ایدرک ایام نحر دن صکرمیه قالور ایسه اراقه دمک وجوبی عینی تصدقه انتقال ایدرک غنی اولان کیمسه و تحقیق الباهرک بیاننه کوره کرک غنی و کرک فقیره قیمتی و یا لحمی تصدق جائز اولوب بلکه حی اوله رق عینی تصدق تعین ایدر .

شو قدر وارکه حیوان مذکور تلف و یا جواز قربانه مانع عیبی ظاهر اولورسه فقیردن ساقط اولوب زنکین اولانه انک یرینه بشقه سنی تصدق ایجاب ایدر زیرا فقیره ذبحله وجوب انک عینته تعلق ایدوب انک تلفیه ذبحه محل قالمدیغندن ذمتدن وجوب ساقط اولور .

مسئله ۲۵۶ — فقهای عظامک بیانلرینه کوره اضحیه حقنه بیان اولان احکام جاریه ده هدایا عین ضحایا کبی اولوب تطوعا کسیلان قربانلردن بالاتفاق اکلی جائز ایسه ده مندوردن اکل جائز دکلدر و کرک منذور و کرک اضحیه و هدیدن صامق بالاتفاق جائز دکلدر .

❁ احکام ہدایا ❁

مسئلہ ۲۵۷ — ہدایا . ہدیک جمع اولوب ہدیده لغة وشرعا حرم شریفده اراقہ دمیله تقرب قصدیله ذبح ایچون کوندریلان قیون وصغر ودوه اولوب ادناسی قیوندر .

مسئلہ ۲۵۸ — ہدی اولنه جق قیون لاقلا بریاشنده ودوه بش یاشنده وصغر ایکی یاشنده اولوب انجق اضحیهده جائز اوله بیلان جائز اولور هر نقدر دم شکرده مندوب ایسهده ہدی عرفاته کوتورمک وهدی اولدیغنه علامت اولق اوزره بویتنه علامت معناسنه قلاده اصرق ویا ارقهسنه چول چکهرک ویا اورکوجندن بر مقدار جرح ایدرک تقلید وتشہیری واجبدر .

مسئلہ ۲۵۹ — هر نقدر دم متعه ودم احصار ودم جزای صید ودم جنایت حج کی جنسلری مختلف ایسهده تقرب ایچون اشترا اولنان کرک دوه وکرک صغردن واضحیهده بالاتفاق جملہ سنک تقرب قصدی شرطیله یدی کشینک اشترا کی جائز اولوب برقیون ویا برکی انجق برکی مسیہ کفایت ایدہ بیلور بومقامہ متعلق اولان تفصیلات زائده وسیلة الفلاح نام اثر مزده بیان اولمشدر .

❁ فضائل جہاد ❁

مسئلہ ۲۵۹ — فضائل جہاد حقندہ وارد اولان آیات کریمہ واثار جلیلہ عدوا حصادن افزون اولوب (ولا تقولوا لمن یقتل فی سبیل اللہ اموات بل احياء ولكن لا تشعرون) مقتضاسنجه باحث حیات جاودانی و (لغدوة فی سبیل اللہ اوروحه خیر من الدنیا والاخرة) مقتضاسنجه فی سبیل اللہ اعلائی کلمہ اللہ ایلہ اعزاز دین اوغرندہ بر کرہ صباح ویا اقشام بولنق عنداللہ دنیا و آخره وما فیہما ثوابندن خیرلیدر .

مسئلہ ۲۶۰ — بلاد اسلامیہدن اعدای دینک شر ومضرتلرینی دفع وازالہ ایچون دشمن قارشوسندہ وحدود اسلامیہی محافظہده بولنانلرک بروقت نمازلری بشیوز وقت نمازه وبردرهم صدقهلری یدیوز درهم صدقیہ معادل اولوب اوحالده وفات ایدرسہ سؤال منکرین وعذاب قبر ودهشت محشردن

امین اولوب قیامتہ قدر دفتر اعمالہ حسنات و خیرات یازیلوب شهید ثوابیلہ
مثاب اوله رق بعث اولنور امام سیوطی صدقات جاریہ اسبابی بروجه اتی نظمہ
بیان بیورمشدر .

اذا مات ابن ادم جاء یحری * علیہ الاجر عدثلاث عشر
علوم بثها ودعاء یحل * وغرس النحل والصدقات یحری
وراثۃ مصحف ورباط ثغر * وحفر البر او اجراء نہر
وبیت للغریب بناء یاوی * الیہ او بناء محل ذکر
وتعلیم لقرآن کریم * شهید فی القتال لاجل بر
کذا من سن صالحۃ لیقفی * فخذها من احادیث بشعر

مسئله ۲۶۱ — (والذین جاهدوا فینا لنهدینهم سبلنا) ایت جلیلہ سی و
(رجعنا من الجهاد الاصغر الی الجهاد الاکبر) حدیث شریفی اقتضالریجہ (اعدی
عدوک نفسک الی بین جنبتک) ایلہ منصوص بالعداوة اولان نفس امارہ نک
خلافہ عبادات و طاعات ملازمته مجاہدۂ نفس اعدای ظاہرہ ایلہ مجاہدہ دن
اشد اولقلہ (اجرکم تقدر تعبکم) مدلولنجہ (نعمتک کلفتہ وکلفتک نعمتہ)
کورہ اولسی حکمتہ بناء نتیجہ حسیلہ دخی مجاہدۂ نفسیہ اشد واعظمدر
زیرا اعدای ظاہرہ نک هدف مقصدی مائل زوال و زائل نوال اولان مال
ویاجان اولوب عدو نفس وشیطانک مقصدلری ایسہ نعوذ باللہ تعالی باعث نجات
اولان ایمانک ازالہ سیدر .

❁ لزوم جهادك شرطی ❁

مسئله ۲۶۲ — لزوم جهاد ایکی شرط ایلہ مشروط اولوب بری دین حق
قبولدن امتناع ایدوب کندولریلہ اسلام اراسنده برکونا عهد و میثاق بولنماق
ایکنجیسی مادی و معنوی اهل اسلامک قوه و غلبہ سی ظن قوی و غالبہ مظنون
و مأمول اولسیدر . بناء علیہ مادی و معنوی اسباب والاتک تدارکیلہ اسباب
ظفر تحت تأمینہ النهرق غلبہ مأمول اولمادقجہ حربہ قیام تهلکک یه القای نفس
اولقلہ (ولاتلقوا بایدیکم الی التهلکة) مقتضاسیلہ عمل ایجاب ایدر بناء علیہ

(اَعَدُّوا مَا اسْتَطَعْتُمْ مِنْ قُوَّةٍ) مقتضای سنجه هر آن وزمان اسباب ظفرک ادامه
وابقاسنه بذل مقدریت جهاددن معذود اوله رق واجبات دینه دندر .

حکمی

مسئله ۳۶۳ — ایجابی حالنده کتاب وسنت واجماع امتله ثابت اوله رق
اقتضای سنجه کوره فرض عین وفرض کفایه اوله رق اداسیله سائر عبادات کبی
لزومنه بناءً مکلف اولنلرک ذمتلرندن اسقاط واجبله سعادت سرمدیه نائل
اولقدر .

توفیقات الهیه رفیق ورهبرم اولورسه بوندنصکره احکام وقف ووصیه
ونکاح وایمان امثالی عبادات التزامیه دخی بروجیه اسلوب نشر اولنه جقدر .





DATE DUE

To renew
call 292-3900

[illegible]

The Ohio State University
Form 10620

MAIN STACKS

